

**NATIONAL ASSEMBLY OF
SEYCHELLES**

*Wednesday 8th September,
2021*

The Assembly met at 9am

National Anthem

Moment of Reflection

Mr Deputy Speaker in the Chair

MR DEPUTY SPEAKER

Bonzour tou Manm Onorab e bonzour tou bann dimoun ki pe swiv sesyon *Sitting* Lasanble Nasyonal pou sa Merkrede 8 Septanm, nenport landrwa kot zot ete. E nou premye *item* lo nou *Order Paper* ozordi bomaten se en *Statement* par Minis pou Transpor, an ankor avek *Order 38* nou *Standing Orders*. Donk mon ava fer apel Minis avek son delegasyon silvouple.

Bon nou ava swet Mr. Antony Derjacques, Minis ki responsab pou Transpor la bien vini parmi nou bomaten pou son *Statement*. E Minis i akonpanyen par Sekreter Prensipal pou Transpor, Mr. Patrick Andre e osi Sef Egzekitiv lakonpanyen Transpor Piblik,

Mr Patrick Vel. Donk, nou ava envit Minis pou son *Statement*.

**MINISTER ANTONY
DERJACQUES**

Mersi Mr Speaker. Bonzour sa ki pe ekoute. *Mr Honourable Leader of Government Business, Members of the National Assembly*. Mr Speaker, semenn pase mon ti prezant en *Memorandum* avek *Cabinet*, avek bi pou fer Gouvernman okouran sityasyon *SPTC* e pou ganny zot laprouvasyon lo ki manner pou asiste *SPTC*. E osi ganny zot pwennvi lo fitir transpor piblik dan Sesel e osi sa ki enkli *SPTC*.

Dan Bidze 2021, *SPTC* ti prezant en sonm R214 milyon pou kouver zot kou looperasyon. Gouvernman ti donn zot R50 milyon koman en sibvansyon pou siport kou sa looperasyon. *SPTC* ti fer sorti klerman ki sa sonm pa pou ase pou kouver zot looperasyon ziska lafen sa lannen.

An vi konsern ki *SPTC* ti leve, Minis Finans, Minis Transpor, *PEMC*, Departman Transpor lo Later ek *SPTC* ti zwenn pou diskrit lo sa sityasyon.

Minister Finans ti fer resorti ki sityasyon i grav avek Bidze e alors *SPTC* i devret revwar son bann stratezi looperasyon. Reveni ki pa pe

ganny anmase e osi vwar ki manner i kapab koup lo bann depans ki pa nesaser.

Osi *SPTC* ti ganny dir ki fodre asire ki zot itiliz larzan dan en fason pli efikas ki posib. Baze lo sa diskisyon ek bann lenformasyon ki'n ganny diskite lo la, *PS* pou Departman Transpor lo Later ti ganny manda pou organiz bann *meeting* konsiltativ avek *SPTC*, *PEMC*, Finans, pou revwar sa sityasyon e propoz mezir ek rekomandasyon, pou ki Gouvernman atraver *Cabinet* i kapab konsidere.

La en travay ti komanse ki ti annan 2 bi prensipal. Pou vwar premyerman ki manner *SPTC* pou kapab sirmont defi dan Bidze 2021 ek '22. Fitir *SPTC* osi.

Dan premye lenstans *SPTC* ti ganny demande pou revwar fason pou li redwir sa kou loperasyon. E baze lo sa legzersis e rapor ki in soumet e atraver bann mezir ki in pran, in espekte redwir son bann kou loperasyon par R8 milyon.

Menm si i kontinyen kit pri bis R7, *SPTC* pou *still* bezwen Bidze adisyonnal pou en sonm R28milyon sa lannen.

I enportan pou doute ki pri bis avan 2018 ti R5. An 2018, *Cabinet of Ministers* ti aprouv pou ki pri bis i vin R10.

Me ler Minis Finans sa letan ti pe anons Bidze i ti kit pri bis R7 dan plas R10. I enportan pou note ki dan premye kar 2021, *SPTC* in fer en pert R12.4 milyon apre *depreciation*.

Alors perd total ki'n ganny prevwar pou 2021 i R40.4 milyon. Ler nou retourn lo travay ki sa Komite in fer, zot in konsantre lo sa bann pwen swivan.

Dan stratezik *SPTC* pou 2021 ek '25 ;- *SPTC* in ganny kree an '77, an akordans avek en Dekre ki apel *Seychelles Public Transport Corperation Decree*, avek bi pou donn en servis pli konvenyan, *safe* ek afordab.

An Desanm 2020, *SPTC* ti pibliy son nouvo Sekter, *Sector Strategic Plan 2021-2025*. Ziska '25.

Nouvo vizyon pou *SPTC*, premyerman pou donn en sistenm transpor piblik ki modern e soutenab, ki agrandi devlopman avek aspirasyon son pei ek son pep. Son misyon i enkli vin en operater transpor piblik ki fyer e anbras inovasyon dan sa sekter par donn en sistenm modern ek lenfrastruktir ki robis.

Ogmant leksperyans son bann konsonmater atraver donn en servis ki an sekirite. Lekspektasyon sa nouvo plan

stratejik i enkli pou vin pli efikas dan son loperasyon e ki dimoun i kapab kont lo son servis. E osi pou mentenir son finans dan en fason pli efikas e annan en sistenm fiskal ki pli byen organize.

Revi lo rapor ki *SPTC* ti prezante, ti montre e ganny diskite e bann pwen prensipal i ;- enn, bann risk fiskal pou *SPTC*, defi dan Bidze, mezir pou koup lo bann perd ki in fer.

Revwar son resours imen avek bi pou redwir travayer kot i nesaser. Etabli en pri bis ki pou omwen kouver son loperasyon. Propoz bann sanzman dan Polisi *SPTC*.

Defi dan Bidze *SPTC* :

Pou sa lannen *SPTC* in prevwar en perd R132.7 milyon avek en defisit R86.8milyon dan kou son loperasyon. Sa prediksyon i enkli 12.5milyon sibvansyon ki'n resevwar an Fevriye sa lannen.

SPTC ti annan en balans negativ 4.3 milyon apartir le 31 Zanvye, 2021 e i ti ganny en balans negativ R7.5milyon par lafen Zen sa lannen.

SPTC in servi en sistenm kou an gro dan son Bidze e diviz sa par lakantite pasaze ki i espekte transporte. Alors bann faktor ki pou afekte profitabilite *SPTC* i *comme* swivan ;-

- Kou total ki *SPTC* i pou sibir,
- Lakantite Kilomet ki i pou kouver.
- Lakantite larzan ki i pa pe anmase.
- Kantite pasaze ki i anmennen.
- Striktir pri bis ki pou enplimante.

Nou osi dedwir ki sa defisit ki *SPTC* pe eksperyanse oubyen i eksperyanse i an rezilta sa bann pwen swivan ;-

- *SPTC* pe anmas sifizan larzan ki i bezwen pou kouver son bann depans.
- Mwens reveni ki ganny kolekte atraver redistribisyon lo sa kantite pasaze ki i pe anmennen akoz *COVID-19*.
- Sanzman dan pri *fuel*.
- Ogmantasyon dan kou transportasyon.
- Inefikasite dan stasyon lo son bann larout ki pa profitab e en mank planifikasyon ki apropiye.

Pou nobou adres sa bann problem bidzeter, *SPTC* i bezwen restriktir son bann larout ki long avek omwen 2 sistenm pri bis. Me an prenon

ki bann pasaze ki pli vilnerab pa ganny afekte, espesyalman sa bann ki pe fer vwayaz pou a travay e retourn kot zot an servan en sistenm ‘*Weekend special.*’

Konsider loperasyon dan bann servis rezyonal e entrodwi bann pti larout dan bann semen segonder, ki konekte avek grannrout. Revwar bann larout ki pe fer avek bi pou koup oubyen minimiz lakantite kilomet, oubyen elimin bann gran larout san ki i konpromiz son servis.

Regard ki bann lezot opsyon i kapab servi pou zener reveni apar ki tiket bis, tel ki *advertisement* lo bis e bann travay spesyalize.

Propozisyon sete pou reviz bann pri bis dan katriyenm kar sa lannen e pou analiz lefe ki i pou annan lafen lannen. Lenplimantasyon bann diferan pri bis par egzanp ;-

- Servis bis aswar, servis spesyal ek *aircon.*
- Servis dan *weekend* e dan lasemenn.
- Konsidere pri bis diferan pou bann touris an vi ki pri bis i ganny sibversyon.

Reveni ki osi perdi ler i pe ganny kolekte :

Nou perdi apepre 10poursan revi ler bann dimoun pa pran zot tiket ler zot larzan pe ganny kolekte dan bis.

SPTC i devret o pli vit posib fer *manpower* odit an konsiltasyon avek *DPA*, avek bi pou maksimiz prodiktivite bann travayer. Sa nou apel *right sizing*. Espesyalman bann *non-operational staff*. Sa i sipoze ganny enplimante apartir premye kar lannen 2022.

SPTC in deza inisye sa legzersis pou redwir e minimiz gaspiyaz. E ki lefikasite i ekspekte redwir son bann kou par R8milyon. *SPTC* in osi koup lo sa 25 travayer ki i ti pe al anlwaye e sa lannen in pran selman 10 drayver ek 18 *URS*. In koup lo sa 75 ki ti pou *take in* e dan plas 75 travayer in pran 10 drayver ek 18 *URS* dan plas sa 75.

Propozisyon *SPTC* pou revizyon Bidze 2enm ek dernyen bout kar - 4triyenm kar 2021 :

Avek sityasyon *COVID-19* e baze lo bann lakantite dimoun ki pe ganny transporte ti espekte ki lakantite dimoun ki voyaz lo bis pou kontinyen desann dan dezyenm kar sa lannen. Me sa i espekte monte dan trwazyenm kar si sityasyon *COVID* i amelyore.

Si pasaze pa ogmante e pri bis i reste R7, larzan adisyon ki *SPTC* pou bezwen pou kontinyen son laparisyon pou ariv R54.9milyon. Bann landrwa ki'n koz sa bann bezwen dan pasaze i ;-

- Mwens zanfani ki pe vwayaze.
- Travayer pe travay se zot, *working from home*.
- 30poursan rediksyon dan kapasite ki bis i kapab pran pasaze, akoz zot pa ganny drwa debut.
- E zot pa ti kapab transport bann touris akoz ti annan mwens touris.

Scheme ASP ek Minister Ledikasyon i pe reste e pou reste. Bann dimoun ki pe benefisye avek sa bann *Scheme* pri bis spesyal, i enkli ;

- Bann pansyoner,
- Bann dimoun avek dezabilite.
- Travayer ki bezwen pran bann bis pou al travay, *Worker special*.
- Zanfani lekol primer ek segonder, etidyan pos segonder.

Avek sa bann mezir ki pe propoze, bann travayer ki travay aswar pou osi benefisye. Plis detay pou

ganny donnen par *SPTC* pli tar.

Alors mon pe konfirmen ki *Scheme ASP* avek *Scheme* Ledikasyon pou reste. Bann propozisyon pou adres sa defayans, nou annan bann opsyon. Annefe i annan 4 opsyon. Premye opsyon lo pri bis,

- *SPTC* pou ganny sibvansyon e servi bis e en pri i reste parey. Son lenpak se ki per ki pe ganny prevwar pou 2021 i R40.4 milyon apre sibvansyon ki fer ki *SPTC* i bezwen sipor Bidze adisyonnèl.

Sa i pou fer ki sipor total pou *SPTC* pou ariv R90.4 milyon sa lannen 2021 si pri bi si reste R7.

Pou lannen 22 *SPTC* pou bezwen apepre 70milyon pou loperasyon e 14milyon pou kapital pou aste nouvo bis. Kou total pou 2022 i pou R84milyon si pri bis i reste R7.

Opsyon 2:

Opsyon 2, sibvansyon parsyel pou *SPTC* e *SPTC* i propoz ogmantasyon pri bis *come swivan* ;-

- Pri bis i vin R10 pou bann vwayaz ant Lendi ek Sanmdi.
- Pri bis i vin R15 Dimans e dan konze piblik.

- E nou re entrodwi *aircon* avek en pri bis R15.

Sa opsyon i ganny konsidere e enplimante, defisit pou 2021 apre sibvansyon pou ariv R27.4 milyon. Avek tel propozisyon nou espekte sa bann rezilta swivan. Sa i ler pri bis i R10.

Apartir dezyenm kar ziska katriyenm kar 2021 sa lannen, *SPTC* i espekte anmas R76.7milyon. *SPTC* pou bezwen sibvansyon pou en total zis R37.5milyon, i osi espekte anmas R1.5milyon adisyonnèl ek bann travay spesyalize.

Kou total ki *SPTC* pou depanse apre sa R8 milyon ki in anmase avek restriktirasyon i R131milyon e alors en defisit R15 milyon i ganny prevwar ant dezyenm ek katriyenm kar pou sa lannen, 2021.

Sa pa pran an kont defisit aktyel R12.4milyon ki'n fini ganny pran e raporte pou premye kar sa lannen '21.

En total R27.4 milyon defisit in ganny prevwar pou lannen 2021 ki Gouvernman pou bezwen donn atraver Bidze.

Alors total lenpak lo Bidze pou katriyenm kar 2021, sa lannen pou sa lannen pou ariv R27.4milyon dan lopsyon 2 konpare avek en Bidze R40.4

milyon adisyonnèl dan opsyon 1.

Pou eksplik ankor, si nou gard tiket bis R7, Bidze pou bezwen donn *SPTC* R40.4milyon sa lannen, an adisyonnèl sa. Be si e ler tiket bis i vin R10, pou sa lannen nou pou bezwen donn *SPTC* R27.4 milyon e non pa R40.4milyon.

Pou lannen prosenn in prevwar ki *SPTC* pou bezwen siport adisyonnèl R27milyon pou son loperasyon, enkli R50 milyon ki'n ganny met dan Bidze e R14milyon ki'n osi ganny mete dan Bidze pou depans kapital.

Total pou lannen prosenn, larzan adisyonnèl pou R40milyon anba opsyon 2. Alors ler ou konpar en opsyon avek lot, ou vwar sa gran diferans. Avek opsyon 1, nou pe koz R84milyon, avek opsyon 2 (saverdir bis vin R10 dan plas R7) nou pe koz R40 milyon pou lannen prosenn.

Sa dezyenm opsyon, sorti R7 pou vin R10, i sa rekomandasyon ki transpor, finans, *PEMC* ek *SPTC* in met devan *Cabinet* e se sa ki *Cabinet* in aprouve Merkrede pase.

An tou ka, parkont nou ti'n met en opsyon 3 devan *Cabinet*, e sa opsyon pa ti pou bezwen okenn Bidze adisyonnèl pou siport zis loperasyon, pa

kapital. Sa opsyon ti pri bis i vin R12 ant Lendi ek Sanmdi e pri bis i vin R15 pou Dimans avek konze piblik.

Si sa ti'n ganny swazir par *Cabinet*, savedir R12 e R15 dan Dimans, pou lannen 2022 *SPTC* ti pou bezwen sipor zis R14 milyon pou son bann depans kapital, par egzanp pou li aste bis. Alors sa si trwazyenm opsyon ki nou ti'n met devan *Cabinet*.

Ti annan en katriyenm opsyon ki nou ti met devan *Cabinet*. Opsyon 4. Avek opsyon 4 *SPTC* pa ti pou bezwen okenn sipor Bidze adisyonnèl pour son sipor, pour son loperasyon e pour son kapital. Sa pa ti pou enkli selman bann nouvo bis ki nou ti pou bezwen aste.

Sa propozisyon opsyon 4 ti *comme* swivan ;

- Pri bis ti a vin R14 ant Lendi ek Sanmdi.
- E pri bis ti pou R16 pou Dimans e konze piblik.
- E servis bis aswar apre 7er ti pou R20 e servis bis *aircon* ti pou vin R20 apartir Oktob.

Sa ti opsyon katriyenm. Savedir pri bis ti pou R14 Lendi a Sanmdi e R16 dimans avek konsey piblik. E *SPTC* pa ti pou bezwen sa

R14milyon pou son bann loperasyon.

Me sa opsyon nou pa ti rekomande avek *Cabinet*. Parey mon'n dir, nou ti rekomande opsyon 2 ;- savedir tike bis i sorti R7 i vin R10.

Fitir *SPTC* :

An vi ki Polisi Transpor Piblik i a sa moman pa an egzistans, en Polisi *Transport Public* - Piblik pa an egzistans, *SPTC* i vwar li difisil e konplike pou fer stratezi e vin ek en plan konkret pou reisi son vizyon e son misyon.

Parkont en diskisyon avek Labank Mondyal pou lasistans pou prepar en Polisi Transpor Piblik in fini komanse depi 2019.

E dan en misyon ki Labank Mondyal i a fer, nou pe diskit pou reform *SPTC*. Sa ed memwar ki zot in soumet in *summarize* bann rezilta ek bann lagreman lo proze, enkli son *scope* pou bann kalite aktivite ki pou fer ;- rezilta konsiltasyon sorti kot nou bann partner dan sekter piblik e *on the way forward* i dan sa ed memwar.

Sa proze avek *World Bank* ti ganny met akote akoz *pandemic COVID-19* e nou pou bezwen re anmenn li e re diskit avek *World Bank*. Parkont Departman Transpor lo Later pe travay lo en propozisyon ki

pou ganny soumet avek *Cabinet* lafen Oktob.

Sivan rekomandasyon Minister Transpor, Minis Finans, *PEMC* avek *SPTC*, alors *Cabinet* in aprouv opsyon 2 ki enkli ;-

- Pou *SPTC* i ganny en sibvansyon adisyonnèl R27.4 milyon pou kouver son *shortfall* pour sa lannen.
- Dezyenmman in aprouv tarif bis sorti R7 pou vin R10.
- Trwazyenmman *Cabinet* in aprouv ogmant tarif bis aswar, Dimans e konze piblik pou vin R15.
- E finalman pou anmenn bann regilasyon neseler pou fre bann *fare invaders* e lezot lamannman neseler pou kouver bann *fare invaders*.
- E nou osi pou rod lasistans teknik ek finansye avek bann partner.
- E pou travay lo reform *SPTC*.

E pou ki *SPTC* i reviz bann lenplimantasyon pou dezyenm opsyon pandan lannen 2022. Savedir i pou revwar opsyon 2 lannen prosenn.

E ki Minister Transpor atraver Departman Transpor lo

Later i atraver lo en propozisyon pou en nouvo Polisi pou transpor e prezant avek *Cabinet* parey mon'n dir, lafen Oktob.

Mr Speaker, nou bezwen plis konsiltasyon pou bouz devan. Nou lentansyon se pou fasilite mouvman dimoun. Si nou redwir pri bis dan bann zour konze, si nou retir sa R15 dan Dimans e fer li osi tourn R10 parey nou trouve i annan en demann, *SPTC* pou perdi R3.4milyon si pri bis Dimans i redwi lo sa R15 an Oktob e i vin R7.

I enportan pou note ki sibvansyon ki pe ganny donner i sorti dan *Consolidated Fund*. Tou sa larzan ki nou donn *SPTC*, par egzanp sa lannen R90.4milyon e lannen prosenn si pri bis pa sanze, R84milyon i sorti dan *Consolidated Fund*.

E *Consolidated Fund* i bann *tax* ki zot tou zot peye. Travayer i pey *PIT*, *businessmen* i pey *VAT* e i pey *business tax* e bann lot depans kot i neseler ki dan Lalwa.

Mon fer en demann avek bann Manm Lasanble pou konsilte avek zot bann *constituents*, avek pou konsilte avek piblik lo bann desizyon, lo bann lide. Akoz avek lafen Oktob nou pou bezwen met sa bann propozisyon devan *Cabinet*.

Nou demann piblik Seselwa pou partisip dan sa demars pou nou moderniz avek, pou nou re fer bann transpor piblik dan nou pei. Anvoy bann lide, anvoy bann komanter lo bann *Schemes* ki nou kapab entrodwi *going forward*.

Nou anvi regard e met anmezir bann *discounted bus passes*, bann *day card* kot ou pey en kart pou tou ou vwayaz pou en zournen antye. Nou anvi regard par egzantp en *family special card* apre entrodwi en *corporate card*.

En *corporate card* kot bann travayer avek bann *businessman*, bann anlwaye i diskit lo en kart spesifik pou travayer pou vin travay e zot biznes i kapab osi partisip ladan. E ler ou partisipe sa i donnen rediksyon dan pri sa kart pou sa bann travayer pou zot vin travay e al kot zot.

Nou demann ki bann - parey i annan avek *STC*. In pe partisip ladan, ki tou bann biznes i partisip ladan e regard ki mannyer zot kapab zot osi donn travay en benefis apart ki zot bann saler, zot bann *allowances*.

Pou regarde ki mannyer zot kapab partisipe e donn en *subversion* atraver sa *cooperate card* ki *SPTC* pou entrodwi. Pou fer li pli abordab ki bann

travayer i kapab vin travay e zot, zot kapab fer zot prodiksyon marse ek zot profi.

Gouvernman i toultan reste konsernen avek sa pri bis ek sa pri ki monte. Wi i sorti R7 i vin R10. Sa i vin R6 an plis toulezour. Dan en mwan si en travayer i travay 20 zour dan en mwan, i vin apepre R120 an plis. Me sa i en kou, dan sa bann letan i difisil.

Me si nou anvi en *SPTC* ki sanze, en *SPTC* ki modern, en keksoz ki pli efikas, ki anmenn en travayer e ki dan *weekend* ouswa dan bann letan lwazir i anmenn ou, *leisure*, i anmenn ou partou lo nou bann zil. Praslin ek Mahe, nou pou bezwen refer *SPTC*.

Sa demann i ki nou tou nou partisip ladan, nou anvoy nou komanter. Nou donn nou bann lide e nou pei i bezwen avans devan avek son sistenm bis piblik. Mersi Mr Speaker.

MR DEPUTY SPEAKER

Mersi Minis. Mon krwar poudir sa size i en size ki enteres piblik e Lasanble. Donk an akor avek *Order 38(2)* nou ava permet ki nou ava al dan Staz Komite, akoz i annan 2 teknisyen. *PS* avek *CEO SPTC* ki ava kapab reponn serten kestyon.

E mon a enform bann Manm ki nou oule fini avek sa

size *by* 10.30 avan nou al *break*. Ki letan nou retournen pou nou pran en Prozedlwa. Donk nou ava annan nou lertan pou demann en pe kestasyon otour sa size.

Bon nou ava envit *LGB* pou *move* en Mosyon pou Staz Komite silvouple.

HON BERNARD GEORGES

Mersi Mr Speaker. Bonzour Mr Speaker. Bonzour Minis avek ou delegasyon, tou Manm Lasanble e tou dimoun ki pe ekoute.

Mr Speaker, swivan ou direktiv e anba *Order* 38(2) mon *move* en Mosyon pou ki nou antre dan Staz Komite Lasanble an antye pou permet ki Lasanble i kapab annan en enteraksyon avek bann Manm delegasyon Minis. Mersi Mr Speaker.

MR DEPUTY SPEAKER

Mersi Onorab Georges. Segonde Onorab Arissol.

HON SANDY ARISSOL

Mr Speaker, bonzour. Bonzour Minis avek ou delegasyon. Bonzour tou Manm e tou dimoun ki a lekout espesyalman bann dimoun ki servi bis *SPTC*. Mon ti a kontan segonn Mosyon propoze par Onorab Georges. Mersi.

MR DEPUTY SPEAKER

Mersi Onorab Arissol. Donk nou ava pran en vot pou al dan Staz Komite. Tou bann ki an faver. Okenn Manm ki kont? Donk rezilta pou nou kapab al dan Staz Komite pou nou kapab demann kestasyon otour sa size *SPTC* ki tre enportan, 18 Manm in vot an faver, personn pa'n vot kont e 9 Manm in *abstain*. Donk vot i pase, nou al dan Staz Komite.

Mersi Serzan. Donk lasal i ouver pou nou pran en pe kestasyon avek bann Manm. Gard zot lanmen anler. Me antretan nou ava komanse avek Onorab Woodcock. Demann ou kestasyon touzour. Larestan Manm....

HON WAVEL WOODCOCK

Mersi. Bonzour Minis ek ou delegasyon e tou dimoun a lekout. Minis i pa fer premye fwa ki pri bis i monte. Annefe pri bis *at* en pwen ti R3, in mont R5. E an 2013 dan *Budget Speech* 2013 par Minis Pierre Laport i ti fer en *Statement*. E dan sa *Statement* dan *Budget speech* i ti dir, '*Based on the various cost incurred in providing its services, SPTC will need to increase fares to R8 if it is to operate without subsidy*'.

Sa ti an 2013, Minis Pierre Laport sa letan ti dir, pou koup sa bann *subsidy* zot pou bezwen ogmant *bus fare* pou vin R8.

Me apre zot in fer monte sorti R3 pou vin R5, zot ti deside pou *maintain* sa pri R5 e kontinyen *subsidy* SPTC sa letan par R33milyon ki la bokou plis pou *subsidize* SPTC akoz nou annan nou *fleet* SPTC i bokou pli gran.

E an 2018 ankor Minis Larose dan Bidze 2019, i ti fer en lot *Statement* e i ti dir, “*For the past few years, Government have allocated around R40 million in support of SPTC’s budget. As from 2018, no funding will be allocated to this State-owned enterprise. Thus SPTC must become a self-finance entity. In this regard, SPTC’s bus fare will increase by R2 and the new fair will cost R7.*”

E *still* menm si sa letan Minis Larose ti fer sa *statement*, Gouvernman in kontinyen *subsidize* SPTC. E fodre note ki sa bann letan nou pa ti dan en kriz lasante e nou pa ti dan en kriz ekonomik.

La vi ki nou dan kriz ekonomi e Gouvernman i bezwen fer tou pou li kapab sey anmas larzan pou nou kapab kontinyen fonksyonnen koman

en Gouvernman. Eski menm si Gouvernman pe ogmant sa *bus fare* la, pe propoz pou ogmant *bus fare* pou R7 pou vin R10, eski Gouvernman pou *still* kontinyen *maintain* sa bann benefis, sa bann *bus fares*?

Parey en konparezon bann trwazyenm az pa pey *bus fares* e osi manrmay lekol zot annan bann benefis ki zot gannnen, e osi parey mon krwar ou’n mansyonnen i annan bann promosyon pou bann travayer ki kekfwa i bezwen fer plis ki en voyaz par zour.

Eski zot pou kontinyen gard enn de sa bann, parey mon dir, sa bann benefis pou enn de bann ki pli vilnerab dan nou sosyete? Mersi bokou.

MR DEPUTY SPEAKER

Mersi Onorab. Mon ava zis kosyonn bann Manm poudir nou 1 erdtan pou nou eksplwat sa size. Donk annou fer nou bann kestyon kourt e osi mon envit panel pou fer zot larepons *pointue*. *Minister*.

MINISTER

ANTONY

DERJACQUES

Mersi Mr Speaker. Mersi Onorab pou kestyon. Wi, dan lepase par egzantp an 2018, *Cabinet* ladministrasyon avan ti pran desizyon e zot ti dir ki pri

bis i bezwen monte pou vin R10.

Akoz Gouvernman ti ankor pe met en kantite larzan *tax* dan *SPTC* e sa volonte pou fer ki *SPTC* i vin soutenab, vyab ti la. Selman ler zot ti prezant Bidze Minis Finans pa ti met sa an aplikasyon e pri bis ti reste R7.

Me sa Gouvernman ler nou'n vwar ki plizanpli *SPTC* pe pran bokou plis bann sonm dan Bidze *Consolidated Fund*, nou'n vwar ki nou bezwen moderniz, restriktire e nou bezwen larg *SPTC* lo sa semen, sa premye pa pou li komans vin en striktir, en bis servis ki pli efikas, pli modern, me i bezwen sa *financing*.

Savedir *SPTC* i bezwen rod son finans li menm, i bezwen modernize, i bezwen vin pli efikas e nou bezwen mazin bann lot opsyon osi ki Gouvernman i annan *available*. Par egzanp avek bann *omnibus*, avek bann *privatization* bann larout segonder eksetera. E pour sa rezon ki nou pe demann pep Sesel osi, partisipe, anvoy bann lide kot nou.

Sa pri bis sorti R7 pou vin R10 i pa vedir ki *SPTC* i pou kapab fer tou lo li menm. I pou bezwen kontinyen ganny sipor Gouvernman parey mon'n fini

dir. Si nou oule *SPTC* i bouz tro vitman, pri bis pou double. I pou vin sa R14 ant Lendi avek Sanmdi, avek R16 dan *weekend* ek dan bann zour konze piblik.

Alors nou pa anvi donn sa sok. Nou anvi fer li dan en fason rezonnab. Nou anvi komans en pti pa, apre nou ava revi. An menm tan nou pa pe dir ki pri bis pou mont en sel kou pou lannen prosenn, nou pe dir nou bezwen *re-strategies*.

Nou bezwen bann lide avek bann manm piblik, avek zot menm pou nou regarde lafen lannen 2022 lannen prosenn ki nou pou fer. *SPTC* pe komans lo en vwayaz e sa i bann premye pa.

Tou bann lot servis ki *SPTC* pou kontinyen donner avek *ASP* avek ledikasyon, tousala pou reste. Bann ki dezabilite, ki dan dezabilite. Bann pansyoner, bann manrmay ki al lekol, tousala sa bann *Schemes* pou reste.

E *SPTC* pe regard bann lot *Schemes*, par egzanp sa *family card*, *the day card*. Tousala nou pe eksplere, nou pou gete ki nou kapab fer. Mersi Mr Speaker.

MR DEPUTY SPEAKER

Mersi Minister. Zis pou mwan enform Lasanble poudir i

annan 11 Manm ki'n endike zot oule demann kestyon. Onorab Arissol, Onorab William, Onorab Romain, Onorab Labonte, Onorab Roucou, Onorab Mondon, Onorab Naddy Zialor, Onorab Adelaide, Onorab Loizeau, Onorab Bistoquet avek Onorab Hoareau.

I posib ki nou pa pou kapab *go through* sa *list* akoz nou oule fini 10.30 so, zot ava eskiz mwan pou sa. Nou ava, lot entervenans Onorab Arissol. Antretan Onorab William *next* pou ou.

HON SANDY ARISSOL

Mersi Mr Speaker. Bonzour ankor enn fwa. Mon ti a kontan ankor enn fwa dir Minis mersi avek ou delegasyon pou ekout leko deor e pou et dan Lasanble ozordi pou donn nou serten leksplikasyon pou nou ganny sans ki reprezant lepep deor kapab demann ou kestyon.

Mon ti kontan komans koumsa Minis, si mwan mon ti kapab lev lanmen dan sa Lasanble Nasyonal pou sibvansyonn *Air Seychelles*, en lakonpanyen ki annan environ 600 a 700 travayer Seselwa, mon pa pou *mind* lev lanmen ankor en fwa dan Bidze ki pe vini pou mwan sibvansyonn *SPTC*.

En lakonpanyen ki deservi 50 a 60 mil dimoun par zour, mazorite ladan se bann travayer Seselwa ki leve, ki al travay pou zot anmenn larzan dan lekonomi pei. Mon pa ou *mind* fer sa.

Alors, mon propozisyon. Mwan mon pli an faver ou dezyenm propozisyon. Sorti R7 pou vin R10. Koumsa Seselwa i ava zwenn Gouvernman *half way* dan sa difikilte ekonomik ki nou tou nou pe fer fas avek.

Me parkont sa ki mon pe propoze Minis, R15, R12 i en *bad timing* pour lemoman. Parski si pe fer fas avek difikilte ou kapab mazin en ki zabitan Bel Ombre avek Lepep Seselwa pe fer avek laba deor.

Me parkont R12 oubyen R15 i ava al pou sa etranze ki servi nou bis. Konze piblik, bann etranze. Lakonpanyen konstriksyon ki ranpli nou bis dan konze piblik avek Dimans. Zot, zot a pey zot R15.

Mon *happy* avek R10 akoz deza *SPTC* pe ofer en servis R10 li e mon annan bis prive Bel Ombre ki pe ofer en servis R10 li e dimoun i ranpli sa bis. Me avek serten kondisyon Minis, si bis i mont R10. Ki premyerman bis *SPTC* i donn nou en pli bon servis. Zot a ler. Zot bis i prop, zot bis pa koule, lafnet pa fermes, dimoun i mouye. En

bon servis si zot pe ogmant zot pri bis.

Mon kestyon alor i vin dan sa laliny. Letan Minis ou'n koz environ 10poursan larzan pa antre kot *SPTC*, kestyon ki mon demann mon lekor, kotye i ale sa larzan?

Kestyon ki mon ti a kontan demann ou koman Minis ozordi, ki zot, ki ou Minister pe fer avek *SPTC* pou rekiper sa 10poursan larzan ki pa pe antre dan lekonomi pei oubyen ki al kot *SPTC* ?

Mon pe demann sa parski Mr Vel ki asiz la devan li ki nou pe met li ansarz nou *SPTC*, li ki bezwen responsab nou larzan kot *SPTC*, parski li osi i ganny peye pou fer sir ki nou larzan i ganny anmase kot *SPTC*.

Si nou larzan pa ganny anmase, Mr Vel pa kapab ganny peye lafen dimwan. Mon premye kestyon.

Dezyenm kestyon mon pe demande se, letan ozordi lemonn pe evolye ek sa zafer Roupri, zot pe servi kart. Mon ti a kontan demann ou dan mon Gouvernman koman mon Minis avek bann teknisyen *SPTC*, kan eski Gouvernman pou arete ek sa sizyenm Roupri.

Pou ki ou pa vin ankor pou dir ek mwan poudir 10 poursan larzan pa pe antre.

Pou nou entrodwi en sistenm kart e en servis bis ki efikas pou zabitan Bel Ombre kontan avek Lepep Seselwa ? Mersi bokou Mr Speaker.

MR SPEAKER

Mersi Onorab. Minister.

MINISTER ANTONY DERJACQUES

Mersi Mr Speaker. Mon pou zis reponn an zeneral, apre mon pou demann *CEO* avek ou permisyon pou reponn sa ki reste.

Wi, mersi Onorab *Chief Whip* pou sipor pou opsyon 2. Savedir pou sorti R7 pou vin R10 parey *Cabinet* in swazir. Mr Speaker, parkont sa R12 i ler ou pey *cash*. E nou pe entrodwir e i annan en sistenm kart, espesyalman ek bann ki al lekol. Bann zanfan ki al lekol, kot zot annan kart.

Nou pe ankouraz kart pou nou vin *cashless*. Se pour sa rezon, si ou pey *cash* an Oktob ou pou pey R12. Si ou pey ek ou kart i pou R10. Sa R12 i zis pou dekouraz dimoun pou kontinyen avek sa larzan ki zot pe peye. Akoz ler ou pe pey larzan *SPTC* i perdi 10poursan dan en lannen.

Son kou loperasyon parey mon'n dir i R214milyon par an. Si ou pe perdi 10poursan akoz

cash, ou pe perdi R20milyon par an. Alors nou anvi dekouraz sa, nou anvi ki sa R20 milyon i ganny servi pou fer *SPTC* vin bokou pli efikas, modern.

Mr Speaker, avek ou permisyon Mr Vel i ava ante ladan.

MR DEPUTY SPEAKER

Sertenman Mr Vel.

PS PATRICK VEL

Bonzour Mr Speaker. Bonzour Onorab. Onorab kot i konsern sa 10poursan, fason ki sa 10 poursan, sa larzan ki nou estimen nou pe perdi 10 poursan, se letan pasaze pa pran zot tiket bis. E sak fwa zot pa pran zot tiket bis, nou napa sa rikord, sa tranzaksyon pa ganny rikorde e sa larzan i pa vin dan fon *SPTC*.

Lot keksoz ki lye avek ou konsern ou kestyon se servis pli efikas. Letan atraver tiket bis, nou osi kapab evalye *pattern travel*, kantite dimoun ki pe *travel*, lo ki larout, ki ler. E sa osi i ed nou pou nou amelyor nou *scheduling* nou ler bis.

Lot problem ki nou fer fas avek konsernan letan nou koz bis a ler;- Nou kontinyelman pe sey revwar pou aranz nou *time table* pou deservi piblik. E nou krwar

poudir dan letan bomaten ek apre midi, letan ki dimoun pe al travay oubyen pe sorti travay. Dan letan *peak*, mon krwar nou'n *achieve* sa en bon pe.

En problem ki nou fer fas avek se sirtou dan *weekend* ek bann ler *off peak*, ki bann dimoun ki pa voyaz toulezour. E i annan en tandans isi ki dimoun pa oule get zot *time table* bis. Zot pa oule vwar *time table* bis. Alors nou vin lo en *bus stop*, e kekfwal ler nou'n arive bis fek pase epi nou dir napa bis. E nou, nou ankouraz dimoun pou get zot *time table*.

Ou'n koz lo kart. Avek nou sistenm kart ki nou pe entrodwi la, nou pe komans fer *trial*. Nou'n devlop en laplikasyon e sa laplikasyon i pa zis pou ed ou pou *reload* ou kart, pou fer bann tranzaksyon lo ou kart. I pou osi annan *time table* avek e i pou osi donn ou, si ou le en *screen* en pe vivan, ki pou dir ou kote ou bis i ete zour ou al lo ou bis. Ki zistans ou bis, konbyen minit ou bis pou ariv lo *bus stop* kot ou ete.

Sa i bann keksoz ki nou pe travay avek e tousala i kout en pe larzan e i enportan ki nou annan sa finansman pou siport sa. Mersi Mr Speaker.

MR DEPUTY SPEAKER

Mersi Mr Vel. Me mon panse ki Onorab ti'n osi demann en kestyon vizavi diferans dan pri ant Seselwa ek etranze. Pou etranze pey en pe pli ser.

MINISTER ANTONY DERJACQUES

Mr Speaker, mersi. Sa i enn bann lide ki mon pou anmenn devan *Cabinet*. PS, ziska lafen Oktob i annan sa, mon'n donn li sa travay pou li fer, pou li devlop sa Polisi. E i enn bann konsiderasyon espesyalman prenon an kont par egzanp lo zil Praslin, bokou touris i servi bis SPTC. Yes, nou pou pran li an kont Mr Speaker, ek Onorab. Mersi.

MR DEPUTY SPEAKER

Mersi Minister. Onorab William.

HON WAVEN WILLIAM

Mersi Mr Speaker. Bonzour tou dimoun ki a lekout. Bonzour Minis avek ou *panel*. Minis dan kad pou ofer solisyon e vwar problemn, mon anvi demann ou si ou Minister avek Gouvernman pa kapab konsider anvoy sa sanzman pri pou Zanvye lannen prosenn. Par lefe ki;-

1) Seselwa in atraver COVID in ganny tape finansyerman e atraver bann

mezir. E mwan mon a demande ki sa i ganny pouse pou lannen prosenn. Ki dimoun la a osi kapab re aziste zot parey Gouvernman pe re aziste zot. E mon ti kontan ki i konsider ki pri i reste R10, menm *week end*.

Mon dezyenm pwen se ki dan ofer solisyon, akoz Gouvernman li menm li i pa kapab li ganny vwar pe ofer solisyon li tousel. Mon anvi demann ou si ou pe osi enkli sektor prive akoz tro bokou letan Gouvernman li i krwar i kapab rezourd tou problemn.

Me dan ka transportasyon piblik, eski nou'n angaze avek sektor prive pou kapab osi balanse e vwar. Akoz Gouvernman ti pe ofer servis.

Me si nou envit sektor Prive pou antre dan servis bis piblik, pou nou kapab annan en konparezon ki finalman demen bomaten Gouvernman i a kapab dir be *ok*, vwala an relasyon avek pri ki sektor prive pe ofer pou Seselwa osi konpran poudir be wi, la i neserer fer pri bis monte a sa nivo.

Alors mon ti a kontan met sa devan Minis pou en larepons. Mersi.

MR DEPUTY SPEAKER

Mersi Onorab. Minister.

MINISTER ANTONY
DERJACQUES

Mersi Mr Speaker. Lo ki staz, si le 01 Oktob ouswa le 01 Zanvyè sa pou ganny enplimante. Minister Finans i annan en *issue* avek Bidze, i annan en *issue* avek depans. Parey zot konnen nou dan kriz ekonomik. La diferans ant enplimant sa proze le 01 Oktob ;- savedir sa R10 dan plas R7.

Si nou met li an plas, Minis Finans pou bezwen sibvant a pepre R27milyon. Me si nou enplimant li le 01 Zanvyè, nou pou bezwen rod R40milyon. Me nou dan en problem kot napa larzan. Nou dan en kriz.

Alors nou pou bezwen komans bann sanzman ase vit e pran bann desizyon ki *challenging*. E avek zot konsantman. Savedir nou oule ki tou dimoun i partisip ladan. Nou anvi bann biznesmenn partisip ladan. Sanmenm nou pou entrodwi sa *cooperate card* e nou pe fer sa lapel ki tou dimoun i form par ladan.

Gouvernman son finans i dan en problem. Sa se son larepons senp. E o pli vit posib ki nou kapab anmenn sanzman ki rezonnab, ki pa kree tro bokou fardo, nou bezwen fer li.

Nou konsernen avek sa pri lavi. Nou konsernen avek sa R3 an plis ki pe ganny met lo sa tiket bis. Selman nou stratezi i bezwen komans en zour.

Dan le pase parey Onorab Woodcock in dir, bann Gouvernman in pran bann desizyon, selman pa'n ganny enplimante. Si nou, nou pran en desizyon, nou vwar ki i annan en gran problem la e nou *keep on postponing*, nou pou vin parey sa bann administrasyon oparavan ki ti napa sa kouraz pou fer li.

Wi, nou pep pou soufer en pe. Selman i annan laklerte, nou konsernen avek sa R3 an plis lo sa tiket bis. Selman le bi se pou redwir kout lavi avek en sistenm ki pli modern avek efikas.

Nou pa kapab reste dan en sityasyon kot nou *stagnant*, kot nou anvoy bann desizyon. La i moman kot tou dimoun i espekte sa sanzman. Pou annan en sakrifis, nou konsernen ek sa sakrifis. Me annou fer li ansanm.

E wi, biznesmenn i bezwen pran par ladan. E mon lans en lapel ankor avek zot. Partisip ladan, donn en sibvansyon zot travayer atraver sa bann *cooperate card*.

I annan bann lorganizasyon parey *STC* pe

pran par ladan, avek en lot lorganizasyon, *SEYPEC*. *SEYPEC* osi pe pran par ladan. Alors annou tou rod en fason pou fer pri lavi desann.

Mr Speaker, *PS* i kapab koz lo sekter piblik, prive avek bann *omnibus*. Mersi.

MR DEPUTY SPEAKER

Sertenman. Mr Andre.

PS PATRICK ANDRE

Mersi Mr Speaker. Bonzour tou bann Onorab. Mon krwar Onorab ki'n anmenn sa pwen devan, i byen ki ou'n anmenn sa pwen akòz Gouvernman li menm li atraver *SPTC* i pa pou kapab rann lapel dan tou sa direksyon ki nou bezwen al ladan, an sa ki konsern servis piblik dan transportasyon.

E nou'n deza angaze avek *omnibus operators*, Lasosyasyon *Omnibus Operators*. I annan en pe letan deza ki i annan en nouvo Polisi ki pou al *Cabinet* tre byento ki pou adres ki mannyer lafason ki operater *omnibus* i kapab antre dan sa sekter pou zot kapab donn en koudmen e partisip ladan.

Leksperyans ki nou'n fer avek *COVID* avek bann *omnibus operators* lannen pase, letan nou ti pran zot *onboard* akòz kapasite *SPTC* pa ti kapab

deservi pou anmenn bann *post secondary* etidyan lekol, nou ti vwar poudir sa korperasyon, sa servis ki bann *omnibus operators* ti anmenn ti enn ki ti a lo oter, ki ti ganny apresye par Minister Ledikasyon avek tou sa bann antite pos segonder.

E nou vwar poudir zot annan sa kapabilite e kapasite pou kapab fer li. I zis en *matter* aprezan ki mannyer nou anmenn zot ansanm *onboard* e ki pli bon planifikasyon ki nou kapab anmennen pou fer li vin pli efikas.

I annan son bann sityasyon teknik ki nou bezwen anmennen, akòz nou pou bezwen kree definitivman en antite ki pou zer sa sekter an antye e osi revwar sa Dekre ki *SPTC* i ganny kontrole anba la e vin avek nouvo regilasyon pou kapab fer sa arive. Mersi Mr Speaker.

MR DEPUTY SPEAKER

Mersi *PS*. Lot entervenans, Onorab Loizeau.

HON NORBERT LOIZEAU

Mersi Mr Chair. Bonzour Minis ek ou delegasyon. Minis dapre repons nou'n vwar zot enterese pou annan sa langazman avek sekter prive dan sa demars pou transpor piblik.

Me eski Gouvernman i annan plan pou revwar Polisi *Omnibus* ek *Public Transport Act* pou permet *Omnibus* kapab fer vini bann bis avek plis *seating capacity* pou kapab permet zot partisip dan anmenn piblik, petet osi i kapab donn dimoun swa osi.

Mon pe demann sa aköz dan en kad legal si sa pa arive, zot pa pou kapab fer sa travay. Mersi.

MR DEPUTY SPEAKER

Mersi Onorab. Minister

MINISTER ANTONY DERJACQUES

Mr Speaker, sa i egzakteman ki nou pe panse. Enn, mon'n donn lenstriksyon PS Andre pou li travay lo sa Polisi. Sa Polisi pou liberaliz transport, *public transport* Sesel avek *private transport* Sesel. Sa i nou bi, ki *alongside* i mars ansanm, nou ava annan en *public system* avek en *private system*. Nou pe pous vit ki nou anvi bann rezilta ase vit.

Parey Onorab Arissol in dir, deza i annan en bis pe deservi Bel Ombre, zot pe pey R10 e nou konnen i efikas, i vit e tou lazournen nou vwar i plen li, toulezour i pe monte desann li.

Alors bann sekter prive osi i annan sa bezwen. Ler Polisi i ganny aksepte, e nou pou prezant sa Polisi avan le 31 Oktob, la i pou vin ankor Minister Transpor ek son bann Departman pou travay lo son bann regilasyon pou anmenn en *Bill* avek en *S.I.* devan *Cabinet* e sa pou vin devan zot. Mersi Mr Speaker, eksepte si PS i annan en komanter ankor lo la.

MR DEPUTY SPEAKER

PS.

PS PATRICK ANDRE

Ou'n fer en mansyon lo sa *issue* kapasite bann bis? Sa ankor Onorab, i an diskisyon avek Lasosyasyon *Omnibus* aköz zot in deza met sa propozisyon devan avek Lotorite Konsernen, e dan sa revizyon *Omnibus Policy* i pou *figure* ladan ki pou ganny prezante avek *Cabinet*.

Me i pou ganny anglobe spesifikman dan ki fason sa i pou antre. I pa pou zis en keksoz ki ouver pou nenport ki fason pou ou fer li, me i pou spesifik pou transportasyon piblik. Mersi Mr Speaker.

MR DEPUTY SPEAKER

Mersi PS. Mon krwar nou bezwen antann pwennvi bann

reprézantan bann dimoun Takamaka. Onorab Mondon.

HON TERENCE MONDON

Mersi Mr Speaker. Bonzour Minis avek ou lekip. Zisteman, mon krwar letan nou pe koz Takamaka, akòz lamazorite nou bann dimoun pe ganny en saler en pe pli ba dan lasosyete. Mon krwar en logmantasyon i tap zot, i pou tap zot bokou.

E se sa pou mwan mon sipòrt sa pwennvi *timing*. Mon krwar nou devret, mwan mon konpran sityasyon, mon konpran sityasyon ki nou bezwen ogmante a en serten pwen. Selman sa *timing* pou mwan i pa apropiye.

Mon krwar nou devret anvoy sa pou lannen prosenn e zisteman nou bezwen eksplor bann lezot opsyon, ki kapab soulaz e permet nou kapab kontinyen soutenir sa group dimoun, sa group travayer ki bezwen pran bis tou le bomaten.

Ler nou pe koz viziter, parey in mansyonnen pli boner, en kantite viziter, touris pe servi nou bis. Nou ti'n devret pe kapab vin ek en opsyon, nou Polisi parey ki i pe dir, avan. Petet nou ti ava kapab konnen konbyen nou kapab gannyen pou soutenir sa group travayer ki bezwen al travay toulezour.

Alors pou mwan Mr Speaker, mon krwar nou devret get bann opsyon e bouz sa *timing* pou lannen prosenn. E fini revwar sa bann opsyon, petet nou a kapab pli byen balans sa pri pou fer sir ki nou travayer Seselwa ki pe ganny en pri pli ba i kapab ganny en soulazman olye kontinyen ganny tape.

Alors mon kestyon Mr Speaker. Eski *SPTC* zot annan en legzersis ki zot in fer, zot annan statistik pou vwar ki kantite touris pe servi nou bis piblik?

Parey in dir Praslin sa nou konnen i *obvious*, zot vwar en kantite. Eski zot in fer en travay lo sa size. Mersi Mr Speaker.

MR DEPUTY SPEAKER

Mersi Onorab. *Minister*.

MINISTER ANTONY DERJACQUES

Mersi Mr Speaker. Gouvernman son lespri i reste touzour ouver. La ki i annan 2 *MNA* ki'n demann lo *timing*, mon a re anmenn *back* kot *Cabinet*, mon a gete ki *Cabinet* i dir.

Mr Speaker, lo touris eski ou kapab les *CEO* Vel reponn.

MR DEPUTY SPEAKER

Sertennman Mr Vel.

CEO PATRICK VEL

Mersi Mr Speaker. Bonzour Onorab. Non, pou reponn ou kestyon, non nou pa konnen egzaktman ki kantite touris ki anbank lo bis. Pou senp rezon ki letan pri bis i reste parey, ou annan en sel kalite tiket i pa fasil pou nou diferansye ki kalite kategori pasaze ki pe *travel* lo bis.

Si tou dimoun ti pe servi kart ti pou bokou pli fasil e sanmenm sa ki avek nou proze kart ki nou pe entrodwi le 01 Oktob i a bokou fasil pou nou ganny statistik.

Pour lemoman nou kapab donn ou tou statistik konsernan bann dimoun kart e bann kliyan ASP. Mersi.

MR DEPUTY SPEAKER

Mersi Mr Vel. Zis pou port a latansyon panel ki nou deza annan bann lenstans kot Air *Seychelles*, *Cat Cocos*, Botanik i annan bann pri diferan ant Seselwa e etranze. Donk i deza annan en model dan pei pou swiv.

Zis pou rapel bann Manm *Order 37(8)*, “*A question shall not be made the pretext for a debate.*” So, annou zis demann nou kestyon, nou konnen sa i en size ki tous zot aköz zot

annan bann *constituent* ki zot reprezante. Me annou zis al avek kestyon pour ki otan Manm i kapab demande. Onorab Pillay.

HON SEBASTIEN PILLAY

Mersi Mr Chairman. Mr Chairman, mwan mon pou swiv ou konsey lo sa ki ou’n dir lo *Standing Orders*, me selman si ou a permet mwan zis pou klarifye en keksoz. Lo nou kote latab nou pe *note* en kantite mesaz, *text* ki pe antre lo sa size. E nou konpran mekontantman dimoun ki pe anvoy sa bann mesaz, nou konpran zot santiman.

Me lo nou kote i paret Gouvernman in fini pran son desizyon, san konsilte person, san konsilte nou *for that matter*. E menm ler propozisyon in vini premye fwa sorti kot Onorab William, Minis in dir li sanzman pou bezwen komans ganny fer i pou bezwen komans *somewhere*.

E la apre ler Onorab Mondon in fer menm propozisyon ki prezan nou pe koz lo retourn kot *Cabinet*, kan Gouvernman in fini anons sa desizyon.

So lo nou kote Mr Chairman, nou pa pou demann Minis kestyon. Aköz zot desizyon in fini ganny pran.

Nou a les ou avek ou desizyon ki'n fini pran, akoz dapre ou sa sanzman i bezwen ganny fer. E nou pa pou antre ankor ladan akoz rezondet ou'n vin fer ou *statement* bomaten, nou ti krwar ou pe vin donn nou plis lenformasyon, me ou'n dir nou poudir ou desizyon in fini ganny pran. So, nou ava vwar kote sa i anmenn nou. Mersi Mr Chairman.

MR DEPUTY SPEAKER

Mon note ki ou fer egzakteman sa ki mon pa'n dir. Konmsi nou pe demann kestyon, nou pa pe fer deba e nou nou'n note silans lopozyon lo sa size. Nou ti pe zis *proceed* avek nou travay. Mon ava envit Onorab Rosie Bistoquet.

HON ROSIE BISTOQUET

Mersi Mr Speaker. Bonzour Mr Speaker, bonzour Minis, bonzour tou bann Manm Onorab.

Minis prenon kont ki nou dan lepidemi *COVID*, kot laplipar en bon pe travayer in perdi zot plas travay. E nou konnen pou dir nou ekonomi i en pti pe dan sonm. Mon santi la i le moman ki nou bezwen partaz nou larises.

Dan en sans kot i annan plis i kapab donn sa ki omwen

vilnerab parey bann dimoun ki servi bis.

Mon propozisyon se ki eski i annan en fason ki sa i kapab ganny sibvansyonnen atraver *fuel*? Par egzanp bann dimoun ki annan loto, bann ki i annan bann transpor komersyal, i kapab petet mon pe mazin apepre en R2 lo sak lit *fuel*, pou sa 3 mwan 4 mwan ki reste ziska Desanm, ki dan en sans sa bann group vilnerab osi ava ganny letan met zot lespri angaz, ki ler in ariv nouvo lannen fiskal zot osi zot kapab kontribye pou fer bis *SPTC* monte.

E an menm tan *SPTC* i ava ganny letan pou li fer plis reform pou li vin pli otosifizan. Mersi.

MR DEPUTY SPEAKER

Mersi Onorab. *Minister*.

MINISTER ANTONY DERJACQUES

Minis Lanplwa ti prezant en papye avek *Cabinet*, dan Sesel pou lemoman, mwan pase lafen Zen ti annan zis 764 apepre travayer ki *registered as unemployed*.

I ti fer resorti avek *Cabinet* osi ki dan dezyenm *quarter*, savedir ant Avril ziska sa trwazyenm mwan ziska sizyenm mwan ti annan apepre

3mil 400 aplikasyon *GOP* pou monte ki i annan en kantite travay dan Sesel.

Le pwen se ki si en dimoun i anvi travay Sesel i annan travay. Se dimoun ki pa ankor ganny en plas bann dimoun ki pa ankor ganny en plas travay ki'n anrezistre la, zot pe rod en travay spesifik.

Presyon i lo Minister Lanplwa pou rod travayer e presyon se pou al an deor Sesel. Savedir Sesel son problem se nou annan plis dyob ki nou annan *unemployed registered* Seselwa.

I napa en dimoun an deor ki anvi en travay ki napa en travay pou li. Tou dimoun i devret tou Seselwa dan en travay.

Nou pran kont ki i annan difikilte pou serten ler pri bis i sorti R7 i vin R10. Me tou fason sa larzan pou pey *SPTC* la sa R90.4 milyon i sorti dan Bidze. E Bidze i sorti dan larzan *tax*.

Savedir olye met larzan dan ledikasyon dan Lasante, dan semen pou fasilite tou dimoun, tou dimoun Sesel nou pe pran larzan *tax* nou pe met dan *SPTC* e nou pa pe les *SPTC* konmans pran sa lepa pou li vin en servis bokou pli modern, pou efikas pli profesyonnel. Nou pe reste dan lepase.

Sesel i bezwen sorti dan lepase. I bezwen vin en pei ki bokou pli modern, ki son bann striktir i adapte, i vin bokou pli efikas.

Nou pep pou reste konman en pep ki ganny kategorize dan nou lespri konman vilnerab si nou pa les zot elaz zot pou zot osi pran sa pa, pou konmans bouz devan, antre dan lanplwa. Rod bann dyob ki donn ou ki anmenn plis kot ou.

Mr Speaker, nou pou pran kont tou bann sizesyon. E *PS* ler i prezant sa Polisi lo transpor piblik, mon pou retourn dan Lasanble, ler nou'n pas atraver *Cabinet* pou prezant pou diskite, pou get bann komantr an plis lo *public transport* isi Sesel, e ki mannyer nou pou bouz devan.

Nou'n vin la, e nou ki'n demande pou vin la pou nou prezant avek zot e pou envit zot aköz nou annan sa 2 mwan ki pe vini pou nou prezant en Polisi e nou pe bouz devan avek en Polisi lafen sa lannen.

E nou envit zot pou pran kontak avek tou zot *constituents* avek piblik e nou pe envit piblik pou partisip dan sa sanzman ki pe vini. Mersi Mr Speaker.

MR DEPUTY SPEAKER

Mersi *Minister*. Mon swete ki bann Manm in sezi lapel ki Minis in fer pou zot retourn kot zot *constituent* e anmas otan lenformasyon pou partaz avek bann Lotorite konsernen.

Lot entervenans nou ava envit Onorab Naddy Zialor Onorab Labonte ou ava met ou pare apre sa.

HON NADDY ZIALOR

Mersi Mr Speaker. Mersi *Minister* e ou lekip. Bonzour tou mon bann koleg. Bonzour Lepep Seselwa.

Minis dan ou premye parti ou prezantasyon ou'n mansyon serten restriktirasyon vizavi *manpower* pou petet ede dan sa lefikasite.

Petet ti ava bon ou dir avek nou a ler aktyel letan ou pe koz *driver*. Mon konnen i annan serten *expatriate* ki pe travay kot *SPTC*. E enn parmi enn bann group sete bann drayver etranze.

A ler aktyel ki *status* sa bann drayver? E si i annan ki ankor pe travay kot *SPTC* ki plan *SPTC* pou ranplas sa group dimoun avek Seselwa? E osi bann lezot departman osi si i annan okenn etranze pou *train* nou Seselwa pou ranplase, sa osi i ava ede pou tir serten kou

lo depans *SPTC*. Mersi Mr Speaker.

MR DEPUTY SPEAKER

Mersi Onorab. *Minister*.

MINISTER ANTONY DERJACQUES

Mersi Mr Speaker. Mon a fer en pti komantr avan mon les *CEO* Vel reponn. Ler nou annan en sistenm stab sektè prive ki pou partisip dan *public transportation*, pou annan bokou plis bezwen pou *drivers* ek travayer. Mersi. Eski Mr Vel i kapab pran *mic*? Mersi.

CEO PATRICK VEL

Mersi Mr Speaker. Mersi Onorab. Onorab zefor pou ranplas sa 16 *expatriate*, i en zefor kontinyel sa, toulezour nou pe sey rode.

E i annan de fason arive pou lemoman nou *still* annan en *shortage of* omwen avek *expatriate* nou *still* annan en *shortage of* omwen 30 drayver.

Dan letan *COVID* nou'n anploy nou en trantenn drayver. E depi lannen in konmanse letan lekonomi in reouver en bon pe in kite pou retourn dan zot travay avan. Savedir i en keksoz ki toultan nou fer de pa devan de pa an aryer.

E lot fason redwir *expatriate* ki ou ganny ou en konpliman zis Seselwa, se redwir grander nou loperasyon. Pou lemoman *SPTC* tou le mwan pe *operate* 550mil kilomet i nou pe fer nou anviron 8mil kours par zour.

E letan nou ava'n kapab avek bann reform bann restriktirasyon ki nou kapab restriktir en pe nou *network then* sa osi i ava en lot fason ki nou pe dir pou nou revwar nou *manpower needs*, pou nou kapab aziste nou *manpower* dapre nou loperasyon. Mersi.

MR DEPUTY SPEAKER

Mersi Mr Vel. Onorab Labonte.

HON ANDY LABONTE

Mersi Mr Speaker. Bonzour Minis avek *panel*, tou bann koleg Onorab e tou dimoun a lekout.

Mr Speaker permet mon avan mon demann mon kestyon, zis pou remerci Minis ek Legzekitiv pou annan sa grander lespri pou retourn kot pep Seselwa, pou vin demann nou en pe nou pwennvi lo la.

Akoz vi ki nou bann reprezantan, alor i montre ou poudir nou Gouvernman i ekoute ler lepep i koze, e se pou se la rezon ozordi sa dyalog i annan konpare avek sa ki

Onorab Lopoziyon in dir ki zot, zot pou reste trankil.

Be nou, nou bezwen dir, nou bezwen koze ler nou pep i annan en keksoz pou ki zot en pe mekontan. Alor nou bezwen debat pou zot drwa, akoz se pou se la rezon ki nou'n ganny anvoye pou sa.

Alor mon kestyon i baze lo sa 10poursan, nou'n ganny dir poudir i annan en 10poursan ki pe ganny perdi. E *CEO* in sey eksplik sa.

Petet mon pe demande si zot pa ti kapab fer sa kad vin mandatwar. Si i mandatwar i ava dan en faon ki nou ava obliz ki *SPTC* i ava fer sir poudir tou larzan ki merit ganny anmase i ava anmase.

Aprè pli gro konsern nou *constituent* ki ler nou'n koz avek zot, se *in regards to* sa R15. Konmsi ou pe sey demande pou ki rezon i R15 Dimans, eski Dimans *fuel* i pli ser? Konmsi pou ki rezon si zot kapab donn en leksplikasyon, akoz ki R15 i Dimans? Akoz Dimans i annan dimoun ki al *fellowship* ki zot servi bis.

So akoz ki zot in met sa kou R15, petet si nou pa kapab redwir sa? Aprè i annan *in regards to* touris ki'n ganny dir. Si nou pa kapab rod en fason ler ki kart i vin mandatwar pou fer sir ki touris li i pey bokou pli

o. Koumsa ki *taxi drivers* i ava ganny en pe plis biznes lo sa kote koumsa. Mersi.

MR DEPUTY SPEAKER

Mersi Onorab.

MINISTER ANTONY DERJACQUES

Mersi Mr Speaker. Eski CEO Vel i kapab reponn?

MR DEPUTY SPEAKER

Mersi. Mr Vel.

CEO PATRICK VEL

Mersi Mr Speaker mersi Onorab. An se ki konsern kart wi nou ti ava voudre ki kart i 100poursan. Me selman kart dan li menm i pa pou rezourd tou problem.

Sanmenm sa ki nou ensiste ki menm avek ou kart ou ganny ou tiket. E ou tiket i ou resi. I annan en kantite lavantaz. Akoz si ou napa en tiket ou dan bis ou pa pe ganny rekonnnet, demen i ariv en keksoz menm lasirans pa kouver ou.

Savedir kantmenm nou pou annan kart e Gouvernman pe ankouraze ki piblik i servi kart pa fer pri diferan pou *cash*. I enportan ki ou kontinyelman gard ou tiket.

Pri tiket Dimans e parey Minis in eksplike, kou zis

loperasyon pou *breakeven* toulezour pri tiket i devret environ R14. E pri tiket lafason ki nou kalkile i baze lo ou depans avek ou kantite pasaze ki ou anmennen.

Dimans ou *load* i desann bokou plis. Me selman nou *network* i apepre 80poursan 70 a 80poursan ki nou fer dan lasemenn. Savedir en pri tiket Dimans en vre pri tiket Dimans pou *breakeven* i apepre R20. E sanmenm sa ki dan sa papye in ganny konsidere ki laplipar dimoun pa pe travay Dimans e bi prensipal SPTC se anmenn travayer.

Alors kekfw a i parey in ganny dir osi i annan en bon pe etranze ki pe *travel* Dimans. Bann dimoun laplipar bann dimoun aze i deza pe benefisyen en pli bis avek ASP, ki zot pa pey tiket.

E bann dimoun ki al travay i annan en *Scheme* ki pe travay lo la pou bann travayer esansyel ki zot osi zot kapab benefisyen ki pri pou zot Dimans i pa ogmante. Mersi Onorab.

MR DEPUTY SPEAKER

Mersi Mr Vel. Onorab Hoareau. Permet li ganny mikro silvouple.

HON JOHN HOAREAU

Mersi Mr Speaker. Bonzour tou dimoun. Mr Speaker avek lanons ki *IMF* pa tro, tro satisfè avek bann zafer sibvansyon, pou bann konpanyen ki pe *operate* anba Gouvernman.

Alor mwan mon pe demande kan ki *SPTC* oubyen si i annan program, pou anmenn en pe plis dizon bann bis elektrik, ki nou ava kapab vwar petet en amelyorasyon lo lakantite larzan ki ganny servi dan son *operational cost* pou li pey bennzin?

Dezyenmman Mr Speaker, an vi ki bokou fwa ou vwar ki *cost* pou fer vii bann pyes i en konponan ase pertinan dan zot loperasyon, eski *SPTC* pe travay avek dizon *SIT* oubyen bann lekol ki nou annan pou devlop skil bann zenn pou fer zot kapab fer bokou en pe plis *methodology* pou fer en pe plis bann masin oubyen bann konponan masin lokalman? Mersi.

MR DEPUTY SPEAKER

Mersi Onorab. *Panel*.

MINISTER ANTONY DERJACQUES

Mersi Mr Speaker. Eski *PS Andrei* kapab reponn.

MR DEPUTY SPEAKER

Wi *PS Andre*.

PS PATRICK ANDRE

Mersi Onorab pou ou kestyon. Wi nou deza pe konsidere pou anmenn bann bis elektrik pou ganny konsidere, e sa i atraver bann diskisyon ki deza an plas atraver avek Minister *Foreign Affairs* pou nou kapab negosye avek en pei ki pou kapab ed nou dan sa direksyon.

Me keksoz ki enportan ki nou bezwen realize avek bis elektrik, i osi pou kontinyen anmenn en fardo lo *PUC*, akoz si ou pe servi elektrisite pou sarz bann bis i osi annan en lenplikasyon.

Me sa nou pe deza nou'n deza fini angaze atraver en proze anba avek *GF* pou fer en letid pou vwar son lenplikasyon ki bis elektrik e veikil elektrik an zeneral ki lenplikasyon ki i annan ki mannyer i pou anmenn benefis oubyen *this benefit* dan sa bann direksyon.

E en proze ki pe konmanse mwan prosen avek *GEF* ki en proze ki en pou etal *over three years* e me selman nou pou annan bann rapor ki pou kapab ed nou ki mannyer nou pou kapab al an avan avek nouvo teknolozi.

Me i osi enportan pou note si nou pa ganny bann don, bis elektrik li menm li son kou *out* i

vreman eleve konpare avek bann bis normal ki *fuel*.

Me selman direksyon ki Gouvernman i pe al ladan ki'n deza konmanse se ki nou bezwen redwir nou kar bann *emission* atraver veikil aköz i *area* kot pe pli polye nou lanvironnman isi Sesel. Mersi.

MR DEPUTY SPEAKER

Mersi PS. Onorab Roucou.

HON MICHEL ROUCOU

Mersi Mr Chair. Bonzour Minis, PS ek CEO. Bonzour spesyal zabitan Mont Fleuri. Minis mon pa konnen si ou annan sa lenformasyon ek ou. Konbyen bann travayer etranze ki travay SPTC, pe kout SPTC?

E osi eski SPTC pe mazine pou fer en *Scheme*, pou bann drayver ki pa anploye avek zot ki zot kapab vin donn sa servis lo en nivo *part time*? Mersi.

MR DEPUTY SPEAKER

Mersi Onorab. Mon ti ava zis demann *panel* pou not kestyon letan zot pe reponn Onorab Roucou osi note ki Onorab Hoareau avan ti'n demann en *Scheme* avek *SIT* ki bann etidyan i kapab aprann fer bann konponan bann pyes lokal pou zot reponn sa kestyon ki pa ti'n reponn avan. Mersi.

MINISTER

ANTONY

DERJACQUES

Mr Speaker zis mon ava note ki CEO Vel in dir nou ki anfe a sa moman la i annan plas pou 30 travayer pou 30 *drivers SPTC*, Mr Vel.

CEO PATRICK VEL

Wi Mr Speaker Onorab mon ava sey adres sa lot bout kestyon Onorab Hoareau konsernan pyes.

Onorab enn nou bann pli gran *partner* se *SIT*. E laplipar zot bann etidyan dan ki pe fer kour mekanikal, i vin kot nou pou zot bann leksperyans travay e pas en pe letan avek nou.

I annan ki menm in reste in grandi pou pran bann pozisyon *management* dan SPTC. Me selman i *still* en *challenge* pou nou kapab ganny zot pou vin plis.

E se pou kwa pou reponn dezyenm kestyon ki nou annan pli gran konpleman etranze dan SPTC i travay dan nou *workshop*. Kot nou annan apepre 80 etranze ki fer apepre en 15poursan nou *workforce*.

Savedir apepre 10poursan 10 a 15 poursan nou saler i pou sa bann etranze aköz zot, zot ganny peye en saler ase rezonnab.

An sa ki konsern bann lezot drayver nou annan en *Scheme* pou *part time drivers*, nou annan detrwa *part time drivers* e zot bezwen fer omwen 25 erdtan par semenn e sa nou ankouraz otan ki posibil pou nou ganny *part time drivers*.

Sityasyon ki'n arive, sa de dernyen lannen avek ki nou'n redwir en pe bann larout avek *COVID*, letan ti dan restriksyon la ki nou pe retourn normal ankor. E nou ti'n tenir en pe nou *part time drivers*, akoz nou *complement drivers* i ase enkli sa bann etranze.

E la ki nou pou depans si nou kontinyen grandi nou larout, oubyen dan nou papye nou'n dir, nou pe aziste nou larout e nou pou bezwen revwar ki kantite *part time divers* nou pou bezwen. Mersi.

MR DEPUTY SPEAKER

Mersi Mr Vel. Nou annan nou en dernyen entervenans dapre mon lalis, wi savedir nou'n fer byen nou letan. Onorab Adelaide. Baie Lazare i osi lwen avek Victoria nou oule tann zot pwennvi.

HON FRANCOIS ADELAIDE

Mersi Mr Speaker. Bonzour Minis avek ou delegasyon. Bonzour tou dimoun ki a lekout. E wi Baie Lazare i osi i

pe anmenn son sipor pou ki *timing* pa bon. E nou pou bezwen pouse en pe pli tar.

Minis mwan mon annan de kestyon pou mon demann ou. *In regards to* gaspiyaz. *SPTC* tou kou nou'n tande ki larzan i perdi, i mank larzan i mank larzan.

Eski ler ou'n vini ou'n vwar bann papye *investigation* lo sa bann larzan ki'n kontinyelman perdi? E petet si ou kapab dir nou si ou kapab dir nou ki ou'n trouve, si ou'n trouve, ki ou'n trouve akoz de lannen de lannen en ta milyon in perdi, e Seselwa ki bezwen pey lepokase.

Eski i annan dimoun ki'n ganny *accountable* pou tou sa bann larzan ki'n perdi? Sa i mon premye kestyon.

Mon dezyenm kestyon Minis mon'n aprann avek bann travayer *SPTC* ki i annan en *workshop* ki i annan bann pyes ki *SPTC* i fer vini e zanmen sa bann pyes i servi. Pyes i ganny peye larzan i ale, me solman sa bann pyes zanmen i ganny servi.

So eski ou okouran poudir i annan sa looperasyon? E petet Mr Vel ou kapab dir nou si ou konnen. E ki zot pe fer pou fer sir ki sa bann labi pa kontinyen, e ki ler nou fer vini pyes nou fer vini sa *right* pyes e

ki i servi pou amelyorasyon bis e ki nou pa vwar nou bezwen pey bann kou ekstra pou nou kapab fer *SPTC* bouze. Mersi.

MR DEPUTY SPEAKER

Mersi Onorab. *Panel*.

MINISTER ANTONY DERJACQUES

Mersi Mr Speaker. Mr Speaker pli gran *waste* ki nou annan se sa bann pri tiket ki pa ganny kolekte. E pou sa rezon ki sa *cashless card* pe ganny propoze savedir si ou pey atraver ou kart ou pey R10. Si ou kontinyen anvi pey *cash* ou pey R12.

Sa i pou re anfersi sa prensip ki nou bezwen al *cashless*. An menm tan mon'n koz avek *Board* lo bann lot mekanizm pou fer sir ki napa okenn koripsyon *SPTC*.

E i annan bann sanzman dan *IT* e ki en sistenm *financial managment* ki *Board* ki'n koz ek mwan lo la, in ganny entrodwir kot *SPTC*, e *Board* in raport ek mon ki sistenm i vin bokou pli efikas.

Si i annan okenn *investigation* o profon dan en *SOE* savedir en *State-owned enterprise* parey *SPTC*, sa i travay osi kot Minister i demann *PEMC* antre ladan - *Public Enterprise Monitoring*.

E zot, zot pou fer sa travay. E annefe se dan zot rapor ki in ed nou pou refer sa proze ki nou pe diskite avek zot kot son *CEO* ki'n fer rapor lo okenn inefikasite ki'n vwar kot *SPTC*.

E Finans, Transpor, *SPTC* avek *PEMC* nou'n vin ansanm. E se nou le tou le 4 ansanm atraver transpor. E nou ki'n anmenn sa proze devan *Cabinet* pou nou minimiz okenn koripsyon dan *SPTC*.

E pli gran problem ki nou pe *tackle* imedyatman se sa zafer *cashless* pou fer sir ki nou al *cashless*. Nou servi kart pou pey tiket e nou aret perdi 10poursan ki apepre R20 milyon par an.

E nou alor an menm tan vin bokou pli modern efikas profesyonnel.

Mr Speaker nou ava koz ek *PEMC* e *PEMC* si i oule Mr Tirant, i reanvoy sa rapor drwat kot ou ava vwar ki Gouvernman pe sey fer pou fer sir ki pa zis *SPTC* met tou bann *SOEs* ki travay avek disiplin fiskal avek efikasite avek mwens koripsyon ki pou posib.

Mr Speaker dezyenm parti lo *workshop* e *spare parts*, parey Onorab in demande eski *CEO* Vel i kapab reponn?

MR DEPUTY SPEAKER

Wi *CEO* Vel.

CEO PATRICK VEL

Mersi Mr Speaker. Mersi Onorab. Onorab enn bann fason pou ou kapab annan en servis ase efikas, donn en bon servis piblik se ki fodre ou bis i kontinyelman lo semen.

E pou ou kapab ou bis lo semen, se ou bezwen annan kapab pas mwens letan dan *workshop*. E ki ou annan ase pyes pou ou kapab kan i ariv en problemn pou ranplas li. *Fleet SPTC* i en vye *fleet*. Dernyen fwa nou ti ganny bis ti 3an pase bis nef.

E *on average* pou *fleet* i apepre 12an/15an laz. E ki nou dir poudir en laz optimal se sipoze apepre 10an maksimonm. Sa enn.

Dezyenm tou pyes ki ganny *order* ki dan stok i ganny *order* par bann enzenyer zot menm, bann teknisyen ki fer zot lalis pyes ki apre sa i ganny *order*.

E wi ou pou annan bann pyes ki la 1an, i annan ler ki pyes i kapab reste 6 mwan ou pa ganny okenn problemn. Par egzanp tou dernyenrer nou pe ganny en bon pe problemn avek fren kriye. E en sel kou ou ganny bis frer i konmans kriye e nou vwar nou poudir tou pyes ki nou annan i ganny servi i fini.

E menm nou bezwen ennler *air freight* ki bokou ki efikas bokou pli ser.

Savedir ou bezwen toultan annan en balans stok pyes ki la pou an ka i annan problemn.

Lot fason osi ki pyes i kapab reste en bon pe letan. I annan ka ki'n arive dan lepase ki model bis in ganny sanze. E ou annan en stok pyes pou en vye model ki i la.

E sa par egzanp la konmela nou pe fer laranzman i annan en pe pyes ki nou pe fer laranzman avek lakonpanyen *TATA* pou gete si nou kapab re eksport kot zot aköz model bis in sanze, nou annan sa pyes dan stok. Mersi.

MR DEPUTY SPEAKER

Mersi *CEO*. Malerezman Onorab nou'n ariv zis 10er edmi mon pa pou *allow* siplemanter ankor lo la. Mon krwar nou ava remerci *panel* pou prezan avek nou bomaten mon krwar i annan en konversasyon enteresan.

Kot i annan bann propozisyon konkret ki'n sorti *from the floor of the National Assembly* kot, Minis in envit Lasanble Nasyonal pou fer serten travay e sekter prive in ganny mansyonnen, donk a konversasyon i pou ale ziska an

Oktoab kan *Cabinet* i ava kapab pran desizyon final lo la.

Donk in en konversasyon enteresan pou vin dan Lasanble. Mersi Minis Derjaques, mersi PS Andre e CEO Vel pou zot prezans avek nou ozordi.

Donk nou ava demande pou nou retourn dan Staz Lasanble. Nou kapab eskiz zot parmi nou.

(MINISTER DERJACQUES AND HIS DELEGATION WAS EXCUSED FROM THE HOUSE)

MR DEPUTY SPEAKER

Panel in en pe prese pou kit nou aköz nou ti pou fer en sel leve pou nou al nou *break*, nou pou rezwenn 11er bomaten.

(BREAK)

MR SPEAKER

Bonzour tou dimoun. Nou pe pran *Second Reading Employment (Amendment) Bill 2021*, nou bezwen pran Mosyon pou *waive 7 days notice*. LGB ou ava prezant Mosyon.

HON BERNARD GEORGES

Mersi Mr Speaker. Mr Speaker anba *order 97 (1)* nou *Standing Orders* e avek ou permisyon mon pe *move* pou sispann *order 69 (1)* dan en fason ki i ava

permet ki *The Employment (Amendment) Bill, 2021* ava ganny lir en Dezyenm Fwa, malgre ki sa peryod 7 zour ki nou *Standing Orders* i demande pa ankor pase. Mersi.

MR SPEAKER

Mersi. Mon ava ganny *secondment* silvouple? Onorab Sandy Arissol

HON SANDY ARISSOL

Mr Speaker bonzour. Mosyon ganny segonde. Mersi.

MR SPEAKER

Mersi nou ava pran vot lo Mosyon pou *waive Second Reading*. Manm ki an faver lev lanmen silvouple? Mersi, Manm ki kont. Madanm Clerk ou annan en kont?

Lo Mosyon pou *waive 7 days requirement* pou *Second Reading of Employment (Amendment) Bill, 2021*, 17 Manm in vot pour 0 kont e 10 in *abstain*.

Dan sa ka nou in *order* prosede madanm ou ava apel Minis pou sa *Bill*. Bonzour Minis Patricia Francourt. Minis pou Lanplwa e Zafer Sosyal e delegasyon zofisye Mr Jules Baker PS pou Lanplwa, Mr Steve Monnaie Direkter Zeneral pou *Labour Relations*, Mrs Irene Sirame *Legal Draftsperson*.

Byenveni pou nou pou travay avek nou lo sa *Bill*. Mon ava demann *LGB* pou prezant Mosyon pou *Second Reading* silvouple.

HON BERNARD GEORGES

Mersi Mr Speaker. Mr Speaker anba *order 69 (2)* nou *Standing Orders*, mon *move* ki *Employment (Amendment) Bill 2021*, i ganny lir en Dezyenm Fwa. Mersi.

MR SPEAKER

Mersi. E la nou pare pou Minis fer prezantasyon son *Bill*. Nou ava ganny segonnman silvouple? Wi?

HON SANDY ARISSOL

Mersi Mr Speaker. Bonzour Minis avek ou delegasyon. Mr Speaker Mosyon i ganny segonde.

MR SPEAKER

Mersi. Mosyon i ganny segonde. Minis *carry on*.

MINISTER PATRICIA FRANCOURT

Mersi Mr Speaker. Bonzour Mr Speaker. E bonzour tou Manm Onorab e tou bann manm piblik ki a lekout bonzour.

Mr Speaker mon pe in devan Lasanble Nasyonal ozordi pou prezant en

lamannman lo Prozedlwa pou Lalwa Lanplwa, pou permet serten sanzman lo fason ki benefis travay i ganny distribye apre lanmor en travayer.

Avan mon donn detay lo sa lamannman permet mon donn en revè lo sityasyon aktyel. Lalwa Lanplwa 1995 i dir ki konpansasyon i bezwen ganny peye letan en travayer i mor.

Pandan ki in dan lanplwa pou mwens ki 5an dan servis kontinyel.

Prosedir pou distribye benefis, i pa ganny etabli dan Lalwa Lanplwa. Eksepte ou travayer ki travay lo *outer islands*. Dan ka sa travayer ki travay lo zil, Lalwa i fer provizyon pou ki tou saler e tou propriyete ki pou sa travayer, i bezwen ganny donneren avek zofisye Departman Lanplwa.

Sa i pou permet distribye avek zeritye dapre regilasyon lo kondisyon travay. Pou lezot travayer malgre Lalwa pa fer provizyon, sa pratik ti ganny entrodwir en bon pe letan pase pou fasilite distribisyon benefis lanmor dan en fason ekitab avek zeritye legal.

Sa ti akoz sa letan ti napa bokou Avoka e prosedir pou administre leritaz i en prosedir ase konpleks.

Dan lapratik aktyel, anlwayer i soumet tou benefis

travay swivan lanmor sa travayer kot Departman Lanplwa, ki avek lasistans Biro *Attorney Zeneral* i distribye sa bann benefis dan fason ki Kod Sivil i endike.

Pou note ki dan sirkonstans lanmor en travayer sa relasyon travay ant li ek son anplwayer i terminen. Alor napa okenn baz legal pou lentervansyon Departman Lanplwa e *Attorney Zeneral*.

An plis sa i kree bann defi legal aköz laplipar ditan sa dimoun ki'n vin reklanm benefis, i pa en zeritye legal e letan son demann i ganny refize i kree detres emosyonnel.

Mr Speaker, fodre note ki Departman Lanplwa napa fason idantifye tou bann zeritye potansyel. Malgre deklarasyon ki afidavit ki agree pou pa pourswiv Departman Lanplwa i touzour annan en danze.

Sa se legzistans en zeritye lezitim ki pa'n ganny mansyonnen dan afidavit e ki vin devan apre ki benefis in fini ganny distribye.

Dan sa ka, Departman Lanplwa pa kapab egzekit son demann. I annan osi ka kot en etranze ki mor letan i dan lanplwa Sesel. Menm si i annan benefis Lanplwa, napa prosedir pou peyman benefis avek

zeritye ki pe reste dan en pei etranze.

Sa i vin pli konplike aköz i pou depan lo Lalwa ki aplike dan son pei.

Mr Speaker sa Prozedlwa pou lamannman Lanplwa 1995, i annan bi pou permet en travayer fer en deklarasyon an ekrir pou dir avek lekel dimoun son bann benefis pou ganny distribye avek. Sa i kapab en dimoun ou plizyer dimoun ki sa travayer i, idantifye dan son deklarasyon an ekrir.

Sa lamannman Mr Speaker i pe ganny propoze a en moman kot plis laliberte pe ganny donner avek bann endividi pou pran desizyon konsernan zot propriyete anliny avek lespri nouvo Kod Sivil.

Mr Speaker permet mon aprezan donn detay sa propozisyon. Sa deklarasyon ki pe ganny entrodwir, i pou permet en travayer swazir en benefisyer ki pou benefis benefisyer avek tou ouswa en parti son bann benefis lanplwa, dan lenstans ki i mor ler i ankor dan lanplwa.

Sa Lalwa osi pou permet li sanz son deklarasyon a nenport ki moman pandan ki i dan lanplwa si i anvi fer sanzman dimoun ki i pe benefisyer an ka son lanmor.

Ler en travayer ki'n fer sa deklarasyon i mor, anplwayer pou bezwen pey benefisyer ki sa travayer in deklare. Bann benefis Lanplwa a kondisyon ki i pou lanmor sa travayer e legalman pou son prop lidantite osi.

Si i annan plizyer dimoun ki'n ganny mete koman benefisyer, benefis i bezwen ganny partaze dapre proporsyon ki travayer in endike dan son deklarasyon.

Si travayer pa ti'n spesifye okenn proporsyon dan son deklarasyon alors son benefis i bezwen ganny partaze egalman. En deklarasyon i bezwen ganny fer dan en form spesifik ki pou ganny preskrir. Sa travayer i bezwen siny sa deklarasyon, oubyen met en mark lo la dan prezans en dimoun otorize ki kapab anplwayer, en noter, oubyen en Avoka.

Si sa travayer i annan en dezabilite fizik, sa deklarasyon i bezwen ganny lir avek li. Apre ki sa travayer pou bezwen deklar son lagreman avek sa deklarasyon dan prezans sa dimoun otorize e osi en temwen.

Ler en anplwayer i resevwar en deklarasyon i annan lobligasyon pou donn travayer en dokiman ki pou ki in resevwar.

Anplwayer i bezwen gard sa deklarasyon e rikord lenformasyon, ki ladan dan en rezis spesifik.

Anplwayer i annan responsabilite pou gard azour sa rezis avek okenn sanzman dan deklarasyon ki'n ganny fer par okenn travayer a nenport ki moman ki zot dan son lanplwa.

Ler travayer i kit son lanplwa e i rekonmans avek en lot anplwayer, sa travayer i bezwen refer son deklarasyon a nouvo. Rezis deklarasyon e okenn sanzman ki kapab ganny konserv dan en *database*, me i bezwen annan posibilite prodwir kopi papye kan i neserer.

Anplwayer ki pa gard sa rezis san en leksplikasyon rezonnab, i komet en lofans e si i ganny trouve koupab i kapab fer fas ek en lanmann ziske R20mil.

En travayer i pou bezwen pran son responsabilite e fer sir ki i fer son deklarasyon avek son anplwayer.

Si benefisyer i mor avan travayer e i ariv ki sa travayer i mor avan i fer en nouvo deklarasyon, bann benefis pou form par eritaz sa travayer.

Peyman benefis avek benefisyer pa anpes en lot dimoun ki krwar i annan drwa

ganny sa bann benefis, pou al reklanm parey nou dir *claim* zot avek zot benefisyer.

Si benefisyer pa reklanm *benefits* dan en peryod 2an apre ki travayer in mor, anplwayer pou bezwen transmet sa benefis avek leta ziska ler sa benefis i ganny reklanmen par en benefisyer.

Mr Speaker konsiltasyon lo nivo Nasyonal lo posibilite ki Gouvernman i aret fer distribisyon benefis travayer benefis travay eskize, swivan lanmor en travayer i ganny fer.

Lorganizasyon tel ki Linyon Travayer e Lasosyasyon bann anplwayer ti ganny konsilte lo sa size.

Gouvernman in fer son mye pou pran an kont bann konsern ki'n ganny met devan.

Mon swe se ki tou parti i satisfè ek propozisyon final. Ledikasyon piblik pou osi ganny fer lemoman sa lamannman i ganny aprouve.

Mr Speaker mon rekomande ki Lasanble Nasyonal i aprouv sa Prozedlwa ki pe revwar partaz benefis travay swivan lanmor travayer osi byen ki son prosedir. Mersi Mr Speaker.

MR SPEAKER

Mersi Minis. Nou ava pran deba lo sa *Bill*. E nou ava

konmans avek Onorab John Hoareau.

HON JOHN HOAREAU

Mersi Mr Speaker. Bonzour Mr Speaker. Bonzour Minis ek ou lekip. Bonzour tou leres dimoun ki a lekout.

A mon lavi *Employment Act* i en *Act* tre aktif dan lesans ki parmi bann *Act* i parmi bann ki ganny plis amande souvandfwa par bann Prozedlwa ki ganny anmennen dan Lasanble. E osi atraver bann lamannman ki nou appel bann *delegated legislations* ki osi ganny apele bann *S.I.*

Degre in annan bokou bann *piecemeal amendments* avek sa *Act* sa *original Act*. I menm annan propozisyon pou ki en nouvo *comprehensive Bill* i ganny fer pou ranplas sa ki deza la.

Setfwasi sa *Bill* pe vin avek serten lirzans pou koriz serten anomali. E anomali ki'n ganny site par Minis, se ki ozordi napa en baz legal - okenn baz legal lo lafason ki bann benefis i ganny partaze ler en dimoun i mor dan lanplwa e i kit deryer.

Dan lapratik parey in ganny dir souvandfwa ki ou bezwen fer se ki zofisye Lanplwa i bezwen kontakte fanmir e fer sir ki en fanmir i apwent en egzekiter, e atraver *Attorney*

Zeneral sa bann benefis i ganny donnen avek son bann *heirs*.

E sa i enkli plizyer benefis ki kapab larzan konze, saler, konpansasyon e lezot *allowances* ki *due*.

Mr Speaker sa legzersis in souvandfwa en legzersis en pe difisil pou bann travayer Lanplwa akoz i annan bokou largiman ki leve lekel ki devret gannyen, lekel ki pa devret gannyen e akoz serten in gannyen en serten pa'n gannyen, atraver sa sistenm ler ou apwent egzekiter.

E menm parfwa osi i difisil pou idantifye lekel sa bann dimoun kote zot ete, ki bor ou pou ki mannyer pou kapab donn sa larzan oubyen sa bann benefis, avek zot dan en fason ekitab.

Alor Mr Speaker an prenon kont osi, logmantasyon lanmor an se moman bann dimoun ki dan laz aktiv ki dan laz lanplwa, ki relye sirtou avek *COVID-19*, i souvandfwa arive ki sa bann dimoun ki mor zot pa'n zot mor en laz ki zot pa'n espekte e in ariv sitan vit.

E zot pa ankor zanmen fer *Will* pou kapab konnen ki fason pou *dispose* zot bann benefis oubyen zot bann larzan ki zot annan oubyen zot keksoz personnel.

Alor sa *Bill* i pe met en serten lord dan sa keksoz. I pe fer sir ki sa bann dimoun ki anlplwaye ki dan lanplwa, i fer en deklarasyon kot zot nonm zot bann benefisyer e answit zot bann benefisyer apre zot lanmor i kapab kolekte sa benefis. I ganny kontakte pou kolekte sa benefis.

Mr Speaker avek sa lamannman parey mon'n dir en anlplwayer pou bezwen ranpli en form pou fer son deklarasyon, e sa i ganny trouve en pti pe anliny avek Kod Sivil. Akoz ki nou pe promouvwar dan Kod Sivil, nou pe promouvwar sa responsabilite ki tou dimoun i bezwen annan, pou fer sir ki zour i kit sa *monde* napa lager apre li lekel ki pou ganny isi lekel ki pou ganny laba. Akoz i annan sa ki nou apel sa *testamentary freedom*.

Kot ozordi zour ou kapab nenport ki laz ou ete al kot en Avoka e fer en *Will* e dir ki ou pou donnen ki fason ou pou partaz nenport ki ou bann keksoz ki ou annan.

So nou pe get li dan sa laliny koumsa ki demen napa okenn konfizyon apre ki en dimoun i kit sa *monde*.

Alor i fer mwan en gran plezir pou mon sipor sa *Bill*

akoz mon konnen i pe al dan en bon direksyon.

Mr Speaker an menm tan mon ti ava kontan ki ler Minis i fer son larepons i koz en pti pe lo size, si i pou annan en serten dele letan apre ki sa dimoun i mor ki lanplwa i bezwen kontakte li.

Mon konnen in nonm 2an si i pa vin fer sa si i pa vin kolekte sa keksoz sa keksoz i retourn pou Leta. Me selman apre lanmor sa dimoun kekfwa sa benefisyer i pa konnen si li i en benefisyer.

Alor eski i annan en serten letan ki Minis i krwar i devret ganny enskri dan Lalwa, pou ki sa dimoun i ganny kontakte ? E si i annan serten dele letan mon ti ava voudre i konsider bann provizyon ki dan Kod Sivil kot i donn ou 14 zour apre lanmor pou ouver en *Will*.

Akoz si i annan okenn kontestasyon ant sa ki dan en *Will* avek sa ki sa benefisyer i sipoze gannyen, *therefore* sa bann keksoz a sa moman i donn ase letan ki sa bann keksoz i kapab ganny met o kler.

E si pou annan en ka pou anmenn devan Lakour pou kapab gete lekel ki pou ganny tel keksoz i kapab ganny fer.

Akoz san fwa i kapab kree en konfizyon si avan *Will* i ouver

benefisyer in ganny dir en keksoz, in ganny mete lo en lo rikord poudir i pou ganny tel keksoz. Me selman *Will* li i dir poudir tou keksoz sa dimoun pou ganny donner a en lot dimoun.

So i kapab annan en serten largiman lo sa pwen ki fer li an kontrayete.

So pou keksoz mars en pe pli byen, avan sa dimoun i ganny menm letan avan, avan sa dimoun i kapab kolekte sa benefis i vin- i tonm dan letan ki sa 14 zour ki ler tou keksoz in fini ganny met annord lo kote son *Will* avek sa.

Parey in ganny dir Mr Speaker mon krwar poudir i tre enportan ki dimoun i konpran ki dan Lalwa ozordi si par egzanp en *domestic worker* i mor lo zil, i fer provizyon ki son bann benefis i ganny donner a en *competent officer*. E sa i dan *part 6 section 25 of the Employment Act*.

Me *once* ki sa bout Lalwa i vin an pratik i ganny pase par Lasanble i pou *superimpose* tou sa bann lezot bout dan Lalwa kot pou koriz sa bann anomali kot *competent officer* i ganny lotorizasyon pou kolekte bann byen e apre distribye.

Alor Mr Speaker mon krwar sa *Bill* i enn ki pe al dan bon direksyon e i pou koriz en

kantite lerer e mon pou sipor sa *Bill*. Mersi.

MR SPEAKER

Mersi Onorab. Onorab Uranie.

HON ROCKY URANIE

Mersi Mr Speaker. Bonzour Minis avek ou *panel*, bonzour tou Manm Lasanble.

Mr Speaker sa *Bill* i tre enportan pou donn swa en travayer en dimoun ki'n donn son kouraz ki'n anmas son larzan ki i annan son benefis, pou li annan sa swa pou li pran desizyon lekel ki i krwar i santi i merit son benefis.

Plizyer fwa mon'n koz avek plizyer zonm ek bann madanm ki'n toultan koz lo sa size, zot in toultan krwar ki zot devret kapab dir pou ki, ki zot anvi zot benefis i ganny donner atraver en deklarasyon ler zot ankor vivan, pou ki ler zot mor napa person ki bezwen al lager zot bann benefis kot nou'n vwar plizyer fwa arive.

Dan ka kot en travayer i santi k ii anvi plis ki en zeritye, i annan tou drwa fer li. Si sa travayer pa anvi donn son zeritye son benefis i osi annan tou drwa fer li.

E alors Mr Speaker pou mwan sa *Bill* i *straight forward* nou pou donn mon sipor. Sa *Bill* pou rezourd bokou

problenm ek retar ki abitye arive dan demars pou sa ki merit ganny zot benefis, a finalman napa sa gran konfizyon e traka ganny sa merit. Mersi Mr Speaker.

MR SPEAKER

Mersi Onorab. Onorab Cosgrow.

HON WALLACE COSGROW

Mersi Mr Speaker. Bonzour Mr Speaker. Bonzour Minis avek ou *panel*. Mr Speaker parey Minis in dir seksyon 62 (a)3 Lalwa Lanplwa 1995, i fer provizyon ki en travayer ki desede apre ki in fer pa mwens ki 5an servis, i ganny peye son konpansasyon ek bann lezot *legal dues* avek son *legal representative*.

Sa provizyon i labaz sa lamannman ki devan nou Lasanble ozordi.

Mon pe prezimen ki i annan serten problenm avek laplikasyon sa provizyon, ki nesesit sa lamannman dan Lalwa malgre kantite lannen ki sa in an aplikasyon.

Si mon memwar i servi mwan byen, lafason ki sa seksyon Lalwa ti pe ganny enplimante, i se ki ler en travayer i deside, *claim* i ganny fer kot Departman Lanplwa par reprezantan.

E detay tou dimoun ki *entitled* pou benefisyè avèk sa bann *dues* sa dimoun ki'n desede apre sa Departman i *compile* en *file* e anvoy kot lofis Prokirer Zeneral pou en laprouvasyon legal.

Se apre sa laprouvasyon ouswa *legal advise* sa bann benefis i ganny *disburse*.

Mr Speaker an dizan sa mon konpran lespri par deryer sa lamannman, be kantmenm mon annan serten konsern e mon anvi ki Minis dan son *Reply* i adrese pou met la klarite pou tou travayer.

Premye konsern Mr Speaker i lo lefe ki Lalwa pa obliz en travayer pou fer sa deklarasyon. Mon fer referans avèk sa Lalwa avèk sa mo '*may*' '*a worker may*', dan sa ka ki manner ou tret en ka kot napa en deklarasyon, eski ou kontinyen aplik sa menm fason administre Lalwa parey ou pe fer ozordi?

Sa pou mwan i pou defet lenportans annan en Lalwa kan ou pou annan en lot fason administre or si ou pou annan en lot fason administre.

Mon dezyenm konsern Mr Speaker dan lenstans kot en travayer in fer en deklarasyon kan i ti dan en sitasyon partikilye, me apre par egzant 5an ou menm plis in desede son

sityasyon in desede wi pardon son sityasyon famiyal in sanze, an lakordans avèk *Civil Code*, lekel ki pou vin benefisyè bann *dues* sa dese?

Eski en konplikasyon ouswa en defi legal pa pou leve dan sa sityasyon?

Trwazyenm konsern se dan en ka kot en travayer in fer en deklarasyon dapre Lalwa. Me ki apre i fer en lot deklarasyon atraver en testaman, e en testaman nou konnen i ganny *authorised*.

En testaman pa neserman anliny avèk son deklarasyon ki in fer. Lekel ki i annan siperyorite lo lekel? En deklarasyon ouswa sa testaman ?

Ankor la eski pa pou kree en kontansyon legal?

Mr Speaker sa i 3 *areas* petet ki mon ti ava kontan Minis i adrese. Akoz i pou enportan i pou enportan pou ganny egzaminen i ganny adrese pou ki sa Lalwa ki nou pe konsidere ozordi i annan lefikasite. Letan nou met en Lalwa nou anvi ki sa Lalwa i efikas e i servi son *purpose* dan mazorite maksimonm lenstans ki ganny prezante devan Departman.

So mwan mon krwar sa detrwa pwen i en pti pe kontansyon e nou bezwen

kapab adres li avan ki nou bouz devan. Me parey mon'n dir mon konpran nide par deryer sa Lalwa, e mon krwar mon konnen poudir bann travayer lanplwa i ganny bokou difikilte parfwa letan i annan bann sityasyon koumsa, e mon konpran akoz petet Minister in anmenn en tel lamannman dan Lalwa Lanplwa devan nou.

Avek sa Mr Speaker mon sa mon soumisyon e mon va atann larepons Minis apre. Mersi.

MR SPEAKER

Mersi Onorab. Onorab Naddy Zilaor.

HON NADDY ZIALOR

Mersi Mr Speaker. Bonzour Minis avek ou delegasyon. Mon pou pran laparol bomaten pou mwan osi aport mon siport pou sa lamannman ki devan nou, pou 2 rezon.

Enn se ki si nou onnet ek nou lekor, benefis ler en dimoun i kit nou, en dimoun i mor, i enn bann keksoz ki Seselwa annefe dan lemonn antye parfwa i annan serten kontrovers. E mon santi ki sa Lalwa i pou pe adres en konponan ki pou tous Seselwa isi Sesel.

E mon swete ki bomaten Lepep Seselwa pe ekout nou

Lasanble avek fran lentere. San ki mon repet sa ki mon bann lezot koleg Onorab in mansyonnen, se ki i enportan ki Seselwa i konpran en keksoz.

E mwan letan mon'n ekout Minis bomaten e yer mon ti ganny sans pou asiste Staz Komite kot mon'n konpran en pti pe pli byen rasyonnel par deryer sa lamannman, e mon pou remersi Gouvernman dizour pou nou pran sa desizyon, ki senpleman montre ki nou anvi donn Lepep Seselwa en sans responsabilite.

San ki ou al dan gran deba ou sa travayer ki pe travay, annou pa esper ou letan ou ariv lo ou dernyen soupir konmsi Kreol 'lo ou lili lanmor' pou ou al deside sa mon pou donn entel, sa mon pa pou donn entel. Oubyen par deryer ou bokou fwa nou konnen ki nou annan konfli, an se ki konsern benefis.

So mwan bomaten mon pou adres travayer Lepep Seselwa, ki swa ou zenn ki swa ou pe rantre dan ou *retirement*. Se ki pran ou responsabilite.

Responsabilite ki Gouvernman pe demann ou se ki asize reflexir, apre ki ou'n kit sa later lekel ki ou ti ava kontan donn ou benefis;- en sans responsabilite, en sans *ownership*, e mon pou servi sa

term, nou pe osi tir en fardo lo Gouvernman, *in terms of decision making*.

En pwen ki Minis in touse dan ou lentervansyon bomaten , prosedir pou en dimoun ki pe viv avek en dezabilite, mon'n note ki ou'n mansyonn dezabilite fizik.

Minis mon ti a kontan osi ki ou konsider en dimoun ki osi annan en dezabilite mantal, parske mon krwar pou sa prosedir pou pli aplikab pou zot, pou fer sir ki ler zot pe pran en desizyon zot pe pran li *with a sound mind*.

Mon pou osi lans en lapel avek bann anlwayer. Minis ou'n koz lo en rezis pou ki tou keksoz i ganny met annord.

Responsabilite osi pou l lo anlwayer, e mon lapel la se ki ler ki nou Lasanble mon swete ki parske letan mon'n ekout lot kote zot osi pe aport zot siport mon swete ki letan sa lamannman i pase nou konman en Gouvernman e Departman Lanplwa i lans lo en konpany *awareness*

Lo ki fason parski la nou pe nonm bann sanzman an gro si oule, lo ki fason sa Lalwa pou met an aplikasyon;- bann letap senplifye e bann anlwayer osi i lans e konpany avek zot anlwaye dan zot sirtou bann lorganizasyon ki gran.

Sirtou osi bann landrwa travay ki nou konnen parfwa i annan bokou risk, nou lans en konpany *awareness* pou ki dimoun i rantre dan sa prosesis dan en fason *smooth*.

Alors parey mon dir mon pa anvi repet sa ki lezot koleg in dir. Mon pe senpleman aport mon soutyen e mon sipor pou sa lamannman. Mersi Mr Speaker.

MR SPEAKER

Mersi Onorab. Onorab Georges.

HON BERNARD GEORGES

Mersi Mr Speaker. Mr Speaker bokou in ganny dir mon pran laparol bomaten, pou azout enn de pti pwen ki mon krwar i ava enportan pour nou refleksyon bomaten ler nou pe vot lo sa proze lamannman.

Tre souvan, annefe preski toulezour dan mon biro avoka, e mon sir dan lezot biro avoka nou ganny demande pou fer en affidavit. Pour al *claim* kontribisyon en dimoun ki'n mor kot son anlwayer, oubyen en larzan labank, oubyen en larzan *Pension Fund*, oubyen en larzan lasirans.

Annefe sa in vin telman kouran ki o komansman ou ti zis fer en affidavit pou dir, sa dimoun ti dir ki be mwan mon

spouse oubyen mon zanfan entel, alor mon pe kolekte larzan *on behalf* bann lezot direktiv mon ava partaz sa, e sa ti marse.

E apre bann lenstityon in vwar ki pa toultan ki larzan ti ariv kot i ti sipoze arive, e alor zot in demande ki en lalis tou bann zeritye i ganny anekse avek sa afidavit e sak zeritye i donn son konsantman pou sa dimoun al tous sa larzan.

Sa ti kouver serten defayans, e apre serten lenstityon in vwar anefe ki sa menm avek sa zot ti pe pey en dimoun i pa ti sipoze pe resevwar sa larzan. Alors zot in demann en *disclaimer* ganny mete dan sa afidavit pou dir ki si larzan i ganny pran malapropo sa dimoun i ava rann sa larzan ler i ganny demande.

Donk tousala nou'n vwar se bann *steps* pou asire ki larzan en dimoun i al kot sa dimoun ki anvi sa larzan i arive. E mon krwar se dan sa loptik ki sa Lalwa pe vini ozordi.

Me se osi en dezyenm loptik aköz i annan serten lenstityon, kot ou kapab menm avan *testamentary freedom* anba *code civil* ki nou'n pase lannen pase. Menm avan sa i annan serten lenstityon ki

permet ou swazir en *beneficiary*.

Enn parey nou konnen se lasirans, ou kapab swazir lekel ki pou ou *beneficiary* anba en *life insurance* san ki i al dan ou siksesyon zeneral.

En lot parey nou konnen se sekirite sosyal avek *Pension Fund* kot se pa neseserman ou bann zeritye ki ganny ou byen, me se sa dimoun ki ou pe viv avek malgre ki ou'n marye avek en lot dimoun *or whatever*, me en dimoun ki pe okip ou dan ou dernyen letan.

Donk tousala se bann mwayen ki Lalwa o fir e amezir in anmenn bann amannman, pou fer sir ki dimoun ki merit ganny en keksoz se zot ki gannyen.

E parey mon'n dir mon krwar se dernyen faz ziska ler i ava vin en lot, pou asir sa progresyon natirel. E i vin a en bon moman aköz parey Minis in fer nou konpran. E i vin la ki Onorab John Hoareau i vin la ki nou annan *complete testamentary freedom*.

Alor nepli annan rezerv pou serten kategori zeritye e donk en anplwaye i kapab *designate* en dimoun ki i anvi i ganny son benefis travay, i kapab les son larzan labank oubyen son propriyete a en lot dimoun. E sa se zis pour sa

larzan travay e i antre dan konteks lasirans, *pension fund*, *Seychelles security* eksetera dan sa bann sityasyon.

Donk Mr Speaker mon krwar personn napa gran problemn avek sa lamannman akoz i pe zis ankor enn fwa klarifye en serten landrwa kot ti kapab annan en serten defayans.

Malgre sa, parey Onorab Cosgrow in fer sorti, i annan mon krwar serten keksoz ki nou devret reflexir lo la, pou fer sir ki Lalwa i kouver tou sa bann defayans posibil.

Onorab Cosgrow ion demande si i annan en testaman ki'n ganny fer e ki pa anlidy avek sa deklarasyon ki sa anlwyaye in fer ki pou arive? I en tre bon kestyon.

Me mon krwar ki son repons nou war li dan sa seksyon 70(a) kot i dir, "*notwithstanding any law.*" Savedir ki li i pou pran priyorite lo *Code Civil* ki permet en testaman i ganny fer. E mwan mon vwar li koumsa. *Panel* ki bann *expert* ava dir nou si mon refleksyon i korek.

Me set en tre bon kestyon ki'n ganny demande, akoz nou bezwen demann sa kestyon pou nou trouv son repons pou nou satisfere ler nou pas nou Lalwa.

Dezyenm pwen ki Onorab i fer sorti se si sa i pa obligatwar, ki pou arive avek bann dimoun ki pa swazir pou fer sa deklarasyon?

Eski nou pa pou annan menm problemn ki ozordi? Me larepons se wi, si en dimoun i swazir pou pa fer en deklarasyon sa se son drwa, son larzan i ava ganny administre parey i pe ganny administre ozordi. Avek bann konplikasyon aferan a sa kompleksite, a sa desizyon.

Donk ankor enn fwa mon krwar i ti ava difisil, si non enposibil pou oblize tou dimoun ler zot antre dan en lanplwa pou zot *designate* ki pou arive avek zot saler.

Annefe i pa enposibil non, naryen pa enposibil si ou *apply* ou lekor. E kekfwan ankor enn fwa *panel* i ava dir nou, ki zot lentansyon dan les laport ouver *instead of* fors tou bann anlwyaye pou zot fer sa deklarasyon.

En kestyon ki mwan mon demande se eski Lalwa i permet, (mon mazine i bezwen permet en dimoun sanz son nide) Ou'n fer en deklarasyon ozordi epi sa dimoun i ou anvi i ganny ou larzan ler ou mor, ler ou ariv kot ou tanto in sanz *lock* lo laport in tak ou deor, *obviously* ou pa pou anvi ki i

resevwar sa benefis e ou pou anvi sanze.

Mon mazine ki Lalwa i permet se deklarasyon siksesif ganny fer. Tel parey i permet deklarasyon siksesif ganny fer ler ou sanz lanplwa, i osi devret kapab permet deklarasyon siksesif ganny fer ler sa dimoun in sanz son nide.

E la se en sistenm ledikasyon mon krwar ki Minis in dir ki pou annan leksplikasyon ki pou ganny donnen mon krwar sa i ava enportan ki bann travayer i konnen zot dwa e zot posibilite.

E finalman dan sa lalis keston, ki mon ti a kontan ganny en pe leklersisman avek *panel* se eski anfen mon krwar repons in ganny dir se sa anplwaye ki pou bezwen fer son desizyon vizavi son anplwayer. Son anplwayer napa okenn lobligasyon pou dir li fer sa.

Me mon demann mwan si annefe nou pa kapab annan en mekanizm kot ler dimoun i antre dan lanplwa enn bann keksoz ki ganny met devan li dan en fason ofisyel se; Eski ou swazir pou ou fer en deklarasyon? E sa i ganny antre dan sa rezis.

Kot bann dimoun ki deside, ki pa fer i mete kler dan sa rezis sa dimoun in deside pa fer en deklarasyon e siny obor

pour ki napa okenn defayans pli tar. Si sa i ganny aksepte par *panel* mon mazine ki sa i pou antre dan regilasyon e nou ava kapab annan en *column* pou *cater* pou sa posibilite.

Donk Mr Speaker avek sa detrwa mo, mon ti a kontan demann avek *panel* pou reflexir en pe lo sa bann pwen ki'n ganny fer, e donn nou zot leklersisman ler Minis i rann son repons. Mersi.

MR SPEAKER

Mersi Onorab. Onorab Gervais Henrie.

HON GERVAIS HENRIE

Mersi Mr Speaker. Bonzour tou dimoun. Mr Speaker bomaten dan enn son bann larepons Minis Derjaques letan ti la i ti pe koz lo ki mannyer nou avek nou koman bann Manm Lasanble la anndan nou annan en responsabilite koman bann dirizan dan kominote pour ede epanouir nou pep.

Pou zot kapab sorti dan sa konsep vilnerabilite e pou zot vin en pe pli ofe avek sa ki pe arive otour zot, e vin en pe pli sofistike e konpran ki pe pase otour zot.

Mon krwar sa deba ki nou pe fer la i zisteman al en pe dan sa direksyon. E nou koman Manm Lasanble nou annan sa

responsabilite non selman ozordi aprouv sa lamannman parey mon'n tann tandans bann lentervansyon ziska la in dir.

Me osi letan nou pe zwenn nou bann *constituent* dan distrik pou dir li, pou dir be ou'n tande sa in pase e ou annan sa pou ou kapab fer. E mon krwar sa ki mon ti ava demann mon bann koleg ozordi pou fer.

Parske depi ki nou ti diskite longman revizyon dan *code civil, the famous testamentary freedom concept* in antre ki detrwa Manm depi bomaten in koz lo la.

E sa i senpleman dir ou ki ou pou swazir, ki arive avek ou *estate* apre ki ou'n mor e ou napa konmsi en lobligasyon legal pou fourni, okenn Manm fanmir ouswa lezot endividi oubyen malgre sa i kapab ganny *challenge* touzour.

Be prezan avek sa mwan mon war poudir sa lamannman i en ekstansyon sa konsep kot i pe met responsabilite personnel lo sak endividi, pou li organiz son lekor, met son lavi annord, pran son bann responsabilite vizavi son bann pros, vizavi son bann zanfan, bann keksoz koumsa.

Me an menm tan lo lot kote sa kalen, zanfan ou pros i

bezwen responsabilite anver ou. pran swen avek ou, e viv byen avek ou, pa maltret ou selman apre letan ou mor i oule ou byen e i oule konteste ki ou'n swazir pou donner.

So i annan, mon war li koumsa. Pou nou pti Nasyon Gouvernman i pe dir poudir get sa mon bezwen en moman arete enterfer dan lavi endividi, kot mwan mon pou antre letan li in mor pou vin dir poudir la ou byen pou bezwen partaz egal, ant tel, tel dimoun. Non.

Ou ler ou ankor vivan pran sa responsabilite, e organiz ou lekor, e nou'n vwar poudir i annan bann legzanp ozordi par egzanz fon pansyon i enn bann antite ki donn dimoun sa liberte, i annan en form ki ou anpli kot zot, par egzanz si ou mor demen bomaten, ou kontribisyon volonter ki ou'n peye *over the years* lekel ki oule donner e ki poursantaz ki oule donner.

Nou annan *Will* ki dimoun i fer, Onorab Georges in koz lo lasirans. So menm lasirans lanmor la ki bokou bann lasirans pe *advertise* R75mil i dir ou 25 i al pour fer ou trou bann konstrir latonm sepa mon kwa, e 50mil zot dir ou lekel ki oule i donner pou organiz ou lanterman ou bann keksoz koumsa.

So tousala i annan diferan legzanp kot bann endividi dan nou sosyete pe ganny sa liberte pou li swazir organiz son lekor e pran sa responsabilite.

E letan ki mon pe mansyonn sa mo responsabilite premyerman e i travayer mon krwar i bezwen li konsyan i annan sa, e vin de lavan demann sa form enn fwa ki i vin dan *available*.

Be kan ki sa dimoun i ganny dir ki i annan sa form, koman i antre travay parey Onorab Georges pe demande ouswa 5an? Akoz si Lalwa i dir ou anba 5an ou pa ganny naryen i pa vo lapenn koman mon antre travay mon 18an mon ranpli sa form, me letan mon premye 5an mon dan en *interview* la avek mon e i dir mon wi ou pe travay byen be la i annan sa form kontrer ranpli.

Kan nou fer sa? Anplwayer i bezwen edik zot anplwaye lo sa nouvo mezir. Nou'n tann nonm linyon travayer bomaten Minis in mansyonnen dan son entervansyon.

I annan bokou zot konmela, lekel zot, lekel zot bann Manm, zot anrezistre, zot legal? Zot bezwen prezan pas sa lenformasyon avek zot piblik.

E dernyen pwen se lefe i reste nou bezwen viv byen avek

kanmarad, pran swen avek nou paran, nou ser, nou frer ki apre napa diskord letan in ler pou ganny en keksoz.

Donk avek sa de pwen Mr Speaker mon ava dir ki mon pou siporte akoz i pe remet responsabilite personnel lo sak endividi Seselwa pou organiz ou.

E an menm tan i pe ede fer ki i en *incentive* pou nou viv byen avek kanmarad e *hopefully* benefisye avek en keksoz ki letan sa dimoun ki nou'n pran swen avek i kit sa later e nou ganny en keksoz.

Donk *it's a win, win* pou tou dimoun kin mon pa war gran, gran konplikasyon ladan. Donk mon pou siport sa lamannman. Mersi.

MR SPEAKER

Mersi Onorab. Onorab Churchill Gill.

HON CHURCHILL GILL

Mersi Mr Chair. Bonzour Minis ek ou delegasyon. *Bill* i *straight forward*, me selman ladan i annan de keksoz ki mon ti a kontan ki Minis ler i donn son larepons i don leksplikasyon lo la.

Nou konnen ki ler sa deklarasyon i fini fer ler sa dimoun in mor i sipoze annan 14 zour ki sa dimoun ki sipoze

benefisye pou li ganny notifiye. Me selman i kler ki ler in ariv sa staz tou responsabilite i lo Minister. Me selman dan sa *Bill* i pa'n dir ki ler pou nou notifiye sa dimoun, ki arive ki si sa dimoun ki sipoze ganny notifiye i aletranze?

E si i annan *cost* ki *involve* ler i pe fer sa demars pou kontakte sa dimoun lekel ki pou pey sa *cost*? An menm tan si i annan okenn *administrative cost* ki ganny *incur* dan sa bann *process* mon krwar pou benefis bann dimoun ki pe ekout nou i enportan konnen ki mannyer pou ganny trete sa bann kou.

E an gro sa ki mon ti annan pou dir aköz tou mon lezot koleg in fini dir sa *Bill* i tre senp i tre enportan e mon osi mon pou aport mon sipor, mersi.

MR SPEAKER

Mersi Onorab. Onorab Georges Romain.

HON GEORGES ROMAIN

Mersi Mr Speaker. Bonzour Minis avek ou *panel*. Mr speaker mon osi mon pa pou dir bokou aköz bokou in fini ganny dir.

Mr Speaker mwan mon pour siporte sa lamannman ki pe ganny propoze, aköz mon krwar ki sa pou fasilite bann

prosedir pou tou dimoun aköz i pe retir sa eleman kot ou pou bezwen al rod en avoka pou kapab tous benefis sa travayer e ler i mor.

Sa i vedir ki i ava bokou pli fasil e efikas pou bann anplwayer swazir lekel ki pou vin son *beneficiary* e osi i a ede pou redwir birokrasi dan sa bann prosedir.

E la mon krwar ki ledikasyon bann travayer dan bann landrwa travay i enportan, kot zot anplwaye i a bezwen edik zot byen lo benefis sa nouvo lamannman.

E fer sir ki tou travayer i byen konn son prosedir ler zot pe fer zot deklarasyon. Mr Speaker e i vremen senp e pour sa mon pou siport sa *Bill*. Mersi Mr Speaker.

MR SPEAKER

Mersi Onorab. Onorab Labonte.

HON ANDY LABONTE

Mersi Mr Speaker. Bonzour Minis ek *panel*. Minis, Mr Speaker ler mon'n ekoute mon krwar mazorite keksoz in fini ganny dir.

Aköz ler mon pe get sa *Bill* li menm li sa *Bill* i pe permet 2 keksoz dan 2 lobzektif se ki pou donn travayer priyorite pou donn sa deklarasyon pou zot deside lekel vremen ki merit erit

zot *dues* si an ka zot in *pass away*.

E lo sa laliny ki la mon krwar poudir i vreman esansyel e enportan akoz i annan bokou dimoun ki la deor ki santi zot dwa petet pa ti pe vreman, oubyen sa ki zot ti anvi i pa ti leka. Akoz ler ki zot *past away* zot war poudir tou letan ki zot in travay zot ti a swete ki sa bann dimoun kekfwa ki'n pran ka avek zot oubyen ki zot in viv avek ti a benefisyé.

Me plito i zot fanmir ki pa'n vreman pran ka avek zot. Alor i premye lobzektif se ki zot santi zot kapab zot partner akoz i annan dimoun ki viv dan menm lakaz oubyen menm i annan bann relasyon menm sex, ki parey i annan bann rann kont ki mon'n fer in sorti klerman ladan ki sa bann dimoun i dir zot santi zot fanmir apre i enterfer e apre zot partner pa pe resevwar sa.

So i adres en pe sa bann *issue* ki mon vreman apresye lo sa kote koumsa.

Apre dezyenmman se ki ler mon pe get sa Lalwa i pe donn pouvwar Lanplwa pou li kre sa Lalwa. E mon ti a swete ki ler i pe kre sa bann Lalwa, oubyen ki ler ki Minis i donn repons la i parey in ganny dir i.....

Onorab Georges in eksplik en pe poudir si i annan en *Will* sa Lalwa i pas par devan sa *Will*, so si Minis i kapab konfirm sa ki i ava pli kler pou dimoun la deor. Me selman mon krwar poudir sa *Bill* i en *Bill* ki vreman esansyel e vreman enportan e in *come*. Petet i ti merit vin en pti pe pli avan.

Me selman plito tar ki zanmen. So, mon pou donn mon spor sa *Bill*. Mersi.

MR SPEAKER

Mersi Onorab. Onorab Sebastien Pillay.

HON SEBASTIEN PILLAY

Mesi Mr Speaker. Mr Speaker sa sosyete i ganny zize si oule par bann Polisi e bann prensip ki pran plas, e letan nou al devan tou bann prensip e Polisi ki'n met an plas apre i vin bann Lalwa.

En kantite keksoz in ganny dir lo sa Lalwa e bokou bann largiman ki ganny avanse i fer bokou sans, dan en Lalwa ki paret tre senp, tre *straight forward*, largiman ki i vin avek apre se en largiman plito legal. Ki arive si sa i arive, ki pou fer dan sironstans ki sa i arive.

Onorab Cosgrow dan enn son largiman in koz lo sa konfli ki pou egziste, e Onorab Georges in dir nou poudir i

notwithstanding any, e mon'n fer en pe letour lorizon bann *case* ki'n pas devan Lakour. I pa sitan senp. Inevitableman in annan en *challenge* e en dimoun pou dir be lentansyon sa dimoun *all along* sete pour donn mwan son byen.

E se pour sa rezon ki ler in koz lo son benefis lanplwa in pas son bann benefis lanplwa lo mwan. Sa i kapab en largiman ki ganny servi dan en *challenge*. I pa en problem pou Minister Lanplwa sa, i en problem pour siksesyon sa dimoun, aköz se sa bann annan dimoun ki dan sa siksesyon ki pou bezwen al lager sa ki pe arive.

Dezyenman nou bezwen konpran byen sa largiman dimoun e vilnerabilite, responsabiliz dimoun. Fodre pa ki nou bliye ki nou viv dan en sosyete e ki toultan enn pou bezwen fer en keksoz pou en lot.

Sa i natir imen, *unless* nou tou nou mont se nou, nou ferm nou laport e nou pa get sa ki pe pase kot nou vwazen menm si i annan en dife, menm si i annan en voler pe antre. Ki mon pa krwar dan en kominote oubyen dan en sosyete parey Sesel i posibil, i enposib.

So ler nou pe koz lo sityasyon kot en dimoun pour responsabiliz son lekor, pou li deside, gard en bon lantant,

imen i pa prediktab e nou pa pou kapab predir ki en dimoun pou fer, aköz i enposib pou nou konnen ki pe pase dan lespri en dimoun.

Aküz ou zanfani i kapab ou zanfani ozordi e zot tou zot tonm dakor avek ou, ou pe sonny zot byen e demen ou zanfani i kapab vire deside be premye keksoz ki pou fer ler Manman ek papa i mor se met zot kazern, *well* ler manman ek papa i vye met zot kazern.

Oubyen papa in kit sa bout later la pou mwan pou al vann. Oubyen Manman ti annan en zoli bag anler dan lasanm i ti sipoze donn mon ser me koman manman i mor mon pou ale mon pou pran. I enposib.

E se pour sa rezon ki Lalwa e bann lankadrem legal i egziste zisteman pour nou *constrain* sa natir imen, pour nou met li an perspektiv.

Mon largiman tre senp i sa mwan, mon krwar sa Lalwa pour ede dan serten ka, sa lamannman pou ede dan serten ka e osi pou ganny en gran kantite ka kot dimoun pou zis pa oule konfront sa desizyon.

Aküz fodre pa bliye nou sosyete ki nou viv ladan Seselwa nou bokou Seselwa pa oule konfront lefe ki en zour i kapab mor, napa en dimoun la

anndan ki pou dir mon i pa per lanmor. E *as soon* ki ou pou komans apros sa kestyon ek en dimoun ou pou komans koz lo donn testaman donn isi laba, sak dimoun i annan son lopinyon lo la.

Akoz i en kestyon inevitabilite ki ou pe met devan li. So sa Lalwa li menm i pa fer ditor personn aköz i pe zis donn ou sa posibilite pou fer li me selman eski parey Onorab Cosgrow in dir, ou pou vwar ou dan en sityasyon kot dimoun pou *avail of* sa posibilite, oubyen dimoun pa pou pran li?

E sa i anmenn nou lo sa lot konteks, annou pran konteks par egzantp bann konpanyen ki dan *ITZ*, par egzantp *IOT* par egzantp. Mannyer mon konpran mwan, *IOT* i donn ou en dokiman ki ou met ou *next of kin* lo la, e ler sa dimoun ki'n travay kot *IOT* i mor *IOT* i kontakte son *next of kin*.

Me *IOT* i pa ganny kouver par Lalwa Lanplwa li, e sa i en largiman ki'n ganny avanse par mon koleg lo lot kote latab. Eski ou bezwen al dan laliny parey ki konpanyen lasirans i fer, *pension fund* i fer sa ozordi kot ou bezwen met sa *next of kin*.

Mon krwar se sa ki Departman Lanplwa pou bezwen konsidere aköz pa ler sa

Lalwa i pase i ganny *assent* ki zot tir zot lipye oubyen zot tir zot lizye lo la, kot zot pa pou gete aköz zot pou kontinyen ganny *case unless* ki i vin en keksoz obligatwar pou ler en dimoun i antre dan en landrwa travay.

E fodre Seselwa ki pe ekout nou, dimoun ki pe ekout nou pa pran konfizyon ki Lalwa Lanplwa i aplik pour tou dimoun ki travay. Menm si ou travay dan sekter prive, *unless* ou sekter prive i tonm dan *International Trade Zone*. Sa i enportan e mon krwar i enportan pou Departman Lanplwa apros sa size.

E i pou bezwen annan en sansibilizasyon ki ganny fer avek bann anlplwayer, pa zis Gouvernman li menm pou bann anlplwaye. Aköz enn bann pli gro anlplwayer se Gouvernman.

So eski demen Gouvernman pou entrodwir en sistenm, kot ler en dimoun i antre dan en fonksyon dan Gouvernman i pou dir ek sa dimoun met ou *next of kin* ki pou ganny ou benefis.

E la i soulev kestyon ki'n ganny leve oparavan si sa dimoun i annan 20an i napa en *next of kin*, lekel ki pou son *next of kin*? So i annan serten eleman ki bezwen ganny dil avek.

Dan li menm, dan li menm napa problem ek sa Lalwa akoz i *actually* fer fasil en serten sityasyon. Me nou bezwen konsider bann kestyon ki i *raise* e sa bann kestyon pou bezwen ganny adrese swa atraver bann regilasyon, swa oubyen atraver bann lezot lamannman, ki ava si oule armoniz bann lezot Lalwa ki vin otour li.

So, pwen final i se ki eski pas sa lawa ozordi pou radikalman sanz sityasyon? Mon pa krwar i pou radikalman sanz sityasyon, me i a reste pou vwar ki manner piblik an zeneral i reakte lo la.

E sa ki reste enportan se ki Gouvernman in koz lo sa konsiltasyon ki in gannyen, mon kontan tande lo sa enn i annan konsiltasyon.

I enportan ki zot mentenir annan sa konsiltasyon. Ti ava bon si i annan dan tou size ki vin devan. Me ler en size i vin pas devan tou dimoun e nou ganny sanze sa pou donn nou lopinyon, nou vwar poudir tou dimoun i pare pou kontribye.

E mon ti ava swete ki n ou sey adres sa menm si nou konnen ki pou annan en difikilte pour Minister Lanplwa ki la devan nou ozordi, pou donn nou en solisyon pou serten sa bann kestyon ki'n ganny souleve.

Avek sa Mr Speaker mwan personnelman mon pa war rezon akoz mon pa pou siport sa lamannman akoz i annan en merit, i annan -pou dimoun ki kapab servi sa lamannman, pou en dimoun ki li i santi stab in marye i annan son zanfan i organiz son lavi dan en fason ki pou li dapre son perspektiv pou li.

Mon pa pe dir si ou lavi pa parey i pa organize, me selman dan son perspektiv pou li sa dimoun son lavi i organize, mon krwar i kapab fer li. Me pour en lot dimoun i pou en lot fason get li. So vwala mon lopinyon lo sa lamannman Mr Speaker e vwala mon kontribisyon. Mersi bokou.

MR SPEAKER

Mersi Onorab. Onorab Conrad Gabriel.

HON CONRAD GABRIEL

Mersi Mr Speaker. Bonzour tou dimoun a lekout. Bonzour e *welcome* Minis ek ou *panel*. Byensir bokou in ganny dir si nou vwar Lanplwa in ariv la ozordi se parske i annan en problem ki nou bezwen *solve* e bezwen ganny rektifye.

Mon panse ki sa pandemi i enn rezon dimoun pe mor. So nou pou bezwen *sort out* e pe vitman. Zis mon ti a kontan

ganny en apersi lo ki kantite *cases* ki ankor *pending* avek zot Biro Lanplwa? E kot dan lesans kot si personn pa vin devan pou *claim* sa bann benefis ki arive?

Mon panse petet i al dan fon Leta, e eski kantite letan apre en dimoun i kapab vin reklanm en benefis tou son fanmir or *anybody* ki i konnen e ki bann prosedir ki aplikab pour sa?

E lo kote en manm lo *Bills Committee* mon krwar i en Lalwa en pe senp nou kapab donn nou sipor. Mersi Minis.

MR SPEAKER

Mersi Onorab. Avek sa nou konklir deba lo *Bill* e mon envit Minis pou prezant son repons.

MINISTER PATRICIA FRANCOURT

Mersi Mr Speaker. Mersi tou Onorab ki'n donn zot kontribisyon Departman Lanplwa i apresye e tou zot bann sizesyon i valab ki nou pou pran an kont.

Zis pou mwan adres enn de bann pwen ki'n sorti, sa lamannman letan nou regard li an gro, *benefits* ki i pou anmennen i pou anmennen i *outweigh* si napa *benefits*. *Firstly* mon mazin poudir i *less costly* e i fer li pli fasil.

Me selman parey enn de zot i kouver, mon krwar i pou anmenn sertitid, *certainty into* bann manm fanmir e reasirans ki *the right thing is being done* pou *support* fanmir.

Sa *Bill* parey nou dir pe anmenn lord osi e i anliny avek *Civil Code*. I pou aplik parey *as the Will, so 14 days*, 14 zour pou sa dimoun ganny notifie *after the death e thereafter* son prosedir pou ganny peye i komanse.

Dimoun i kapab *chose* kote zot larzan i ale. I en swa, so plis nou donn dimoun swa i donn zot abilite pou zot fer bann *informed decisions* parey nou dir. E i en *process* ki zot bezwen komans mazin lo la. Nou tou nou bezwen komans mazin lo la. Petet i nouvo, me solman i bann *process* ki i arive dan lavi e nou bezwen komans mazin lo la.

Sa Lalwa i pa oblize i en swa. Sanmenm sa, sa bout ki Onorab Cosgrow in dir '*may*' so *it's a choice, it's not obliged*. So letan nou koz lo sa bout lekel ki annan priyorite *versus* en Testaman avek deklarasyon onorab Georges in kouver sa. So *a method*, sa metod i vreman demokratik, me i *supersede* dezyenm *which is a Will*.

Nou'n dir napa obligasyon pou deklare. Si napa

obligasyon pou deklare *benefits will go back to the state*. So again, mon dir deklarasyon i supposed to supersede sa Will so deklarasyon i pran priyorite.

Sa deklarasyon annou mazine i an relasyon avek *benefits* lanplwa selman, zis *benefits* lanplwa.

Onorab Zialor ou'n koz lo bout *sensitization* pou edik piblik, sa nou donn nou komitman ki nou bezwen fer akoz i en keksoz ki nouvo. Alor en ta koze bezwen ganny fer lo la nou'n komanse nou'n fer li byen e nou pou kontinyen.

Alor nou bezwen annan en kanpanya kot nou *sensitize* piblik. E lo kote *mental health* mon pran sa an kont ki nou pou bezwen annan bann diskisyon avek bann Lotorite konsernen ek Lazans, pou nou regarde ki mannyer nou enkorpor sa. So nou bezwen fer konsiltasyon lo la so mon *take* sa not ki ou'n dir *onboard thank you for that*.

So parey mon'n dir, si Lalwa i ganny aprouve i annan en kantite louvraz *still* pou nou fer. Nou pa pe mazin *run away from it*, debark sa laba e nou lav nou lanmen. I annan an kantite louvraz pou nou fer pou nou kapab *sensitize* dimoun.

Lot pwèn ki'n ganny dir, nou pou annan mekanizm an plas ki ler sa dimoun in zwenn

travay nou'n menm regard bann dokimantasyon *step by step*, so that i *facilitate* bann anplwayer. I koman en dokimantasyon ki nou'n travay lo la ler sa dimoun i komans travay *straight away* i annan sa *format*.

E sa bann kestyon ki al avek pou kapab *facilitate employers*, pou kapab pran sa konversasyon avek bann *employees right from the beginning*. Nou pe mazine letan en Kontra osi pe ganny *issue right from the beginning* sa konversasyon avek sa dokiman i mars ansanm.

E mon krwar poudir pou annan louvraz osi pou nou *sensitize* nou bann *HR*, akoz sa i en bann konversasyon ki zot pou bezwen petet ganny en pti pe *training* ki mannyer zot fer, avek bann *employees* ler zot fek komanse. I en konversasyon sansib, me solman i bezwen ganny fer.

Nou met *ownership*, nou redir, nou met *ownership* lo *both employer* avek *employee* pou fer sa byen, akoz i pou benefisyè tou parti parey zot tou zot in dir e i pou fer keksoz bokou pli fasil.

Onorab Gill i demann bann dimoun i *overseas* par egzantp. Mon mazine lanmenm la kot nou pe koz

lakor antre fanmir i bezwen annan bann lagreman, bann diskisyon ki *they probably would have to pay for the beneficiary to come back if that is the case.*

Be i bann konversasyon, e mon krwar poudir sa *Bill* i, i en bon moman pour anmenn fanmir pli pres ansanm kot nou koze, menm *treatment of each other* konmsi ki mannyer nou tret kanmarad, ki mannyer nou fer sa lavi familyal vin pli pozitiv. I vreman en *beginning of a conversation* ki nou bezwen annan.

Annan de fwa nou pou vwar poudir bann konversasyon parey ki anmenn fanmir en pti pe plis ansanm. So Onorab Pillay *again* mersi pou ou kontribisyon, i pa en, i en *Bill* ki nou ankouraze ki dimoun pa *run away from* zot responsabilite. Nou to nou annan responsabilite *in making the right decisions* ki benefisye sirtou nou fanmir e *minimize* dezakor.

Mon'n dir osi *HR* i annan en gran louvraz pou zot fer, *however difficult* pou zot kapab annan sa konversasyon avek bann *employees* letan zot komanse.

Bann *legal issues* i annan provizyon dan Lalwa pou Lakour *handles* oubyen

address tou sa bann *issues* ki i a kapab *come up e derived from the amendments* lo prensip of *the right of a fair hearing.*

So mon mazinen letan zot a *go through* nou a vwar mannyer Lakour osi i annan son bout *if it comes to that.* So zis pour donn en pti pe bann statistik Onorab Conrad, so *from January* ziska la konmela nou'n annan 22 ka, 22 cases, 17 workers lo Mahe e 5 workers lo Praslin ki *total in Rupees is over R1.3million.*

Nou kapab donn plis detay lo la, *we will give details of case pending for process,* si zot bezwen. So mon remerci zot vreman for pou aksepte sa amannman. E mon konnen poudir i pou fer en gran diferans pou popilasyon Sesel. Tou sa ki zot in dir nou pran kont e nou ava anmenn li dan nou bann regilasyon. So mersi Mr Speaker.

MR SPEAKER

Mersi Minis. Nou'n pare pou vot lo merit zeneral sa *Bill.* Manm ki an faver lev lanmen silvouple? Mersi. Tou dimoun prezan in vote.

Bon vot lo *general merit of the Employment (Amendment) Bill 2021* 28 Manm in vot pour, 0 kont e 0 abstansyon. *Bill* in pase lo *general merit* e mon a

envit Madanm Clerk pou fer *Second Reading*.

MADAM CLERK

Mersi Mr Speaker.

A Bill for an Act to amend the Employment Act Cap 69 to permit a worker to make a written declaration for the payment or distribution of the workers employment benefits on a death of the worker to a beneficiary designated by the worker in the written declaration and to give the Minister power to make regulations in this regard and for the matters incidental thereto. Mersi Mr Speaker.

MR SPEAKER

Mersi Madanm Clerk. Nou a pas dan Staz Komite pou pran bann amannman, e mon remarke ki *Bills Committee* in mete serten amannman parey nou'n fer avan.

Bills Committee i a pas dan son bann propozisyon e si lezot Manm i annan lezot amannman an mezir, nou a pran li an mezir *Bills Committee* i desann lo sa *Bill*. Onorab Hoareau pou prezant bann amannman.

HON JOHN HOAREAU

Mersi Mr Speaker. Mr Speaker Bill i an lakordans avek Konstitisyon. Premyerman e nou annan enn de bann lezot

lamannman ki nou pe propoze pou sa *Bill*. Nou a komans avek lartik 2 i *read* koumsa;

This Act i annan en comma ki devret ganny mete la ‘amending the Employment Act, Cap. 69, shall be read and construed as one with the Employment Act, Cap.69,’ e la nou azout that was last amended by Act 20 of 2020, ‘comma’ and which, i vin en ‘comma’ apre which ‘as amended, is hereinafter referred to as the “principal Act”.

MR SPEAKER

Byen. Si *panel* i an akordans, sirtou madanm *draftsperson* mersi. *Proceed* Onorab Hoareau.

HON JOHN HOAREAU

Lo *article 4* kot i dir; *Section 62A(3) of the principal Act is amended by repealing the words “legal representative”* nou, nou pe *suggest* ki nou met ‘*legal representative of such worker*’ ok.

MR SPEAKER

Onorab mersi. *PS*.

HON JOHN HOAREAU

Nou al pli devan.

MR SPEAKER

En moman. *PS* in lev lanmen, savedir, wi *PS*.

PS JULES BAKER

Bonzour Mr Speaker. Bonzour tou Manm Onorab. Bonzour tou dimoun ki a lekout.

Mr Chair anefef mon ti oule zis fer resorti ki *panel* napa lobzeksyon avek sa lazoutman pour sa ‘*of such worker*’ akoz *already* i fer provizyon dan *principal Act for that. That could have been an omission on our part, so we are in agreement with of such worker unless we have strong objections for not by other members. Thank you.*

MR SPEAKER

Nou a kontinyen. Onorab Hoareau. *Next.*

HON JOHN HOAREAU

Sorry, nou kontinyen avek menm paragraf. *And substituting therefore the words “estate or succession of” nou tir ‘a’ nou met ‘the worker.’ Ok. “Or in accordance with a declaration made by” ankor nou tir ‘a’ nou met ‘the worker’.*

MR SPEAKER

Byen Onorab, *panel* in dakor. *Carry on.*

HON JOHN HOAREAU

Ok nou move down to Article 5 70(A);

“Notwithstanding any law, a worker may make a declaration stipulating that the benefits arising out of” la nou pou tir ‘his’ nou pou met ‘the worker’s employment,’ so the worker’s.

MR SPEAKER

Kontinyen pou sa paragraf apre nou a regard *panel.*

HON JOHN HOAREAU

Wi, ‘*his or her employer, ok i zis dan ‘his’ la nou oule fer li gender neutral so nou met ‘or her employer’ and standing ‘to the worker’s. Ok.*

MR SPEAKER

Kontinyen.

HON JOHN HOAREAU

Credit with ‘his’ prezan nou met ‘or hers employer on the date of the worker’s ankor ‘s’, death be paid or distributed by his or her employer upon the worker’s death. Ankor ‘worker’s,’ – ‘death to.’ Prezan nou pou tir ‘a person’ nou pou met li “by beneficiary to or beneficiaries, designated by the worker in accordance made by the worker.”

MR SPEAKER

Sorry konmsi ou'n mal lir sa dernyen bout, regard en pti kou silvouple.

HON JOHN HOAREAU

“Designated by the worker in the declaration made by the worker.”

MR SPEAKER

Yes, tre byen. Panel ou a pronons lo la silvouple. PS wi. Yes PS.

PS JULES BAKER

Thank you Mr Chair. Mr Chair the intention of this amendment when we first propose it, we considered to keep the wording of this amendment in line with the wording of the current principal Act where ‘his’ is used.

Although we consider the gender sensitive that the law that are being proposed today. Sa Lalwa ki pe ganny propoze ozordi se ki nou anvi ki i en Lalwa ki annan sa issue ki annan pou fer avek gender balance.

E dan IGPA Interpretation and General Provisions Act i already define what is the meaning of ‘his’ ki refer ‘his or her.’

So nou lentansyon sete pou keep it as is, as his anefe akoz the Principal Employment Act already i pe fer referans

avek ‘his.’ Be nou mazin en lefe ki Employment Act pe ganny review e en nouvo Employment Act pou ganny propoze byento, nou a kapab koriz sa lenzistis ki annan ant sa issue gender.

Be solman however nou mazin en sa propozisyon ki'n ganny mete in terms of the first, dan premye propozisyon about tir sa ‘his’ met the worker’s nou aksepte.

Dan dezyenm propozisyon pou insert ‘or her’ what if we suggest nou dir ki ‘arising out of the worker’s employment with the worker’s employer and standing the workers credit with his or her employer.’

Akoz letan nou pe war sa ‘his and hers’ i kontinyelman repete. Mon pa konnen si kekfwa Onorab Georges mon'n vwar ki li osi in fer serten lentervansyon lo la. Me selman zeneralman nou'n vwar ki annan 2 sans wording kot i annan landrwa nou pe dir ‘the workers’ i annan landrwa nou pe dir ‘his or hers.’

Kekfwa la nou pe mank en pti pe consistency dan lafason ki nou pe servi bann mo ki kapab annan en pe lenpak lo the principal Act Mr Speaker. But of course, we stand to be guided by Onorab Georges as Leader of Government Business.

Me selman zeneralman sa ki pe ganny propoze sirtou sa dernyen bout, pou amann sa bout kot i dir *beneficiaries or beneficiaries in that declaration made by the worker, we are ok with that. Thank you Mr Speaker.*

MR SPEAKER

Thank you. Yes Onorab Georges.

HON BERNARD GEORGES

*Yes thank you Mr Chair. Thank you panel. Annefe sete en pwen ki nou ti'n konsidere Mr Chair. Efektivman sa Lasanble in deside depi en bon pe lannen pase ki nou pou fer tou nou bann *Act gender neutral.**

*Me i annan en leksepsyon. E sa se ler nou fer lamannman en *Act* i pa li menm li *gender neutral* nou bezwen swiv *consistency* sa premye *Act* ziska ler i ava ganny revwar e i ava vin *gender neutral.**

*E sa i tonm dan sa kategori. E alor mon krwar ki nou pou bezwen aksepte gard 'his tir or her' me etandonnen ki i annan 7 landrwa dan en sel *clause 70(A)* kot i pou annan *his* nou ava swiv propozisyon *panel.* E dan enn de landrwa nou a met '*the worker*' e'larestan landrwa nou ava gard 'his' nou pa pou azout '*or her*' so*

that it reads well san ki nou annan 7 'his' enn deryer lot.

*E mon krwar *the best way to do that* avek, *panel* ava dir nou e sirtou nou *legal draftsperson* ava dir nou, kekfw kot Onorab, kot *Bills Committee* in propoz pou met *the worker* nou gard *the worker* me kot zot in propoz '*his or her*' nou tir '*or her*' e nou gard '*his.*' *So that there'll be a good balance.**

*E a lafen nou ava insert parey *panel* in aksepte '*the beneficiary or the beneficiaries instead of 'a person.'**

MR SPEAKER

*Mersi Onorab. *Panel* i dakor avek sa soz. *Bills Committee* Onorab Pillay.*

HON SEBASTIEN PILLAY

*Yes, Mr Chairman. Mr Chairman mwan mon annan en *issue* avek lafason depi term pase mon ti pour, mon pe not sa. Nou bezwen fer li parey nou *Standing Orders* i dir nou ler nou pe pran lamannman dan Lalwa ok?*

*Now si i annan lamannman ki pe ganny propoze e Onorab Georges byensir *Leader of Government Business* i annan tou drwa parey nenport ki Manm Lasanble pou propoz*

lamannman ki i oule propoze. I bezwen annan en rikord ki ganny garde par *Bills Committee*. Si sa i en lamannman ki *Bills Committee* ki pe ganny anmennen.

So nou ti a kontan, mon ti a kontan egzize e demande e rekomande ki Chairperson *Bills Committee* i not bann propozisyon lamannman ki Onorab Gorges pe fer. *So that* nou anliny avek prosedir ki nou pe swiv.

Akoz si non sa i pou vin, i pou reste *open* apre. Nou pou kontinyen fer ki e ler i pou annan en lamannman ki konsekan, nou pa pou kapab *raise en challenge* aköz nou'n deza les sa prosedir ariv koumsa.

So *rather* nou swiv prosedir ki Lasanble i demande dan sa konteks personnelman mon pa war sa lamannman sibstansyel, ki ou bezwen 72erdtan pou *react* lo la. Me selman mon krwar *still* nou bezwen swiv nou prosedir ki nou annan.

E ki *panel* li i bezwen reflekte lo propozisyon lamannman. *Panel* i ganny drwa pa dakor avek propozisyon lamannman ki nou pe propoze li Mr Speaker *by the way*. Si nou selman nou decide

ki sa propozisyon lamannman ki nou oule.

Lasanble ki vot lamannman, pa *panel* ki desid lo lamannman. Mon ti oule fer sir ki nou al lo rikord e nou kler avek sa. Mersi Mr Speaker.

MR SPEAKER

Mersi. Onorab Andre.

HON CLIFFORD ANDRE

Mersi Mr Chair. Mr Chair i enportan pou note ki tou sa bann lamannman ki nou pe met devan, i bann lamannman ki nou'n diskite avek Manm *panel* dan nou *Bills Committee*.

Alors menm si kekfwa i annan serten prosedir formalite ki bezwen ganny fer, nou pa ti pran li parey Onorab Pillay pe dir koman bann *substantial amendment* ki pa *require* sa bann formalite 72erdtan pou nou table sa bann lamannman e sirkile.

E par lefe ki Komite i annan tou le de kote, i bipartisan i pa en kote, so nou tou nou ti okouran ki bann propozisyon ki pe ganny met devan i pa neserman ki *panel* i aksepté.

Mwan letan mon pe gete mon, Onorab Georges in met en pwen devan, mwan mon krwar ki sa '*the*' i pou fer pli sans ki nou dir '*his or her*' aköz mon ti'n

lev mon lanmen pou mwan dir sanmenm sa, me mannyer deba in progresse in al dan sa lot direksyon.

Alors mon krwar nou koman *Bills Committee* nou pe fer en zefor spesyal ki avan *Bill* i vin dan Lasanble, nou'n zwenn bann dimoun, *at least* en dimoun ki lo *panel* pou nou kapab met devan bann propozisyon ki nou'n, nou santi nou annan.

E mon pou, dan sa konteks mon pou felisit nou *legal advisor* ki pe fer en travay ekselan pou *track* nou bann *Bill* e fer sir ki nou tou nou sey fer ki an konformite.

Me selman mon ti anvi dir sa akoz pangar kekfwa piblik oubyen Manm Lasanble i ava krwar, ki nou'n zis vin dan Lasanble la avek serten propozisyon nou'n table devan *panel*. Mersi Mr Chair.

MR SPEAKER

Mersi Onorab Andre. Petet kestyon i vin ki sa ki en pti lamannman ek sa ki vin en gran lamannman? La dan sa ka nou annan en douzenn pti lamannman ki ou kapab konpran i fer en gran lamannman.

So dernyen propozisyon lo propozisyon Onorab Georges se ki kot *Bills Committee* in propoz

'the workers' i ganny garde kot in propoz *'his or her'* nou gard *'his'* e a lafen sa dernyen *amendment* nou met *'the beneficiary.'* Amwen ki Lasanble i anvi pran en vot lo la mon krwar poudir sa dernyen propozisyon in ganny fer. Onorab Pillay.

HON SEBASTIEN PILLAY

Mr Speaker. Mwan mon swiv ou e mon krwar ki sa i meyer fason pou nou *proceed*. Akoz i pa pou relevan pou nou al fer, pran en vot lo en lamannman ki pa sibstansyelman sanz konteks sa Lalwa.

Sa ki mon oule fer se ki nou pa pri dan en pratik ki apre ler nou annan en lamannman sibstansyel, nou swiv menm pratik. E ki apre si nou, nou'n si okenn dimoun i oule *challenge* sa lamannman, i vin difisil akoz i pe zis swiv lafason ki i pe ganny fer.

So dan sa konteks sa ki ou'n dir i akseptab, *Bills Committee* i ava bezwen zis amann son propozisyon akoz en dimoun i bezwen rikorde pour ki Clerk i ganny *the right document* pou li anvoy kot AG'S *Office* apre, e sa i enportan Mr Speaker. *Thank you.*

MR SPEAKER

Thank you. Onorab Georges.

HON BERNARD GEORGES

Mersi Mr Chair. Mon toutafe dakor avek Onorab *Leader* Lopozişyon.

Mon ti zis anvi fer li reasir li ki an mezir ki nou pe *track Bills Committee* i gard en versyon, mwan mon gard en versyon e Clerk i gard en versyon. E apre nou *fine-tune* dan en fason ki sa ki al kot *Attorney General is the one voted on* par Lasanble. Mersi.

MR SPEAKER

Thank you. Amwen ki i annan demann pou vot nou a prosede, nou a kontinyen. Mersi Onorab Hoareau. *Next.*

HON JOHN HOAREAU

Mersi nou ava *proceed* avek *article 6(h)* kot i dir;

'Prescribing the manner, circumstances and forms for a worker to make a declaration for the payment or distribution by' la i met; *'an employer'* nou pou tir *'an'* *'of benefits of a worker'* la osi ti annan en zafer *'his and her'* alors nou'n aksepte pou kit *'his'* – *'on the death, the death.'*

So nou pe met *insert the word 'the death of the worker to a designated beneficiary;'* ok? E sa se lafen sa bann lamannman ki'n ganny propoze. Mersi.

MR SPEAKER

Tre byen. Napa komanter? *PS* wi.

PS JULES BAKER

Thank you, Mr Chair. *Just to take,* zis pou mon pran par anba Onorab Hoareau, si mon konpran li byen mon krwar i mank non, ou pe dir mon zis *repeal the word 'an'* kit *'the employer'* ouswa ranplas li par *the word 'the employer?'*

HON JOHN HOAREAU

Remove the 'an' by employer or 'of benefits.'

MR SPEAKER

Mon krwar *PS* Baker i annan en pwen, *'by employer'* i pa-i pa byen.

HON JOHN HOAREAU

'By the employer' sorry, *'the employer.'* Eskiz mwan Mr Speaker.

PS JULES BAKER

Sorry Mr Chair. *I think this doesn't read well. I think there's something wrong here.* Avek *the amannman.*

MR SPEAKER

Bills Committee. Eski zot propoz *by an employer* oubyen *by the employer?*

HON JOHN HOAREAU

The employer sorry Mr Speaker. 'By the employer.'

MR SPEAKER

Panel, Lasanble eski, yes Onorab Georges.

HON BERNARD GEORGES

Mr Chair with respect mon krwar ki 'an' i pli neutral, akoz sa se nou pe donn en pouvwar avek Minis pou li fer en S.I., alor i bezwen fer li for employers in general. Nou kapab met 'the death of the worker' akoz death is certain, but the employer is never certain.

MR SPEAKER

PS?

PS JULES BAKER

Thank you, Mr Chair. That was my point, akoz sa ki la i pe fer referans avek zeneral. Minister i bezwen prescribe en regulations pou tou anplwayer, e i pa kapab fer referans avek sa anplwayer tousel. Mon krwar there's a difference between the two Mr Chair.

MR SPEAKER

Yes. Bills Committee zot in dakor lo sa pwen? Tre byen, good. Bills Committee in terminen. Eski okenn lezot

Manm i annan okenn lezot amannman?

Tre byen. Nou a kapab ok, napa vot ki nou pou bezwen pran lo amannman, alor nou a reconvene dan Lasanble pou terminen.

Mersi, prezan nou propoz Mosyon pou Third Reading e mon apel LGB.

HON BERNARD GEORGES

Mersi Mr Speaker. Mr Speaker anba order 76(1) lo Standing Orders mon move ki Employment (Amendment) Bill 2021 i ganny lir en Trwazyenm Fwa. Mersi.

MR SPEAKER

Mersi mon a ganny segonnman lo sa Mosyon. Onorab Sandy Arissol.

HON SANDY ARISSOL

Mersi Mr Speaker. Mosyon i ganny segonde as amended. Mersi.

MR SPEAKER

Mersi nou a pran vot lo Third Reading of the Bill. Manm ki an faver silvouple lev lanmen?

Tre byen tou Manm in vote, Madam Clerk. Vote on the Employment (Amendment) Bill ,2021 as amended 27 Manm in vot pour, 0 kont ek 0 abstansyon. Alor sa Bill in

aprouve par Lasanble. Mersi bokou.

Mersi *panel* e Minis pou zot prezantasyon e zot direksyon lo *Bill*. Mon ava envit Madam Clerk pou termin avek *Third Reading*.

MADAM CLERK

Mersi Mr Speaker. *This Act may be cited as the Employment (Amendment) Act, 2021*. Mersi Mr Speaker.

MR SPEAKER

Mersi Madanm Clerk. Avek sa *Bill* in aprouve. Mon pou dir mersi Minis ek zot *panel* e mon a swet zot bonn apre midi.

Pour Lasanble an vi ki diferan *commitment* ki serten Manm in notifiye mwan e ki mon osi mon annan *by the way*, mon propoze ki nou komans en pti pe pli, nou a prolonz *break* en pti pe plis e nou komans 2er edmi. Tre byen, nou a revwar 2er edmi.

(BREAK)

MR SPEAKER

Bonn apre midi tou Manm e piblik ki swiv nou a lekout. Nou leskiz pou sa retar pou nou komanse apre midi. En pti leksplikasyon, nou annan Mosyon lo *Order Paper*.

Premyerman mon regrete ki madanm Regina Esparon, Onorab Esparon ki pou prezant en Mosyon in ganny en irzans personnel ki in anpes li vin dan Lasanble apre midi e sa i pou en rezon medikal. So nou demann zot konprenezon pou sa e nou aport nou sipor pou Mrs Regina Esparon.

E lot Mosyon ki nou ti annan lo *Order Paper* se 2 Mosyon ki annan pou fer avek Trete Gouvernman ki ti pou ganny prezante dan Mosyon *LGB* e pour sa *LGB* i ava eksplik Lasanble kote nou'n arive e i a prosede avek prezant son Mosyon.

Point of order Onorab?

HON SEBASTIEN PILLAY

Mersi Mr Speaker. Mr Speaker mon'n ekout ou e mon'n konpran byen ki ou'n dir, me selman la mon pou eksprim mon dezapwentman e mon mekontantman dan lafason ki nou pou prosede la apre midi.

Mr Speaker *ABC* i konstitye anba nou *Standing Orders*. E ler nou ti fini *meeting ABC* lagreman ki ti gannyen an atandans *ABC* ti annan mwan menm, ti annan Onorab Lemiel e ti annan bann *Leaders* lo lot kote *LDS*, ki nou pou ganny lenformasyon lo kwa ki pe ganny diskite e kwa ki pe pase.

Nou pa'n ganny enformen dan okenn *meeting* ki'n annan ant Lasanble Nasyonal ou menm ek *Leader Government Business*. E mwan mon krwar sa Mr Speaker i montre en mank respe pou mwan menm koman *Leader* Lopozisyon, i montre en mank respe pou mon *Chief Whip* ki li osi i en Manm lo Komite *ABC*.

E i annan en mank respe pou bann Manm Lasanble ki apre ki nou'n konplent ki nou'n ganny lenformasyon kwa ki pe pase. Lamazorite Manm ti'n fini antre anndan e pe asize e pe esper Lasanble komanse.

Given that Mr Speaker mon oule repet en parol ki Onorab Ramkalawan ti dir dan sa Lasanble zour manmzel Alexi ti *swear in* koman Clerk. E sa ki *Secretariat* i bezwen separ son lekor *from* okenn konsiderasyon politik, sirtou an sa ki konsern travay ki Lasanble i bezwen fer.

E *given that* Mr Speaker, e *given* ki mon krwar poudir i bezwen annan en laliny ki nou desinen, ki nou tire ki bann keksoz ki pe arive i bezwen pa repet ankor, mwan koman *Caucus* Mr Speaker, nou pa pou partisip dan sa deba apre midi e nou pou swet ou en bon lazournen. Mersi Mr Speaker.

(US Members walked out)

MR SPEAKER

Mersi Onorab. Bon, depar *Leader* Lopozisyon avek son Manm Lasanble in anpes mwan donn li en repons e mon krwar mwan osi in montre en gran mank respe pou Speaker, akoz i pa'n demann mwan ...

(APPLAUSE)

MR SPEAKER

... i pa'n demann mwan leksplikasyon lo sa pwen ki in leve.

Mon oule reasir Manm Lasanble isi prezan e reasir nou piblik ki sa retar ki nou'n gannyen ti enprevi, ki nou ti'n komans diskisyon, e ki nou ti'n envit *LOTO* pou partisip dan nou diskisyon, pou nou rezourd sa problem teknik ki nou ti annan, me i ti deside pou li pa zwenn nou.

Alors nou'n kontinyen, nou'n kontinyen e nou, ziska ler nou'n kapab met keksoz annord pou nou kapab prosede. E mon a les Onorab Georges pran laparol.

HON BERNARD GEORGES

Mersi Mr Speaker. Bonn apre midi Mr Speaker. Bonn apre midi tou bann Manm.

Mr Speaker ou'n fini koz lo latitud Onorab *Leader* Lopoziyon la apre midi mon pa bezwen azout naryen apard pou dir ki bann dimoun ki ti fer koudeta e ki ti pran lo zot menm desizyon kisisa ki Lepep Seselwa i anvi, nou war ozordi ki zot ankor pe kontinyen dan menm laliny e pe deside kisisa ki la mazorite Lasanble i bezwen.

(APPLAUSE)

HON BERNARD GEORGES

E sa i regretab. Mr Speaker mon ti a kontan lo lapar mon biro eksprim mon leskiz apre midi akoz an parti sa retar i annan pou fer avek sa 2 Mosyon ki devan nou la ozordi.

Avan ki mon formelman prezant sa Mosyon, avek ou permisyon Mr Speaker mon a donn en pti mo leksplikasyon.

Sa 2 Mosyon se 2 Mosyon ratifikasyon. Setadir ki Lasanble pe ganny demande pou ratifye en Konvansyon avek en Protokol Opsyonnel lo sa Konvansyon.

Ordinerman Lasanble i ratifye bann Konvansyon ki'n fini ganny sinyen par L'Egzekitiv. Swa par en Prezidan, swa par en Minis zeneralman par en Minis.

Lartik 64 nou Konstitisyon i donn en swa a L'Egzekitiv e a Lasanble pou ratifye en Konvansyon ki'n fini ganny sinyen oubyen pou ratifye en Konvansyon ki pou al ganny sinyen, ki pa ankor ganny sinyen me ki pou al ganny sinyen. E dan sa ka sinyatir ek ratifikasyon i ganny fer an menm tan.

E dan sa ka spesifik devan nou, se sa dezyenm opsyon ki nou ti pe al fer apre midi. Me etandonnen ki demann ki ti'n ganny fer e ki ti'n *prompt* mon Mosyon, mon 2 Mosyon apre midi pa ti kler, pa to spesifye lekel parmi sa 2 opsyon ki ti pe ganny met devan Lasanble, mon biro in demann ou ek Sekretarya len dirzans pou nou fer sa kominikasyon ariv kot ou biro pou fer ker lekel ant sa 2 opsyon ki nou pe swiv.

E lartik 64(4) i dir ki en Trete, en *Agreement* oubyen en Konvansyon ki annan pou fer avek bann relasyon enternasyonal ki pou al ganny egzekite, oubyen ki'n fini ganny egzekite anba Lotorite Prezidan pa pour *bind* Larepublik, amwens ki i ganny ratifye swa par en Lalwa, swa par en rezolisyon Lasanble.

E dan sa ka mon ti vwar ki pridan lo lapar mon biro, pou fer sir akoz devan Lasanble nou

bezwen toultan azir dan en fason transparan, pou fer sir ki nou ti met kler e ki nou ti'n ganny sa kominikasyon ki fer li kler ki ratifikasyon avek sinyatir ti pou swiv ansan.

E sa se pa en ratifikasyon *post signature*, me set en ratifikasyon *pending signature*. E sa se sa ki'n retard nou en pti pe apre midi akoz nou ti anvi azir an tout transparans.

Avek sa detrwa mo Mr Speaker nou annan 2 Mosyon apre midi. E mon ti ava kontan avan ki mon prezant zot demann ou lendilzans akoz sa Konvansyon avek sa Protokol i relye enn avek kanmarad. Akoz sa Protokol i en *Optional Protocol* anba sa Konvansyon e tou lede pe koz lo menm size.

Avek alor pou anpe annan 2 deba enn ki swiv lot lo menm topik, mon ti ava swete ganny ou permisyon apre midi pou mwan *move* sa 2 Mosyon separeman pou sa 2 Mosyon ganny segonde separeman.

E apre pou pran tou deba konzwentman lo sa 2 Mosyon;- setadir lo Konvansyon e Protokol e apre mon ava demann ou *put the question* lo sak Mosyon separeman pou envit Lasanble. Eski mon kapab ganny sa permisyon?

MR SPEAKER

Nou kapab prosede, i annord.

HON BERNARD GEORGES

Mersi Mr Speaker. Mr Speaker alor mon annan devan mon premye Mosyon.

In accordance with Article 64(4) of the Constitution, this Assembly resolves to ratify the Framework Convention on Tourism Ethics. Mersi Mr Speaker.

MR SPEAKER

Mersi. Mon a ganny en segonnman pou sa Mosyon silvouple? Onorab William.

HON WAVEN WILLIAM

Mr Speaker. Mon segonn sa Mosyon.

MR SPEAKER

Mersi Onorab. Nou a pas lo lot Mosyon. Onorab Georges.

HON BERNARD GEORGES

Mersi Mr Speaker. E dezyenm Mosyon i lir koumsa;

In accordance with Article 64(4) of the Constitution, this Assembly resolves to ratify the Optional Protocol to the Framework Convention on Tourism Ethics. Mersi.

MR SPEAKER

Mersi. Mon a ganny en segonnman lo sa Mosyon silvouple.

HON WAVEN WILLIAM

Mr Speaker. Mon segonn sa Mosyon e apre prezantater ser e frer lo sa lentervansyon mon ti a kontan fer mon entervansyon. Mersi.

MR SPEAKER

Mersi. Mosyon in ganny segonde. Onorab Georges ou pou pran laparol lo Mosyon?

HON BERNARD GEORGES

Wi Mr Speaker. Mersi bokou mon pa pou long, akoz mon konnen ki bann entervenans ki pou swiv, sirtou bann Manm IAC ki'n travay bokou lo sa Konvansyon ek sa *Optional* pou fer nou loner apre midi donn nou en maksimonm lenformasyon.

Me tre briyevman, sa ki sa Konvansyon i fer se ki i pe demann ou plito i pe demann avek bann sinyater, bann pei ki'n siny sa Konvansyon annan en letik dan lafason ki Lendistri Tourizm i marse.

Globalman ek dan zot pei respektif, pa pran tourizm koman en keksoz ki napa letik. Me fer sir ki letik i antre dan tou kwen sa lendistri.

Fer sir ki popilasyon pa ganny eksplwate par egzanp par lendistri tourizm parey nou'n vwar dan plizyer pei kot kiltirelman oubyen dan bann, dan serten pei kot i annan *sex tourism* eksetera kot bann dimoun i ganny eksplwate pou satisfere a legzizans bann touris ki annan larzan, ki sorti dan lezot pei.

Fer sir ki kiltir en pei pe ganny abandonnen oubyen pa a ganny ranplase par marse touris. Fer sir ki dan tou keksoz dan tou travayer ki travay dan sa lendistri kot kiltir i en pei kot larzan ki pei i fer avek *tourism* i antre dan lekonomi e i *trickle down* en pe partou.

An gro parey mon dir taler nou pou ganny bokou pis detay lo la;- se sa an gro kisisa sa Konvansyon pe demann son bann pei sinyatir pou ferm pou annan *ethics-based tourism* e non, pa *exploitative tourism* si mon kapab servi sa mo.

Ek son Protokol *Optional Protocol* i *set-up* en Komite ki pou vwar ki sa ban etik i ganny aplike e ki pou vin larbit si i annan en dispit ant de pei oubyen ant de faksyon lo lefe ki touris pa pe ganny fer dan en fason etik.

E sa Protokol donk i *setup* sa Komite, sa lenstitisyon ki

pou annan en *droit de regard*, lo lafason ki sa Konvansyon i ganny administre. Etandonnen ki nou, nou en pei avek en vokasyon touristik enorm.

E la mon krwar ki dan sa dernyen letan nou'n vwar ki manner Sesel, i vremen en pei kot ki nou pe ganny bon piblisite partou dan lemonn. Kot nou'n retourn enn sa pei kot tou dimoun i anvi vin vizite. E sa se atraver bon travay ki nou, ki Gouvernman ek lendistri touris in fer.

Me osi i sak akter dan Lendistri Touris in fer pou lev nivo nou pei e pou fer ki nou pei in ganny en tre bon repitasyon lo nivo touristik, *qui ce soit environnementale qui ce soit kiltirel, qui ce soit* lwazir eksetera.

Donk etandonnen ki nou en pei kle e nou en lekonomi ki depann bokou lo touris, nou bezwen enn sa bann pei, bann premye pei pou siport sa Konvansyon avek sa *Optional Protocol*, e fer sir ki nou an premye laliny pou nou siny en ratifye.

E se pour sela ki Gouvernman pa anvi annan en dekalaz ant sinyatir ek ratifikasyon. I anvi fer tou lede vitman pou montre nou lentera pou montre ki nou, nou pe siport sa Konvansyon e nou pe

fer li parmi bann premye ki pour fer li.

Donk Mr Speaker avek sa detrwa mo mon ti ava demann, anfen mon pa bezwen demande akoz mon konnen zot tou zot pour vot an faver sa Konvansyon ek sa Protokol. Mon regrete ki Lopozisyon dan nou pei in swazir pou zot pa siport nou lendistri primordyal e *walkout* apre midi tel parey zot ti fer lo program *IMF*.

Nou'n fini konpran ki manner zot anvi fer politik, i en gran regre mon demann avek zot silvouple pran zot lespas. Me pa bliye ki zot sipoze en Lopozisyon lwayal dan sa pei e zot sipoze pe siport sa pei sirtou son lendistri prensipal. Mersi Mr Speaker.

MR SPEAKER

Mersi Onorab Georges. Nou a komans ekout Onorab Waven William ki *Chairman IAC*, ki'n prepar son rapor lo sa Konvansyon e sa Protokol. Onorab William ou annan laparol.

HON WAVEN WILLIAM

Mesi Mr Speaker. Bonn apre midi tou dimoun ki a lekout.

Mr Speaker dan mon prezantasyon mon pou donn en pti tour dorizon lo ki manner sa prosesis preparasyon sa

Konvansyon in vin devan Lasanble. Me an premye lye mon ti a kontan remersi Sekretarya, sirtou Deputy Clerk avek son lekip ki'n kapab fer nou ganny rapor lo sa Konvansyon.

E mon osi remersi bann Manm IAC ki'n partisip dan diskisyon avek bann parti prenan lo sa Konvansyon.

Mr Speaker taler bann lezot Manm pou koz lo rapor aköz sakenn pou koz lo serten parti sa rapor, e parey mon'n dir mon pou al en pti pe dan listwar. Mr Speaker mon pou aport mon sipor e mon annan *comme* swivan pou dir;

Mr Speaker dan konteks dezizyon pou siport sa 2 ratifikasyon anba tit "En nouvo fitir pou Lendistri Tourizm" dan *manifesto* pou konpany avek ver eleksyon zeneral 2020, ki ankor dan en mwan detrwa semenn pou fer lan komemorasyon sa dat ki pou byensir antre dan listwar Sesel.

Mon site "Sakter tourizm pou reste sa lendistri enportan, me nou bezwen pran loportinite pou met li lo en nouvo direksyon. Nou pa kapab depan lo ogmant la kantite viziter ki pa pou soutenab lonterm pou plis benefis. O kontrer nou bezwen met latansyon ver donn plis

valer nou prodwi" fen sitasyon Mr Speaker.

Mr Speaker letan nou pe refer ek Kod Etik Tourizm Global, sa i en seri prensip ki son bi se pour gid bann parti prenan dan devlopman Lendistri Tourizm. Gouvernman Lokal e Santral, kominote lokal distrik, Lendistri Tourizm e son bann profesyonnel enkli viziter enternasyonal e domestik.

Kad Kod Etik Tourizm Global i etabli en kad referans pou en devlopman tourizm responsab e soutenab, bann lenspirasyon i ganny retire dan plizyer deklarasyon similer Kod Etik oparavan. I donn nouvo panse e refleksyon lo sa dinamik sanzman dan Lendistri Tourizm depi komansman venteenyenm syek Mr Speaker.

Mr Speaker ek en prediksyon tourizm global *forecast* i pou ariv anviron 1.6bilyon viziter ver 2020/'21, Manm Lorganizasyon Tourizm Mondyal i fermeman krwar ki Kod Etik Tourizm Global i neser, pou minimiz lenpak global mouvmentasyon sa kantite dimoun dan lanvironnman iniversel.

Par egzanp lo leritaz kiltirel, an menm tan ki sa vilaz global koman rezidan e pei i maksimiz zot benefis.

Mr Speaker pou piblik konpran kwa ki sa setyenm Lasanble pe ratifye i enportan donn en pti pe revl lo sa proses devlopman ki sa travay in ganny antreprann lo sa sekte. E lo sa neseste pou mondyalman respe serten Kod Etik dan sa lendistri ki ozordi i form baz size sa Konvansyon ki devan nou.

Tou i komans ek en rezolisyon par Lorganizasyon Mondyal Tourizm Nasyon Ini an *Istanbul Turkey* an 1997. Pandan sa 2an apre ki en Komite travay ti ganny formen pou diskit fer en *draft* sa Kod e prezant devan Konsey Egzekitif Lorganizasyon Mondyal Tourizm.

Sa Komite Travay ti konpri dyalog ek sekte biznes, Konsey *UNWTO* Komisyon Rezyonal e Konsey Egzekitif *UNWTO*. Komisyon Nasyon Ini lo devlopman soutenab an Avril 1999 ti aprouv konseps sa Kod Etik ki ti demande ki *UNWTO* i konsilte ek sekte prive, sosyete sivil e Lorganizasyon Linyon Travayer.

Apre en seri konsiltasyon travay entansiv e konpreansiv, kontribisyon sorti kot 70 Pei Manm e antite, Lasanble Zeneral *UNWTO* ti aprouv sa dokiman an *Santiago Chile* Oktob 1999.

Konseps Nasyon Ini lo lekonomi e sosyal an Zilyet 2001 ti adopte en draft rezolisyon 4 Kod Etik e i ti demann Nasyon Ini pou rekonnèt ofisyelman sa dokiman Kod Etik Tourizm. Ti finalman ganny rekonnèt an Desanm 2001 Mr Speaker.

Atraver en rezolisyon ti ankouraz Lorganizasyon Mondyal Tourizm pou promot en proses swivi efektif sa Kod Etik. Menm si i pa ti ilegal, Lartik 10 sa dokiman ti fer provizyon pou en mekanizm enplimantasyon volonter an rekonesan travay e rol Komite travay lo Kod Etik Tourizm.

Mr Speaker sekte lendistri tourizm global in devlope e evolue atraver konpany fer lo sak mayon sa lasenn valer azoute ki sa lendistri pe promote. Sesel i pa en leksepsyon dan sa demars Mr Speaker.

Dan sa proses letan nou pe osi promot laspe soustenabilite dan konteks bann target devlopman soutenab, dan kad lazanda 2030, in annan plizyer tandans devlopman dan en fason pozitiv e osi negativ ki pe enpakte lo resours imen dan form kreasyon larises e benefis e dan form labi tel parey;- labi zanfan, labi seksyel, e trafik imen.

Lenpak lo nou ekosistem e lavi maritim e lenpak ankor atraver plis aktivite iresponsab zonn dan lanvironnman e menas sanzman klima. Mr Speaker bann tel labi ki mon'n fek fer referans avek, pou Seselwa ki'n frekant Kontinan Lafrik e Lazi, nou kapab temwannen labi zanfan e travayer atraver sa lendistri.

Kot bilyon reveni i ganny fer par propriyeter e investiser e *shareholder*, tandis ki viktim i sibir en labi fizik dan diferan form. Dan menm rezyon nou osi temwannen menm lenpak lo lanvironnman par zonn ak mank ledikasyon e lapovrete dan pe rod lavi, ensi ki mankman Polisi kler e laplikasyon Lalwa.

Mr Speaker Komite ki'n travay lo Kod Etik Tourizm ti vwar li neser pou met serten lord me ek en Kod Etik ki pa legalman *binding* lekspektasyon serten nouvo soustenabilite e lazistis pa pe ganny neserman ganny respekte.

Komite ti prezant en propozisyon Kod Etik ek *UNWTO* koman en dokiman Polisi prensipal pou vin koman en Konvansyon enternasyonal pou ranforsi etik dan sa lendistri global Mr Speaker.

UNWTO atraver en rezolisyon an *Medellin Colombia* 2015, Sekreter Zeneral ti etabli en Komite travay pou egzamin ansanm ek Komite Kod Etik lenplikasyon ladopsyon en tel lenvansyon. 36 Leta Manm ti form parti sa travay, ti fer 5 sesyon travay.

Ant le 10,12 Me 2017 en draft ti ganny prezante par Komite Egzekitiv *UNWTO* pou Lasanble Zeneral Nasyon Ini konsidere. Dan son 22enm zeneral Nasyon Ini ti ganny prezante ek en versyon Angle sa Kod Etik Tourizm pou konsidere e aprouve.

Sa Konvansyon dan 5 langaz ti ganny adopte dan 23enm sesyon Lasanble zeneral Nasyon Ini *St Petersburg Russia* Septanm 2019 atraver en rezolisyon. Sa ti en premye Konvansyon Enternasyonal Tourizm Legal.

Protokol Opsyonnel to ganny prezante par Konsey Legal *UNWTO*, pou prezant en gid e osi bann letap neser pou pei manm depi letan ki Konvansyon i ganny sinyen etabli lekel ki pou kapab sinyen an servan gid Konvansyon *Vienna* pour ratifikasyon.

I etabli bann diferan letap dan proses ratifikasyon depozitwar kan i vin an fors. E

kwa ki enplik Pei Manm ki form parti sa Konvansyon kad Kod Etik Tourizm Global. I pe senplemant sa Konvansyon ek prosedir pou rezourd dezagreman dan laplikasyon, e enterpretasyon sa Konvansyon dan lape avan prosedir legal i ganny pourswiv.

Mr Speaker an akordans ek Lartik 18 sa Konvansyon, sa konvansyon kad Kod Etik Tourizm pou ouver pou sinyen kot *headquarters UNWTO Madrid* depi le 15 Oktob 2020. Kot laplipar i a ganny ratifye par Leta Manm ki anvi form parti sa Konvansyon lo kad etik tourizm.

Sesel Mr Speaker parey loter Mosyon in souleve pa ankor sinyen, me i pour sinyen letan ratifikasyon i ganny fer.

Mr Speaker mon'n koz lo prosis sa linisyativ travay ki'n ganny fer pour ki sa Konvansyon ozordi i devan Lasanble pou ratifye.

Sepandan atraver sa ratifikasyon mon oule lans en lapel avek tou parti prenan isi Sesel dan sa lendistri pou vremen donn tou zot zefor pou ofer sa kliyan ki sorti tou sa zistans pou vin eksperyans sa gou kreol ek sekre Sesel, atraver zot servis e zot prodwir.

Annou don valer pou larzan. I bon konnen e konpran

ki i annan sa bann viziter ki pran *loan* pou vin Sesel, zot vini aköz promosyon e lavertisman ki atir zot. Zot anvi eksperyans sa *brand Seychelles*.

Atraver en persepsyon e ekspektasyon sa Mr Speaker si pa ganny fer i kot en vilen gou dan labous e fo panse dan lespri. Sesel i ganny byen plase o nivo pwen zoli pei, paviyon Sesel pe flote atraver sa lendistri global. Sesel lo sa lasenn enternasyonal i nivo 7 zetwal.

Kantmenm pa ofer sa bann viziter servis 7 zetwal ozordi, annou donn zot nivo 5 plis. Annou kit en mark lo sak sa bann viziter ki zot pa a vin en *one-off visitors*, me bann *repeated visitors* pou lavi.

De lot kote mon dakor ek Minis Tourizm, annou aret konplent ki lavil i mor aswar wikenn. Annou koste pou fer li vivan, annou osi pa konplent ki tourizm pa depanse. Larg lanmen Seselwa e donn direksyon pou li motive pou vin pli kreativ.

Fasilitater zwe sa rol ek plis komitman anver solisyon. A sa pwen Mr Speaker permet mwan sit en lot bout dan sa manifesto, anba lartik tourizm pou met nou dan konteks mon largiman mon site;

“Diversifye nou latraksyon sa vye latraksyon i ti pe atir viziter pandan lannen, *des années* zot dan risk tro ganny eksplwate. Nou pou kre nouvo latraksyon ki pou donn valer azoute nou prodwir ek bi ogmant nou benefis.

Nouvo latraksyon profitab kapab ganny devlope lo zil prensipal Sesel, Mahe e lo lezot parey Praslin e La Digue parmi lezot ankor:” Fen sitasyon Mr Speaker.

Dan sa loptik i moman enportan pou fer konnen lendistri ki Komite Zafer Etranzer in amann son referans travay pour kouver ler lendistri tourizm.

Komite pou angaz ek tou akter ek parti prenan dan prosen *recess* pou nou konpran sa lendistri pou sey ede kot nou kapab pou travay ansanm ek zot, pou kal e konsolid nou pozisyon mondyal dan sa sekter ki pe vin pli konpetitiv Mr speaker.

Ek sa 2 mo Mr Speaker mon pou demann Lasanble pou ralye dan linanimite pou ratifye sa 2 Konvansyon pou en meyer devlopman soutenab lendistri global tourizm, sirtou dan sa sityasyon lenpak ekonomik mondyal pandemik *COVID*.

I annan sa for tandans pou sey fer sa gro profi vitman

pou konble zot per 2021 b k pous serten pou *cut corners* e rod *quick fix*.

An terminan mon remerci Senyer pou son faver lo nou pei ki touris pe kontinyen vin Sesel malgre plizyer lesey pou retard kot lesey lokal e enternasyonal in ganny fer pou destabiliz zefor atraver medya enternasyonal lo vre realite Sesel Mr Speaker.

Mon remerci Bondye osi pou bann desizyon brav konpany vaksinasyon par nou bann Dirizan ki pa'n sede malgre ganny akize pou koz lanmor plizyer defen, e dekouraz serten kous popilasyon pou *boycott* vaksinasyon.

Mon remerci Seselwa ki pa'n tonm dan pyez konpany *lockdown* pei e ganny tante pou fer lamars. Lendistri pe repran son lekilib progre e lo medya nou pe swivre atraver bann diferan temwannayaz Mr Speaker.

Finalman mon remerci tou akter ki pe vreman donn zot mye dan sa lendistri. Minis pou tourizm ki pasyonnen ek anmenn sanzman e transformasyon dan sa lendistri. Mrs Shireen Francis ek son lekip eksperyanse ki pe adapte e diriz nouvo lelan.

Tou travayer e lasosyasyon Seselwa dan sa

lendistri ki san zot nou pa ti pou reisir Mr Speaker. Annou *walk the talk* atraver sa ratifikasyon. Mersi.

(APPLAUSE)

MR SPEAKER

Mersi Onorab William. An referans avek pwen, referans ki Onorab in fer mon oule konfirman e ki let ofisyel sorti kot Biro Prezidan ki demann nou pou ratifye sa Konvansyon an atandan son egzekisyon in ganny fer e in ganny delivre kot mwan, e Lasanble i annord pou prosede avek sa.

Mersi nou a komans deb alo sa Mosyon mon ava envit Onorab Monthly premye e i a swiv par Onorab Samynadin. So, a en moman apropiye Onorab Samynadin i a kapab pran son pozisyon. Onorab Monthly.

HON PHILIP MONTHY

Mersi Mr Speaker. Bonn apre midi a tous. Dan *meeting* ki Komite IAC ti fer avek delegasyon sorti kot Minister Tourizm, bann Manm Komite ti ganny prezante avek bann fe konkret, akoz ki Sesel i devret pe ratifye sa Konvansyon e Protokol Opsyonnel.

Prenon kont son lenportans anver devlopman

dirab pilye limero 1 nou lekonomi ki touris. I enportan ki an menm tan ki nou devlop nou lendistri touris nou vin osi konsyan lo lenpak ki sa i kapab annan lo nou bann resours natirel, lo nou kiltir e nou fason viv koman en pep.

I enportan alors ki nou protez nou bann kominote pou asire ki aktivite relye avek sa lendistri pa enpakte negativman lo lavi nou bann zabitan.

An dot mo nou bezwen asire ki sa lendistri i vin enn ki soutenab. An ratifyan sa Konvansyon e Protokol Sesel pe donk anvoy en mesaz kler pou nou bann *stakeholders* ki pe direkteman ou endirekteman enplike dan sa lendistri, pou vin pli konsyan lo zot aksyon e asir ki sa i anliny avek *UN sustainable development goal*.

Komite IAC in ganny asire ki bann gran liny sa Konvansyon i reste parey dan *Global Code of Ethics for Tourism*. E ki desizyon pou transform lo sa Kod Etik an e Konvansyon i tou senpleman en desizyon legal.

Ler pei i ratifye sa Konvansyon parey nou pe demann sa Lasanble pou fer ozordi, langazman sesel e tou lezot pei ki pou osi ratifye sa menm Konvansyon i vin enn

legal anver lenplimantasyon sa Konvansyon.

Ki benefis pou Sesel? I annan plizyer retonbe pour Sesel lo nivo *UNWTO*, e enn ki nou deza pe benefisyé avek se sipor sa lorganizasyon ler Sesel ti deside pou ouver son lafrontyer avek bann viziter.

Parey Onorab William in fer sorti avan mwan ti annan plizyer kritik ti dir *lockdown* me Mr Speaker bann sif i koz pou zot menn an term lakantite viziter ki'n debark lo nou later. Prenon kont sityasyon aktyel ki lemonn pe fer fas avek.

E pour mwan sa in en gran reisit e en dezinyon brav ki L'Egzekitiv in pran. E i pe aport son rezilta pou tou dimoun, tou Seselwa temwannyen an se moman.

An rezilta sa desizyon Gouvernman e sipor *UNWTO* Sesel in kapab relans son lekonomi, ki bann nouvo mezir ki Sesel pou bezwen enplimante anliny avek sa Konvansyon?

Sesel i annan en lavantaz par rapor a plizyer lezot pei. Pou la senp rezon ki nou lendistri touris i pilye prensipal nou lekonomi e i en sekter ki'n tre byen devlope, ki donk fer ki nou napa okenn gran reform ki nou pou bezwen fer avek nou Lendistri Tourizm ler nou pou'n

ratifye sa Konvansyon e Protokol.

E prenon kont sitasyon aktyel poze par sa pandemik *COVID*, i pou annan en nesesite pou revwar nou Polisi Nasyonal lo tourizm me tout an restan anliny avek bann lartik sa Konvansyon.

Komite *IAC* ti demann klarifikasyon lo lartik 12 sa Konvansyon ki kouver dwa bann travayer dan sa lendistri e konsern sete, eski sa pa pou enpakte lo bann Polisi aktyel ki kouver bann travayer etranze dan pei?

Delegasyon ti asir Komite ki sa pa pou leka me ki Lartik 12 pe o kontrer protez bann dwa travayer an relasyon avek zot kondisyon travay, *training* e devlopman profesyonnel.

Nou pe souvan tann dir ki fason sa pandemik *COVID* ki la i le moman pou mou re envant nou lekor, e dan en antretyen avek lapres Minis pou Tourizm ti koz lo anmenn touris dan la kominote e Lartik 8 sa Konvansyon i kouver egzaktaman sa.

Diversifikasyon bann prodwi e valer azoute i nesaser. Plizyer aktivite lo nivo distrik a ede ofer nouvo leksperyans bann viziter si sa i ganny fer dan en fason byen e profesyonnel. E pour sa arive i

bezwen annan en lapros kolektiv enplikasyon plizyer *stakeholders* sa lendistri.

E se zisteman dan sa laliny ki Komite IAC ti fer rekomandasyon avek Departman Tourizm, pou ki plis i ganny fer pou enplik bann pti biznes dan devlopman Nasyonal sa lendistri, lo nivo distrik. Kot sak distrik i a kapab ofer bann viziter zot latraksyon spesifik ki zot annan e sa i a ed e anmenn plis larises direkteman dan kominote.

E la Mr Speaker mon pou bezwen mansyon on distrik Cascade ki pe deza atir en serten kantite viziter ki von lo sa *trail* ki al kot *waterfall*, e mon santi ki plis i devret ganny fer lo nivo Nasyonal pou ede devlope fer permisyon e mentenir sa bann trail.

Enn bann *trail* pli frekante lo Mahe se sa *trail* Mont Sebert Cascade touzour ki dernyen fwa mon ti verifye pa ti fer parti bann *major trail* lo Mahe. I byen pou nou ankouraz prive pou pran *ownership* serten sa bann *trail*.

Me mon sertenman krwar ki avek sipor Gouvernman sa i a ede asire ki bann tel proze, pa zis komanse me ki i soutenab e dirab. Avek sa detrwa mo Mr Speaker mon pou sport mon sipor atraver

demann ki pe ganny fer avek sa Lasanble pou ratifye sa Konvansyon. E mon pou ankouraz mon bann lezot koleg pou zot osi fer parey. Mersi Mr Speaker.

(APPLAUSE)

MR SPEAKER

Mersi Onorab Monthy. Onorab Samynadin.

HON KELLY SAMYNADIN

Mersi Mr Speaker. Bonn apre midi Mr Speaker e tou mon bann lezot koleg Onorab. Mr Speaker mon anvi dir ou mersi pou donn mwan sa sans pou koz lo ratifikasyon sa Konvansyon akoz sa Protokol i enn ki tre enportan e *a mon avis* i enn ki pour anmenn bokou benefis pour nou pei.

Koman en Manm *International Affairs Committee*, mon'n ganny sans ansanm avek mon bann lezot koleg pou depouy sa Konvansyon e koman en lekip nou'n tonm lo sa bann *synopsis* swivan;

Premyerman nou rekonnet ki *framework* Konvansyon ki'n ganny etabli par Lorganizasyon Mondyal Nasyon Ini pou Tourizm e i ti ganny adopte atraver en rezolisyon dan 5 langaz ofisyel par Lasanble Zeneral UNWTO

dan son 23enm sesyon ki ti pran plas an *St Petersburg La Russie* an Septanm 2019.

Dezyenman nou'n note ki sa Konvansyon i konverti *Global Code of Ethics* pou Tourizm.

Dokiman Polisi prensipal *UNWTO* sorti koman en dokiman volonter pou vin en Konvansyon, ki obliz sinyatir bann Leta dan lenplimantasyon bann prensip sa Konvansyon, dan en fason pou fer ki sekter global pou tourizm i vin enn ki pli efikas, pli soutenab e pli transparan.

Mr Speaker Komite in osi rekonnet ki *global Code of Ethics* in etabli en lankadrem referans pou asir devlopman responsab e soutenab pou devlopman *tourism*.

I ilistre en lenspirasyon sorti kot plizyer deklarasyon similer ek *code* lendistri ki'n deza ganny prezante presedaman e i azout nouvo fason panse ki reflekte nou sosyete an sanzman lo komansman venteenyenm syek.

Finalman nou Komite in osi note e rekonnet ki sa Konvansyon i pran kont lefe ki tourizm i annan potansyel pou kontribye direktman e endirektman anver bann

sustainable development goals - bann *SDGs* avek en regar partikilye anver kwazman ekonomik soutenab e enklisiv.

Ensi ki litalizasyon soutenab nou losean, nou bann resours maritim osi byen ki nou leko sistenm teres.

Mr Speaker pou konklir koman en Manm Parlman mon santi ki sa Konvansyon i annan tou son bann merit pou ganny ratifye dan lentere Nasyonal an vi ki Sesel koman en destinasyon touristik, nou pe deza pratik *sustainable tourism* dan laplipar nou bann letablisman touristik.

E Gouvernman li menm i prevwar ki swa atraver bann mekanizm Polisi e resours pour ki sa i reste an materyalizasyon pou benefis sa lendistri e nou pei an zeneral.

Alors Mr Speaker set avek gran plezir ki mon pe aport mon sipor anver ratifikasyon sa Konvansyon osi byen ki sa *Optional Protocol*. Mersi.

(APPLAUSE)

MR SPEAKER

Mersi Onorab Samynadin. Laparol Onorab Woodcock.

HON WAVEL WOODCOCK

Mersi Mr Speaker. Mr Speaker bann enterven an avan mwan in

koz lo bi e *scope* sa Konvansyon avek bi prensipal pou promouvwar en tourism responsab soutenab e aksesib partou dan lemond.

E dapre sa Konvansyon pou sa vin en realite i pour enportan ki bann prensip etik, bann prensip moral i ganny enplimante dan *tourism*, parey in ganny definir dan Lartik 4 ziska 12 sa *framework convention on tourism*.

Dan mon lentervansyon mon pou konsantre lo sa bann *ethical principles*, 9 prensip moral etik ki pou ede dan lepanouisman *tourism* Sesel e partou dan lemond.

Fodre note Mr Speaker ki Sesel i deza pe swiv e met lanfaz lo plizyer sa bann prensip moral etik. Me petet nou kapab amelyor nou performans lo lenplimantasyon serten sa bann *ethical principles* atraver bann Polisi, Lezislasyon e lezot mezir.

Mon komans avek premye prensip moral, Lartik 4 i koz lo tolerans avek respe lo promouvwar bann valer moral ki limanite i annan an komen. Respe, diversite larelizyon, respe pou bann diferan krwayans, krwayans relizyez, filozofik avek moral.

E Sesel ziska prezan nou pe fer sa as byen. Nou

popilasyon i annan diferan krwayans, *belief*, menm lo kote relizyon nou annan plizyer larelizyon. E nou en pei ki ase enklisiv e ziska prezan nou pe resevwar tou dimoun i sorti dan nenport ki pei relevan, ki zot bann krwayans ki zot *believe*, ki zot bann pwennvi filozofik.

E i osi enportan dapre sa Konvansyon dan enn bann prensip etik enportan, se ki i enportan pou annan respe pou kiltir e tradisyon nou prosen. Bann touris ki vin Sesel i merit osi annan respe pou nou kiltir, nou krwayans zis parey let nou Seselwa nou voyaz aletranze nou al deor, nou bezwen annan respe pou kiltir tradisyon e pratik sa bann pei.

Nou bezwen annan respe pou menm bann ki dan minorite pou pa denigre zot. Bann aktivite *tourism* i bezwen pran kont tradisyon atribi e respe Lalwa pratik e koutim sa pei ki pe *host* zot. E i enportan ki bann profesyonnel lokal e menm nou la kominote lokal i respe sa bann touris.

Konpran konteks ki sa ban touris ki sorti Sesel zot sorti ladan e i enportan ki i annan bann *training* pou bann profesyonnel. Bann dimoun i travay dan sa domenn dan *tourism*, i vreman enportan pou zot osi ganny sa bann *training*

sa bann lantrennman pou zot konpran konteks sa bann pei, ki pe sorti pou zot kapab annan sa lakseptans pou sa bann dimoun e tret sa bann dimoun byen.

Sak Nasyon i annan son fason fer, son fason viv. E parey mon'n dir Seselwa nou, nou en pei ki nou abitye avek diferan nasyonalite, nou en pei ki ouver avek lemonn antye. Nou annan dimoun ki sorti, bann touris i sorti Lerop, bann pei Lazi, Lafrik partou zot vin Sesel.

E plis ki zanmen i enportan la pou nou prezerv e gard nou bouse manze. E lafason ki nou tret bann touris i pou determinen si zot pou kontinyelman vin Sesel. Sanmenm sa i vreman enportan ki nou annan respe, e nou tret tou bann etranze ki vin lo later Sesel dan en fason ki byen.

En lot keksoz ki ganny met lanfaz lo la se sekirite tou touris i bezwen ganny garanti. E sa i osi enkli travayer dan sa lendistri. Touris i merit ganny proteze kont okenn form kriminalite, okenn latak lo touris, nou bann fasilite *tourism*, nou bann leritaz kiltirel i merit ganny severman kondannen.

I pa merit ganny, sa bann keksoz pa merit ganny tolere dan okenn pei e isi Sesel deza

Lalwa pou vol e atak touris Sesel i vreman sever. Akoz parey mon'n dir nou bezwen protez nou lasyet manze. En touris osi pa merit fer okenn lofans dan pei ki zot voyaze.

Zot pa merit pe fer bann lofans parey trafik drog, trafik imen e vol, sirtou vol bann lespes andemik in ganny touse dan sa Konvansyon osi. E nou vwar dan lepase kot bann touris i vin Sesel zot in vol bann lespes andemik parey nou'n war, i annan ki'n vol lezar, i annan ki'n vol grenwir e kanmeleon.

E i enportan, e sa nou'n war in arive Vallée de Mai e lezot landrwa sirtou dan bann rezerv Nasyonal. Touris i merit osi enform zot lekor lo sa bann pei ki zot vizite. E zot merit konnen tou bann risk ki vin avek bann pei ki zot pe voyaze.

E i enportan si ou konnen poudir en pei i dan *civil war* ou pe al dan sa pei *at your own risk*. So i enportan pou ou *être informed* - ou enformen lo sa bann pei ki ou pe al vwayaze. Lartik 5 i koz lo rezon akoz ki dimoun i voyaze.

I annan dimoun ki voyaz pou repo, pou *relax* pou spor, pou eksperyans lanatir, pou eksperyans en nouvo kiltir. I annan dimoun ki voyaz pou lanmizman. Tou dimoun i merit annan son drwa pou *enjoy* son

lavi tout an respektan drwa sa lot endividi.

Aktivite touristik i merit respe drwa tou endividi bann ki pli vilnerab, bann ki otreman kapab, bann ki dan bann minorite etnik, zanfan, bann vyeyar e tou dimoun dan tou kours popilasyon. E i osi met lanfaz lo respe egal pou zonnm avek fanm.

Okenn form labi imen pa akseptab. Irelevan si ou ki pe *travel* dan sa pei, ou swa si nou pe *host* sa bann touris, okenn form labi pa akseptab.

E i malere dan nou pase, dan nou fitir in annan bann pratik ki'n, ki nou konnen sa nou okouran kot i annan, nou'n war bann *escort* nou'n war bann zenn fiy sorti dan bann pei, bann *ex-Russian satellite state* in vin Sesel e nou'n aprann poudir bokou sa bann fiy in ganny eksplwate in ganny abize.

E sa i bann keksoz ki nou pa kapab ganny les repete dan nou pei ozordi. I annan ki *travel* pou lasante, i annan ki *travel* pou ledikasyon, i annan ki *travel* pou rezon spirityel e tou sa bann keksoz i ganny ankouraze anba sa Konvansyon. Ledikasyon lo *cultural dynamics* lezot pei i ganny ankouraze.

I enportan pou nou ankouraz nou zanfan, ankouraz bann profesyonnel dan domenn touris e menm Seselwa an zeneral pou nou fer en pe resers konpran sa bann diferan pei ki sa bann touris i sorti ki pe vin Sesel.

Lartik 6 i koz lo *sustainability* nou lanvironnman. E menm dan manifesto nou parti, i met bokou lanfaz lo *green tourism*. Aktivite *tourism* i merit ankouraz prezervasyon e konservasyon lanatir.

Prezerv lanatir pou fitir nou zenerasyon, i enportan ki i annan balans dan bann devlopman touristik dan konstriksyon bann letablisman touristik avek lanatir. Nou pa fer li dan en fason destriktif ki detrir nou lanvironnman, ki detrir nou *flora and fauna*.

Alor i enportan ki nou fer keksoz dan en fason ki prezerv nou lanvironnman e nou lanatir. E nou'n war sa Sesel in en keksoz ki'n al ase byen i en keksoz ki'n annan bokou bann lotel ki'n ganny konstrir Sesel.

Parey mon pou pran legzanp Ephelia e si mon pa tronpe Kempinski osi kot zot in adopte lanmar e zot pe protez sa bann lespes plant e sa bann zannimo andemik. E zot pe fer

en bon louvraz pou konserv sa bann *wetlands*.

Ozordi nou koz bokou lo *eco tourism* lo *limit carbon footprint* avek popilasyon. E nou Gouvernman osi dizour nou koz bokou lo servi lenerzi renouvlab, prezerv nou bann resours natirel, *save* lo la kantite delo ek lenerzi ki nou servi ankouraz *rain water harvesting* e *green energy*, lenerzi soler.

E en lot keksoz ankor ki zisteman mon war en pe plis lanfaz pe ganny mete ozordi. Zisteman i annan en zoli travay ki pe ganny fer dan mon distrik Grand Anse Praslin lo *landfill* pou nou *extend lifespan* sa *landfill*.

E byento i annan bann proze *recycling* ki pou komanse pou ki nou redwir e nou annan en pli bon zesyon salte lo bann *landfill*. E mon mazine ki lo Mahe osi sa i pou leka.

Lartik 7 i koz lo promouvwar kiltir en pep. Promouvwar lar, lanmizik, ladans, lalang, tradisyon e menm nou bann pla, nou manze, pla sa Nasyon. Prezerv bann leritaz Nasyonal parey Praslin nou annan Vallée de Mai. Nou annan Fond Ferdinand. Nou annan, Sesel nou annan Aldabra e plizyer lezot rezerv natirel ankor.

Tourism i merit ankouraz bann artizan, bann artis lokal pou epanouir. I merit en pei met lanfaz lo bann prodwi lokal, pou bann dimoun lokal osi kapab kre reveni pou zot lekor.

Wi nou konnen poudir a sa moman nou pe pas dan en peryod ase difisil, e nou fer fas avek *COVID-19*. Me nou pe *recover* e nou pou *recover*, akoz Sesel i annan li en pli bon ladministrasyon ki in deza gannyen.

Prensip moral limero 5 dan Lartik 8 i koz lo benefis *tourism* pou popilasyon lokal. Loportinite lanplwa, *tourism* i kree lanplwa, *tourism* i kree loportinite pou Seselwa antre dan biznes, antre dan *tourism*, i merit annan loportinite pou *training* pou bann Seselwa, bann etablisman Touristik e menm bann lekol.

Ozordi nou annan *STA* e nou bezwen kontinyen ankouraz devlopman bann profesyonnel dan sa bann distrik. E i merit annan loportinite pou Seselwa investir dan sa sekter. Ozordi nou war plizyer Seselwa ki'n antre dan biznes *car hire*, *boat operators*, *lotel*, *restoran*, *guest houses*.

E i annan lezot domenn ankor ki nou kapab antre ladan ki pou kapab ed sa lendistri epanouir e anmenn reveni dan

pos Seselwa. *Tourism* i merit ede elev standar lavi.

Wi parey mon'n dir nou'n ganny tape for avek *COVID*. An 2020 *tourism* ti ater net. An 2020 nou *real GDP growth estimates* ti *minus*, ti negativ 12.8. E an 2021 akoz ou bon desizyon Gouvernman LDS nou *GDP growth estimates* in ariv 6.7poursan.

E dapre estimasyon mon krwar Onorab Philip Monthly in tous en pe lo la, dapre estimasyon nou pe fer pli byen ki larestan lemonn e i annan pei ki pa ankor *recover* a sa *pace* ki Sesel pe *recover*.

An 2020 *tourist arrival* ti desann par *minus 70percent* Sesel. E akoz ou bon desizyon Gouvernman Sesel anba administrasyon Prezidan Ramkalawan pou ouver nou pei an Mars, nou'n sorti dan negativ. Nou'n sorti *minus 70percent* pou ariv dan pozitiv, pou ariv 32.5poursan sa lannen 2021.

E mon bann frer ek ser annou annan en pti pe pasyans nou lekonomi pe refer e nou lekonomi pou refer e nou pei pou re debout lo son lipye ! Menm si i annan en bann in ede met li lo son zenou e apre zot taye zot kit Lasanble Nasyonal zot kit zot gro saler lafen dimwan.

Okenn devlopman *touristik* i merit konsider lenpak lo lanvironnman, lo lakot avek montanny e lo byennet bann ki reste dan sa lanvironnman. Lartik 9 e sizyenm prensip etik i koz lo responsabilite.

Gouvernman pou fer sir ki bann *operators* dan biznes *tourism* pa eksplwat, pa *exploit* bat latet, vol e *misinformed* bann kliyan ek touris. Ki *value for service* i ganny donnen, bon kalite servis pa fer touris pey plis ki zot devret, pa vol touris.

Bann landrwa *touristik* okenn servis *tourism* i merit annan bon lospitalite, lizyenn, servis e sekirite pou touris. Prensip moral limero 7 dan lartik 10 sa Konvansyon i met lanfaz lo *right to tourism*.

Nou tou nou annan drwa pou vin en touris, nou merit annan drwa pou *travel* pou ganny konze *annual leave* e *annual leave* erezman i garanti dan Lalwa Sesel, me i pa leka dan tou pei.

Lafanmir, lazenes e etidyan, nou bann *senior citizens*. Bann ki otreman kapab i merit ganny ankouraze e menm ganny fasilite pou voyaze. Seselwa i en nasyon ki kontan voyaze e mwan mon krwar anba sa Gouvernman

LDS nou pei pou refer e nou pep pou rekomans voyaze ankor.

Lartik 11 *principle ethics 8* i koz lo *liberty in tourist movements*. En touris ki vizit Sesel ouswa okenn pei i merit annan sa liberte pou vizit, mouvman, *travel, within* sa pei sa okenn diskriminasyon. Zot drwa i merit ganny prezerve a tou moman an swivan *the universal declaration of human rights*.

Finalman, dan lartik 12 i koz lo en prensip primordyal ki dan mon lopinyon i pou zwe en gran rol dan kalite servis ki bann touris i gannyen dan sekter *tourism*.

Drwa bann anplwaye e profesyonnel dan sekter *tourism*. Sa i enkli travayer lokal e osi travayer etranze.

Equal pay for equal work. Ganny peye pou zot travay, Lalwa Lanplwa i aplik pou Seselwa e pou etranze pou protez zot lentere. Loportinite *training* ek devlopman pou travayer lokal, i merit en keksoz ki, i merit en keksoz ki ankouraze dan tou ban letablisman *touristik* dan sekter *tourism*.

Travayer pa merit ganny eksplwate, *overworked*, bann pei i merit fasilite mouvman travayer dan sa sekter, permet bann biznes dan sa sekter,

anploy bann travayer, anploy bann eksper ki zot bezwen swa ki sorti Sesel, swa ki sorti dan bann diferan pei pou devlop sa lendistri.

Pa zis Sesel me partou dan lemonn. E i pou enteresan osi ki Seselwa osi dan sa domenn, dan sa sekter zot kapab osi mouvman al travay partou dan lemonn pou zot ganny leksperyans ki zot kapab monte e *improve* zot standar, *their standard of living*.

Alor Mr Speaker i enportan ki tou travayer i ganny trete byen e avek respe. E Mr Speaker i en mank respe pou bann travayer dan sa domenn ler en *Caucus* antye i kit Lasanble kan nou ope diskite en topik ki sitan enportan pou nou pei Mr Speaker. E mon dan mon lopinyon sa i en aksyon ki vreman malonnet.

An konklizyon Mr Speaker sa bann prensip moral e etik bion e enportan pou avans sa sekter pli devan. E mwan koman Manm Elekte pou distrik Grand Anse Praslin mon napa okenn rezervasyon pou siport sa Konvansyon ki devan nou. Avek sa de mo mon dir ou mersi Mr Speaker.

(APPLAUSE)

MR SPEAKER

Hon Phillip Arissol.

HON PHILLIP ARISSOL

Mersi Mr Speaker. Mr Speaker lo sa ratifikasyon Konvansyon lo kad Kod Etik Touris e *Optional Protocol* mwan mon annan sa pou dir; enn se ki mon'n avek Lasanble pou inifye ver son ratifikasyon.

Me i domaz nou vwar *US* in taye, akoz nou napa okenn, Sesel napa naryen pou perdi. Akoz sa Konvansyon li i pe viz ver en devlopman ki pli soutenab sa Lendistri *Global Tourism*.

Bann desizyon e aksyon pli responsab, respe pou travayer dan sa lendistri e pli enportan se konservasyon e proteksyon lanvironnman ki ou'n erite. Tou sa pou dan en fason kolektif pou fer bann pratik ki sarz, pridan e benefis maksimonm.

Me dan en konteks soutenabilite zeneral Mr Speaker par lefe ki bokou in fini ganny dir, mwan mon pou plito koz en pe lo rekomandasyon ki Komite Zafer Etranzer ti a swete arive anba lespri sa Konvansyon e anba sa Protokol.

Se ki ; 1) Minister konsernen i vremen kre sa loportinite pou bann pi biznes

kominoter ede dan diversifye dan azout valer prodwi lokal.

2) Sipor neserer i ganny dirize pou asire ki sa bann linisyativ kominoter i vin anba en kad *one stop shop*.

3) Ki bann Departman e lorganizasyon gouvemantal, non-gouvemantal ki ganny siporte avek Bidze zot vin a labaz pou ankadre e osi promot sa bann lantrepriz kominoter dan son laspe kiltirel, proteksyon lanvironnman e lakwizin Seselwa. E finalman

4) Ki Seselwa dan son totalite zot ralye par deryer linisyativ Nasyonal pou gard pei prop, redwir lannwi, valoriz prezans bann viziter atraver aksyon pozitiv akeyan.

E ki sa viziter e etranze, sa viziter etranze e touris domestik a ganny ankouraze pou retournen. Depans plis larzan e ede dan distribisyon posibilite kreasyon larises nou pei.

Mr Speaker mwan mon pou aport mon sipor me parey mon dir i domaz ki nou war *US* in kit lasal avek en Konvansyon ki vremen enportan pou nou pei. Mon demann tou mon bann koleg *LDS* pou siporte. Mersi.

(APPLAUSE)

MR SPEAKER

Mersi Onorab Arissol. Mon ava envit Onorab Georges pou fer son *summing-up* lo Mosyon.

HON BERNARD GEORGES

Mersi Mr Speaker. Mr Speaker napa en gran keksoz pou mwan dir tou sa ki ... Mon krwar i merite ganny dir lo sa Konvansyon avek sa *Optional Protocol* in ganny dir apre midi.

Mon ti a kontan selman, non selman remersye sak dimoun ki'n pran laparol ozordi, me aplodi zot akoz sak dimoun ki'n koz apre midi in koz dan en fason briyan mon kapab dir, dan en lafason ki nou anvi a Lasanble i bouze dezormen.

E i regretab ki lot kote pa la pou apresye ki mannyer ki en lenstitisyon ki anvi travay i travay ler i ganny merite pou fer li.

(APPLAUSE)

HON BERNARD GEORGES

Sak dimoun apre midi ki'n pran laparol parey mon'n dir, in fer sir ki zot konnen sa ki zot koz lo la e nou'n vwar pasyon avek lakel nou'n koze.

Akoz sa topik i en topik pasyonnan, i en keksoz ki nou konn fer, nou enn bann pei dan lemonn ki konnen ki savedir tourizm, ki konn zer sa lendistri

e ki'n kapab montre ki i annan en bon fason fer tourizm e i annan en move fason fer tourizm. E nou, nou pou al dan semen sa ki bon e nou pou fer li dan en fason etik.

Mr Speaker mon napa okenn dout ki sa Konvansyon pou anmenn gran benefis pu nou pei, i pou malgre ki nou pe fer an zeneral tre byen, nou pe zer nou lendistri dan en fason etik a tou bann nivo.

Toultan i annan *room for improvement* e mon krwar ki si i annan *room for improvement* sa Protokol avek sa Konvansyon i ava gid nou dan sa semen apropriye. Alor Mr Speaker ankor enn fwa mon remersye bann ki'n pran laparol.

Mon regret bann ki'n mank sa deba anrisesan apre midi e ki'n prefere al kot zot, e mon dir avek Lasanble mersi pou zot pasyans ki nou'n kapab malgre tar arive pran sa de, sa Konvansyon ek sa Protokol ozordi ki tre enportan pou nou pei. E annou san tard plis pas lo en vot. Mersi.

MR SPEAKER

Mersi Onorab Georges. Bon mon ava apel bann Manm pou vot lo Mosyon. Premye Mosyon i lir koumsa;

In accordance with Article 64(4) of the Constitution, this

Assembly resolves to ratify the Framework Convention on Tourism Ethics.

Manm ki an faver pou aprouv sa Konvansyon lev lanmen silvouple? Vot lo kestyon;

This Assembly resolves to ratify the Framework Convention on Tourism Ethics in ganny 22 vot pour, 0 vot kont e 0 abstansyon. Alor Mosyon in aprouve.

Dezyenm Mosyon;
In accordance with Article 64(4) of the Constitution, this Assembly resolves to ratify the Optional Protocol to the Framework Convention on Tourism Ethics.

Manm ki an faver lev lanmen silvouple. Mersi. Lo kestyon; *this Assembly resolves to ratify the Optional Protocol to the Framework Convention on Tourism Ethics* 22 Manm in vot pour, 0 kont e 0 abstansyon. Alor sa Mosyon in aprouve par Lasanble.

Mon remersye Onorab Georges pou son prezantasyon pou diriz deba lo sa Mosyon. Mon remersye Komite lo Zafer Enternasyonal atraver son Chairman Onorab William pou zot travay dan egzamin depouy e eksplik sa Konvansyon e sa Protokol pou nou Lasanble.

Avan nou kite pou azordi mon santi i enportan pou mon dir ankor detrwa mo lo sirkonstans apre midi. E mon fer sa spesifikman pou benefis SBC avek lezot medya pou zot konpran klerman ki mannyer sa ki'n arive. Akoz sa ki mon ti a kontan war dan rapor, se en rapor kler e balanse lo sa ki'n deroule apre midi.

Mon oule eksplike ki *Leader* Lopoziyon Onorab Sebastien Pillay ti partisip dan diskisyon *Assembly Business Committee* ki ti fer ant 1er kar ek 2er apre midi ozordi. Enkli osi dan sa miting to son *Chief Whip* Onorab Sylvanne Lemiel.

Donk dan sa miting nou ti diskite deroulman ki ti nesese pou sa bann Mosyon apre midi, alor Onorab Pillay avek Onorab Lemiel ti totalman okouran difikilte ki nou ti pe gannyen avek sa 2 Mosyon.

Lo Mosyon Onorab Esparon nou ti realize ki napa naryen ki nou kapab fer eksepte anvoy li pou en lot zour. Lo Mosyon lo bann Trete. Nou ti realize poudir i annan dokimantasyon nesese ki nou ti bezwen pou nou pran sa bann Mosyon. Sa i pa ti en difikilte ensirmontab. i en difikilte ki ti kapab ganny rezourd.

Nou ti termin sa miting avek propo pou nou sarz

Madanm Deputy Clerk pou li swiv avek Lotorite konsernen pou gete si nou pou ganny sa bann dokimantasyon pou nou konnen si nou pou kapab prosede la apre midi.

E nou ti dakor ler nou kit sa miting nou ti dakor ki ler nou retournen Madanm Deputy Clerk pou enform nou si nou kapab kontinyen avek sa Mosyon, oubyen si nou oule anvoy li pou en lot zour.

Lefe ki sa ti pou premye zour travay, nou pa ti anvi zis anvoy sa Mosyon pou en lot zour, akoz nou ti santi an tout konsyans nou'n reini sa semenn nou'n fer 2 zour travay, nou ti anvi konplet biznes ki ti annan lo nou *Order Paper*.

E se pour sa ki nou ti, e sa retar ti pou permet Madanm Deputy Clerk asiste par Madanm Clerk pou eklersi sa sityasyon. Letan nou ti pe atann sa nou ti pe fer serten desizyon, serten diskisyon e nou ti'n komans met keksoz an mars nou'n ganny sa dokimantasyon.

Leader Lopozisyon ti demann nou ki pe pase e nou ti envit li pou zwenn nou pou atann rezilta sa bann demars e i ti desid pa fer li. Donk dan mon lopinyon protestasyon *Leader* Lopozisyon e son group Manm pa ti zistifye, akoz zot ti

konnen egzaktman kwa ki ti pe pase e ki nou ti pe atann.

Mon espere ki sa leksplikasyon i ker e ki lenformasyon i ganny donnen pou piblik i a reflekte sa ki vremen in pase.

Mon a dir zot mersi bokou pou zot travay apre midi e mon a swet zot en bonn sware. Nou ava *adjourn* pou semenn prosenn Mardi 9er. Mersi bokou.

(ADJOURNMENT)